

WANTOK



Niuspepa bilong yumi ol PNG stret!

Wan Wik,

Nov 4 - 10, 2004

NAMBA 1581

K1 tasol

**Pes 3-
Ripot long Palamen**

**GAVAMANI SIVARAI
STAP INSAIT**

**Pes 21 -
GLASIM MUSIK WANTAIM JK**

Bai i hat long vot

... Spika i no

givim luksave

Yakam Kelo i raitim

SPIKA bilong Palamen Jeffery Nape i mekim hat long ol memba bilong Oposisen husat i memba bilong pati we i stap long Gavman sait long aste. Dispela eksen bilong Spika inap kamapim bikipela hevi tru long ol bikipela vot na senis olsem long taim bilong kamapim 2005 baset, ol vot bilong kamapim ol nupela lo.

Mista Nape i mekim namba wan eksen aste taim em i tokim memba bilong Makam Andrew Baing long bihainim ol lain bilong em long Gavman bikos pati lida bilong em i stap long gavman sait. Mista Baing em memba bilong Pipels Progres Pati (PPP) na em i stap long sait bilong Oposisen.

Mista Nape i tokim Mista Baing olsem em i no inap luksave long em long askim kwesten o mekim wanpela samting olsem memba na lida.

Mista Baing i tok em i save long wanem samting em i mekim na Spika i no inap muvim em i go i kam.

Mista Nape i tok em bai larim dispela samting i go long han bilong Rejistra bilong Politikol Pati na Kendidet Paul Bengo

long skelim na toksave bihain.

Dispela eksen em wanpela hatpela eksen bikos em bai stopim planti memba bilong Oposisen long askim kwesten o mekim vot. Bikipela samting bai kamap em long 2005 nesene baset bilong kantri we ol Oposisen memba i mas toktok na vot long en. Sampela Oposisen memba em pati bilong ol i stap long Gavman sait olsem Pipels Eksen Pati (PAP), Yunaitet Risos Pati (URP), Pipels Progres Pati (PPP) na Pangu pati.

Dispela tu inap stopim bikipela muv Oposisen i laik kamapim long putim kamap vot i nogat bilip long Gavman bilong Sir Michael Somare. Sapos dispela vot i nogat bilip i kamap, bai planti bilong ol dispela Oposisen memba i no inap vot wantaim Oposisen sapos dispela vot i nogat bilip i kamap.

Long nau yet dispela vot i nogat bilip bai wet inap Suprim Kot i tokaut sapos dispela vot i bihainim lo o nogat na wanem kain rot em ol Oposisen i ken bihainim. Gavman i bin mekim dispela pepa i go long Suprim Kot na surukim taim bilong Oposisen long kamapim dispela vot i nogat bilip i go liklik moa.

Tasol dispela toktok bilong Spika Jeffery Nape long ol Oposisen memba i no sut tasol long ol Oposisen.

Igo moa long pes 2



Ol nupela Miss PNG



2004

STRONGPELA TRU

Colgate

Toothpaste bilong PNG stret!

Polis Ripot

Mosbi: WOK i go het nau long stretim Boroko Polis sel Slong mekim em i kamap gutpela. Dispela sel i save lukautim ol lain polis i holim ol long wokim rong, birua na asua insait long komyniti na sosaiti.

Bai i hat long vot

I kam long pes 1

I gat ol memba bilong Gavman sait tu i stap we lida bilong ol i stap long Oposisen. Olsem Pangu pati.

Lida bilong Oposisen Peter O'Neil i tokim Spika olsem em i no mekim wok bilong em stret o i no sanap namel long lukautim na ranim Palamen. Mista O'Neil i tok pasin Spika i mekim i soim klia olsem em i wok long wansait long sait bilong Gavman tasol na dispela i no stret bihainim lo bilong Palamen.

Biknem loya bilong Papua Niugini Dokta John Nonggorr i bin tokaut long dispela wik olsem taim Oposisen i wok long traim senisim gavman long vot i nogat bilip, ol i no tokaut long husat tida tru inap kamap Praim Minista long kisim ples Sir Michael Somare.

Dokta Nonggorr i tok taim Oposisen ino tokaut yet long dispela, ol tu i no tokaut long wanem as tru ol i laik senisim Gavman.

Wanpela ples klia as em olsem ol memba i pret long lus long 2007 nesenel ileksen bikos ol i nogat distrik mani bilong mekim wok na soim pipel olsem ol i kamapim samting. Tasol i nogat wanpela bikipela samting olsem kantri i bungim bikipela hevi o bagarap, Dokta Nonggorr i tok.

Long Palamen aste, nogat inap memba bilong Oposisen i kamap na sindaun long bung. Liklik lain tasol wantaim lida Peter O'Neil na Deputi lida Andrew Baing.

Spika i tokaut pinis olsem em bai stat long katim pe bilong ol memba husat i no kamap long bung bilong Palamen. Bikos long Ogas Palamen kibung, ol Oposisen i no bin kamap long miting klostu tupela wik olgeta.

NZAID helpim

Christina Tony i raitim

NU Silan Hai Komisn i bin helpim wanpela Drag na Alkohol Aweanes Program wantaim K20, 500.00. Long greduesen bilong dispela aweanes program, mausman bilong Nu Silan Hai Komisn John Koi i tok olsem namba wan wok o as bilong ol wok bilong Nu Silan Gavman em long kamapim gutpela ples we i nogat trabel na hangre. "Mipela i save wok hat tru long kamapim dispela samting aninit long NZAID Program. Olsem na mipela save gat bikipela luksave long ol grup husat i save helpim mipela long stretim ol wari bilong ol manmeri insait long komyniti," Mista Koi i tok.

Dispela awenes program em projek bilong Kongrigesen bilong Sekred Hat Bratas. Nem bilong dispela projek em "Save Our Children and Youths against Drugs and HIV/AIDS" o "Sevim ol Pikinini na Yangpela Manmeri bilong Yumi long Drag na HIV/AIDS". Kongrigesen bilong Sekred Hat Bratas wantaim dispela helpim bilong Nu Silan Hai Komisn i bin ranim wanpela skul inap long 6-pela wik olgeta. Long 29 Oktoba ol i bin holim geduesen bilong 25 manmeri husat i bin kisim dispela skul long St. Paul's Monestary long Pot Mosbi.

Supiria Jenerel bilong Kongrigesen bilong Sekred Hat Bratas Fr. William

...Drag na Alkohol Aweanes Program wantaim K20, 000.

Liebert i tok olsem as tingting bilong dispela skul em long lainim ol yangpela manmeri long ol pasin bilong lukautim ol yet long drag, bia na AIDS. "Mipela i laik olsem ol i mas gat save long mekim wanem samting ol i mas mekim long laip bilong ol," Fr. Liebert i tok.

Long tupela wik bilong skul ol sumatin i lainim long ol hevi bilong Drag, Bia na AIDS. Long narapela wik bihain, ol i lainim we bilong skulim ol arapela manmeri long dispela skul ol i kisim. Bihain long dispela ol i lukluk long "Karekta Fomesen" o ol save na pasin insait long wanwan manmeri.

Long las tupela wik bilong skul ol sumatin i lainim ol wei bilong stretim na givim skul long ol manmeri husat i pas pinis long pasin bilong kisim drag.

Program Menesa John Mark i tok olsem ol i bin laik long putim tu wanpela nupela skul insait long dispela program tasol i nogat inap taim. "Mipela ting olsem long narapela kos o skul bai mipela ken lainim ol sumatin long nupela skul bilong mipela long "Sexuality In Our Development". Ol

Sekred Hat Bratas i bin raitim olgeta skul insait long dispela projek.

Dispela em i namba 4 greduesen bilong dispela projek "Save Our Children and Youths against Drugs and HIV/AIDS".

Tupela i bin kamap namba wan taim long 2001 na wanpela long 2003 long Mosbi Notwes.

Olgeta dispela skul i bin kisim helpim long Hai Komisn bilong Briten.

Kongrigesen bilong Sekred Hat Bratas bai karimaut wanpela wankain skul long mun Novemba bilong ol Mosbi Saut bihain long Minista bilong Sotel Developmen Ledi Carol Kidu i bin askim ol long mekim.

Dispela projek em wanpela long planti ol projek bilong Kongrigesen bilong Sekred Hat Bratas.

Ol narapela projek bilong ol em ol Bois Taun long Madang, Lae na Wewak na planti moa wankain projek. "Dispela em i wok God i givim long mipela. Mipela mas go aut na painim ol manmeri i laikim helpim na helpim ol," Fr. Liebert i tok.

Spika i gat gutpela plen Oposisen i tok

Andrew Molen i raitim

OPOSISEN i putim was long Nesenel Spika bilong haus palamen na memba bilong Sinasina Yongomugl, Jeffrey Nape, olsem em i gat sampela tingting long bagarapim narapela bung bilong palamen long sindaun na toktok long baset bilong kantri.

Oposisen i ting Mista Nape bai inap long wokim dispela sapos pati em i stap long en, Nesenel Alaiens (NA) pati i stap long mak nogut o long mak bilong ol long lusim opis.

Long wanpela leta Mista Nape i raitim i go long Komisina bilong Polis Sam Inguba long Oktoba 15, 2004, em i askim Mista Inguba long rausim 20 polisman long wanpela mobail skwat i stap long Kerowagi long i kam was long palamen haus inap long sikspela wik.

Long dispela pas tu Mista Nape i tok em i laikim olgeta kos bilong dispela wok o ekse-sais bai palamen i baim.

"Tingting bilong em, em long pretim ol arapela memba bilong palamen husat ol i stap

long Oposisen long sapos Oposisen i kamapim dispela vot i nogat bilip long Gavman we mipela bai pusim long kamapim stat long neks wik," Gavana bilong Milen Be lida bilong Yunaited Risos pati, Tim Meville i tok long Trinde las wik.

"Mi laikim ol pipel bilong Papua Niugini i mas save olsem man husat i go pas long lukautim lo long palamen i laik bungim wanpela polis skwat long pretim ol lain i stap egen-sim Gavman bai dispela Gavman we pati bilong em, Nesenel Alaiens i go pas long em bai i stap long opis," Gavana Neville i tok.

Gavana Neville i tok Mista Nape i laik wokim dispela samting taim em i kisim ol dispela polisman i kam long strongim sekyuriti bilong haus Palamen.

Gavana Neville i laikim ol pipel i luksave olsem dispela ol polisman Mista Nape i laikim bai i kamap long wankain taim wantaim bung bilong palamen we i stat long Tunde, Novemba 2.

"Em i ting em bai inap long

pretim ol man tasol mi laik tokim em olsem em bai painim hat liklik," Gavana Neville i tok.

Long dispela pas Mista Nape i raitim i go long Polis Komisina Sam Inguba i tok;

"Yu i mas save pinis long sampela ol samting mi laik mekim long haus palamen long stretim lukluk na wei bilong em.

"As bilong askim long yusim ol polis long haus palamen em long helpim na strongim wok bitong sekyuriti na ol arapela wok bilong was long palamen."

Mista Nape i tok tu long pas olsem: "Mi laik askim opis bilong yu long rausim 20 polisman bilong Mobail 11 husat ol i stap nau long Kerowagi long Simbu Provins na kisim ol i kam long hia.

"Dispela ol polisman i gat gutpela trening long kain wok na ol bai inap wok gut wantaim ol sekyuriti bilong palamen long putim strong was long haus."

Gavana Neville i tok long leta bilong Mista Nape olsem em i wanpela hait wok long

traim na pasim dispela vot i nogat bilip long Gavman long i noken kamap.

"Dispela kain samting Spika i laik wokim bai bagarapim demokrasi o we bilong makim ol lida na Gavman insait long kantri na mi laik bai olgeta memba bilong palamen na pablik i mas noken sapotim kain samting na larim dispela vot na ol narapela wok i mas kamap gut tasol na nogat samting i mas pasim," Gavana Neville i tok.

"As bilong askim long yusim ol polis long haus palamen em long helpim na strongim wok bitong sekyuriti na ol arapela wok bilong was long palamen."

TRAIN FOR SUCCESS!

Gain professional skills and accredited qualifications with expert British Training, for a great career. Fees include all you need to succeed!

Your own
CIC Diploma
- your path
to success!

Accredited British Training approved by the Papua New Guinea Ministry of Labour & Employment

Certificates & Diplomas (£130 or US\$260)

- * Accounts, Hotels, Tourism, Computers
- * Administration, Office, Insurance, Marketing
- * English, Secretarial, Purchasing, Stores
- * Business, Management, Personnel, Trade
- * Advanced, Honours and MBA Diplomas
- * Business, Finance, Marketing, Personnel

For a FREE Information Book contact:

CAMBRIDGE INTERNATIONAL

Box 53, Southampton, SO14 0JY, Britain

Email: info@cambridgetraining.com

Web: www.cambridgecollege.co.uk

Fax: + 44 2380337200

Name: _____

Address: _____

Age: _____

Cambridge - your KEY to success!



Makim pipel, nogat sanap long kot- Nape

Neville Choi i raitim

SPIKA bilong Nesenel Palamen, Jeffrey Nape, bai salim husat memba bilong palamen i no makim pipel bilong ol na sindaun long palamen long dispela wik.

Mista Nape i bin autim tingting bilong long namba wan de bilong sindaun bilong Palamen long mun Novemba.

Em i tok husat memba bilong Palamen i no kam sindaun na mekim wok ol pipel i makim em long wokim insait long dispela wik bai kisim samons o kot pepa bilong go sanap long kot.

Gavman i bin i gat 36 memba i sindaun, na long arapela sait, memba bilong Anglimp Saut Waghi, Jamie Maxtone-Graham na Morobe Gavana Luther Wenge tasol i bin makim oposisen.

Mista Nape i bin mekim dispela toktok taim

em i bekim wanpela askim i kam long Gavana bilong Sandaun, Carlos Yuni. Mista Yuni i bin laikim Mista Nape long tok klia long husat tru i peim ol hotel we ol memba bilong oposisen i wok long stap long en.

Nau yet planti long ol memba bilong oposisen i slip long Hideaway Hotel long Pot Mosbi. Em i sutim tok tu olsem i gat sampela memba bilong gavman we ol oposisen i holim ol i stap long kem bilong ol.

Mista Nape i tok klia olsem ol hotel na samting we ol dispela memba i yusim na mekim i stap, em ol yet bai baim. Na long sait bilong ol memba i no tingim wok bilong ol long palamen, Mista Nape i tok olsem:

"Sapos ol i pasim ol memba i stap, ol i brukim pinis seksen 74 bilong Ogenik Lo bilong banisim ol politikel pati na kendidet. Nau mi givim dispela wik tasol we mi laik lukim ol-

geta memba bilong oposisen i kam na makim maus bilong ol pipel bilong ol hia long palamen.

"Sapos nogat, mi bai givim samons long olgeta memba bilong oposisen bai ol i mas go sanap long kot."

Gavman Wip, Tom Amukele i askim Mista Nape long katim o rausim pei bilong ol memba husat i no save kam sindaun long palamen long makim maus bilong ol pipel bilong ol.

"Mista Spika, sapos ol memba i no laik kam long palamen, rausim pei bilong ol dispela memba i no kam," Mista Amukele i tok.

Mista Nape i tok olsem em bai salim pas i go long komiti i save makim pei bilong ol memba long ol memba husat i kam long palamen tasol bai i ken kisim pei bilong ol long sindaun long palamen.

Gavman i go het long miting maski oposisen i no kamap

GAVMAN i bin go het wantaim namba wan de bilong Novemba sindaun bilong palamen, maski oposisen i no bin soim pes.

Novemba sindaun bilong Palamen bai lukim planti samting i kamap. Novemba 16 em i de we gavman i makim bilong karim namba wan bikpela samting, nesenel baset bilong neks yia i go long palamen bai ol i ken paitim toktok long en.

Tasol long ol wik i go pinis, oposisen tu i wok long mekim planti toktok long senisim gavman.

Long Tunde gavman i go het long daunim sampela toktok we ol i tok sampela birua bilong gavman i wok long tromoi.

Wanpela long ol dispela toktok em toktok long mak bilong mani i stap long sentrel benk

o ol foren risevs.

Planti sut toktok i kamap olsem mak bilong foren risevs i wok long go antap bilong wanem nesenel gavman i holim bek mani ol i mas givim long ol provins.

Gavana bilong Nu Ailan i bin askim Treseri Minista Bart Philemon long tok klia sapos dispela toktok i tru.

Mista Philemon i tok klia olsem gavman i gat rot long yusim olgeta mani i stap insait long baset tasol, na mani i stap long ol foren risevs em i mani we i stap long lukaut bilong Risev Benk.

Mista Philemon i tokim palamen olsem i gat planti kain sut toktok i stap we ol man i traim long bagarapim nem bilong gavman.

Tupela memba bilong oposisen i bin givim

ol askim long gavman, Mista Maxtone-Graham i bin askim Praim Minista sapos em i bin givim oda long polis komisina long arestim na sasim gavana bilong Milen Be, Tim Neville na bipo memba Ben Micah long ol i traim givim mani long Sandaun gavana Carlos Yuni.

Mista Maxtone-Graham i askim Sir Michael long soim evidens olsem tru tru Mista Neville i bin givim mani o nogat. Em i tok kot i rausim pinis dispela kes bilong wanem i nogat inap evidens.

Tasol Sir Michael i bekim na tok klia olsem wok painimaut bilong polis i no pinis yet.

"Taim olgeta samting i pinis na tok tru i kamap ples klia, bai mipela i nilim tupela antap long diwai kros," Sir Michael i tok long dispela taim.

Nogat rot bilong vot i nogat bilip

SINGAUT bilong gavman long Suprim Kot long glasim strong bilong wanpela vot i nogat bilip nau i pasim rot bilong oposisen long kamapim long rausim gavman.

Nesenel Palamen Spika Jeffrey Nape long Tunde i tok klia long ol memba olsem i nogat rot bilong kamapim wanpela vot i nogat bilip aninit long Seksen 145 bilong wanem em i stap long han bilong Suprim Kot na i tambu

long toktok long en long palamen inap wanem taim kot i pinisim wok glasim bilong em.

Dispela i katim sot ol toktok bilong Oposisen husat i wok long lukluk long kamapim wanpela vot i nogat bilip bilong rausim gavman long dispela sindaun bilong palamen.

Oposisen lida Peter O'Neill i no wanbel long ruling bilong Spika Nape.

"Dispela man i mas longlong o em i no klia long wok bilong palamen. I nogat wanpela as long palamen i no inap long sindaun bai Spika i ken bagarapim na mekim ol sut toktok long ol lida bilong dispela kantri.

"Em i no rikwaimen olsem ol memba bilong oposisen i mas stap long sindaun long palamen. Wok bilong palamen i ken go het sapos em i gat namba bilong

mekim wok.

"Mipela ol lida ol pipel yet i makim. Mipela i save long wok bilong mipela na mipela bai mekim wok long rot we i lukautim na stre-tim hevi bilong ol pipel bilong mipela.

"I no long laik bilong wanpela arapela lida husat i sindaun olsem Spika bilong Palamen," Oposisen Lida i tok long dispela taim.

Noken tasim Polis komisina opis

YUNAITET Risos Pati na memba bilong Mul Baiyer Kuri Kingal i autim wari bilong em long sampela memba bilong gavman husat i save yusim pawa long putim han insait long opis bilong Polis Komisina long daunim na kamapim sem long ol arapela gutpela lida.

Mista Kingal i mekim dispela toktok bihain long Nesenel Kot i rausim sas long lida bilong pati bilong em, Tim Neville long Tunde Septemba 28 husat ol i bin sasim em long givim mani long sait long Gavana bilong Sandaun Carlos Yuni we Kot i painim olsem i nogat wanpela samting long soim klia dispela asua we ol i sasim em long en.

Em i mekim wankain toktok tu long

wankain disisen we Kot i mekim long olpela memba bilong Kavieng Ben Micah long Trinde Oktoba 20 husat tu kot i rausim sas long em bilong wanem i nogat inap luksave long sasim em.

Mista Kingal i tok pasin bilong ol politisen long putim han bilong ol i go insait long wok bilong opis bilong Polis Komisina i no stret aninit long mama lo bilong kantri we i toktok long wok bilong dispela opis i mas sanap em yet long sait bilong lukautim pipel na karimaut lo na oda insait long kantri.

Dispela ol samting i nogat wanpela polis-man o meri i gat wanpela luksave stret long sasim Gavana Tim Neville na Mista Micah na

long dispela as kot i rausim sas long ol.

Em i tok pasin bilong ol bkman long tokim polis long go holim pasim ol man nating wantaim nogat gutpela wok painim aut i no soim gutpela na trupela wok bilong polis long ai bilong ol pablik.

Mista Kingal i tok nem bilong Gavana Tim Neville na pati i bagarap long dispela giaman wok na planti mani na risos bilong kantri i go nating tu we ol inap yusim long ol arapela gutpela samting.

Nau dispela tupela man i laik kisim gavman i go long kot long sasim nating tupela na ol i laik bai opis bilong Polis Komisina i peim olgeta kos na i no gavman.



SAPOS paia i kirap insait long haus bilong yu, bai yu save kwiktaim na kilim. Tasol ol stail manki bilong kilim paia yet i kirap nogut taim paia i klostu pinisim opis bilong ol.

Wanpela wantok bilong Tokwin i bin sanap long Boroko polis stesen na i tok ol manki bilong kilim paia i bin kirap nogut tru olsem i gat paia long ples bilong ol.

WANPELA susa bilong wanpela niuspepa i bin go pas long autim toktok long niuspepa bilong em long Morobe So. Tasol em i asua na i wok long tok inglis i stap. Sampela manmeri i no klia tumas long tok inglis i paul olgeta. Na taim ol i singaut na askim em long tromoi long tok pisin liklik, susa ya i no wanbel. Em i kirap na tokim ol, niuspepa ya i stap long tok inglis olsem na mi tok inglis. Sapos yupela i no inap harim, wari bilong yupela. Olsem na mipela i tok....ritim Wantok Niuspepa - bilong wanem? Bilong wanem em i Niuspepa bilong yumi ol PNGstret!

Bikpela luksave i mas go long ol lain bilong OISCA long Rabaul husat i save skulim ol manmeri long wok didiman, groim kaikai, mekim gaden na lukautim ol kain kain abus. Ol dispela lain i wok long givim bikpela save i go long ol liklik fama. Dispela helpim i ken strongim wok agrikalsa insait long ol liklik ples bilong yumi. Yu ken ritim moa long pes 8 na lukim ol piksa long pes 18.

Tupela bikpela samting i bin kamap long Tunde. Palamen i bin sindaun na sambai long lukluk long baset bilong neks yia, na ol hos i bin ron long bikpela hos resis, Melbourne Kap.

Ol niusman i sanap wetim palamen long stat long 2 kilok long apinun na ol i kirap nogut long lukim spika bilong palamen i tait i kam ausait. Taim ol i askim, em i tok em i go lukim ol hos i ron pastaim. Ol niusman i paul olgeta...dispela hos resis i stap long wanpela arapela kantri olgeta, tasol mipela i ken

PABLIK NOTIS HIH INSURANCE (PNG) LTD

Ol Dairekta blong HIH Insurance (PNG) Limited ("HIH PNG") (pastaim ol i save kolim MBf Assurance Limited na FAI Insurance (PNG) Limited) i laik toksave olsem Kampani i no mo ronim insurens bisnis na i klostu nau long pinisim ol wok blong em insait long PNG. Olsem tasol, HIH PNG (wantaim MBf Assurance Limited na FAI Insurance (PNG) Limited) i askim sapos husait man o meri i bilip olsem em i gat kleim we kampani i no stretim yet, orait em i mas salim kleim o wari blong em i kam long dispela adres; HIH Insurance (PNG) Limited, Level 2, Mogoru Moto Building, Champion Parade, Port Moresby, P O Box 507, Port Moresby o long Fax namba 321 2780 o long email kpmgpng@kpmg.com.pg.

HIH PNG i laik tok klia olsem dispela toksave em blong ol general insurens na wokus kompensesen kleim tasol na ino karamapim ol laip insurens kleim na polici aninit long laip insurens bisnis blong HIH PNG. Sapos wanpela man o meri igat kleim o wari long laip insurens polici o seavings blong em orait em i mas go lukim ol salim pas long Workers Mutual Insurance (PNG) Limited, Gabaka Street, Gordons, P O Box 292, Jacksons, National Capital District o salim fex long 323 2992 o ringim telepon 323 2929.

Bod of Dairektas blong HIH PNG i autoraisim



P O Box 507
Port Moresby
Tel: 321 20 22
Fax: 321 2780
email: kpmgpng@kpmg.com.pg

Hap Hap Nius

NFA helpim ol meri

NATIONAL Fisheries Authority (NFA) i helpim ol meri bilong Tigak ailans long Kavieng insait long Nu Ailan wantaim ol mat bilong silipim ol pis na arapela abus bilong solwara taim ol i salim. Ol dispela mat, ol meri bilong ol ailan i stap ausait tasol long Kavieng taun i save kam na salim long maket long Bagait. Ol mat bai helpim ol meri bai ol maket kaikai bilong ol i noken bagarap o karim ol kain kain binatang nogut. Dispela helpim i kam aninit long Kostel Piseris Menesmen na Developmen projek bilong NFA na Asian Development Bank.

NICCI redi

NU AILAN Semba ov Komes na Industri (NICCI) i redi long kisim moa bisnis long Lihir long joinim ol. Nu Ailan Semba ov Komes na Industri em i wanpela komiti we ol mausman bilong ol bikpela bisnis insait long provins i save sindaun na bung taim ol i paitim toktok wantaim provinsel gavman long luksave long ol bisnis taim ol i mekim ol disisen bilong ol. Nau yet NICCI i gat 40 memba, na ol i lukluk long kisim moa i kam long Lihir ailan. Komyuniti mausman long Nu Ailan provinsel asembli, Elias Salot i tok em i lukluk long kisim moa long 20 bisnis long stap long NICCI.

Manus i go pas long pait agensim sik AIDS

Pahun Maisan i raitim

WANPELA meri husat i bin gat sik AIDS na bin dai 4-pela wik i go pinis i tok olsem bipo long em i mas i dai, em mas givim dispela sik i go long 150 manmeri.

Provinsel Edministreta bilong Manus provins, Wep Kanawi, i tok dispela meri husat i klostu long dai i bin tokaut olsem em i bin givim dispela sik nogut long 150 manmeri.

Mista Kanawi i tok nau yet ol i no save sapos toktok bilong dispela meri i tru or nogat.

Bikpela wok nau em i bilong pait agensim sik AIDS insait long provins yet. Mista Kanawi i tok olsem 28 manmeri i bin dai pinis long dispela sik nogut na i gat planti moa i stap. Ol dispela lain tasol husat i kam long haus sik long sekap i soim olsem 14 manmeri i karim dispela sik nogut.

AIDS aweanes program insait long Manus

provins i stat pinis long tupela ples - Derimbat long Not Kos na Lundret long bikpela ailan Manus.

Dispela program em bilong yut bai helpim yut, mama helpim mama, politisen helpim politisen we bai i lukim ol pipel i gat wankain save na bai ol i ken kila long dispela sik nogut.

Yuropien Union (EU) i amamas tu long givim samting olsem K30,000 aninit long Seksual Helt Program long helpim Manus Provins long HIV/AIDS awenes program bilong em.

Mista Kanawi tu i statim pinis tupela arapela program insait long provins. Dispela em i bensin saplai program na kaikai saplai program. Dispela tupela program i bikpela samting tru bilong wanem Manus provins i stap longwe long ol bikpela saplai taun bilong PNG. Na tu prais bilong ol Fuel na kaikai long Manus i bikpela tumas.

Rais saplai program i bin stat bihain long wan-

pela wok painimaut i kamap insait long Manus i painim aut olsem i bin gat kainkain ol binatang nogut insait long ol rais i kam long ovasis.

"Taim ol i kukim ol rais ol i painimaut olsem i gat kainkain pipia na samting we i no kamap wantaim rais we ol i ken bagarapim bodi bilong ol manmeri," Mista Kanawi i tok.

Manus provins i gat samting olsem 300 liklik rais fama. Dispela ol rais fama i planim rais bilong ol yet long kaikai.

Minista bilong Agrikalsa i givim pinis tupela rais mil masin long dispela 300 fama.

Nau yet dispela rais saplai program em i ten yia program bilong helpim ol rais groa yet na bai kam aninit long kaikai saplai program.

Kaikai saplai na bensin program em Mista Kanawi yet i kamapim long developim kaikai na bensin sekuriti long taim bilong sot.



Wok Rais...Tupela man i sekim rais fil long OISCA Eko-Tek Senta long Rabaul, Is Nu Briten provins. Wapela non gavman ogenaiesen bilong ol Japan we i save kamapim gutpela wok long sait bilong agrikalsa na lainim planti ol manmeri. Foto: WILLIAM NATERA

Kopi i ken strong long Is Nu Briten

KOPI i ken kamap strong insait long Is Nu Briten provins sapos ol kopi fama long hap i kisim helpim na sapot.

Siaman bilong Is Nu Briten Provinsel Dipatmen bilong Praimeri Industri na Laipstok Piseris na Fores, Eremam Yarengi bin tokaut long dispela long sindaun bilong Is Nu Briten Provinsel Asembli long mun Septemba.

Mista Yarengi tok sapos ol fama i groim kopi long Is Nu Briten tude i kisim helpim na sapot bilong gavman, kopi bai i ken kam samting olsem K19 milien bilong provins insait long wan wan yia.

Em i singaut long samting olsem 2400 lokol fama long groim kopi.

Em i tok wanwan long ol dispela fama i ken groim 2500 kopi olwai long wan wan hekta. Sapos wanwan fama i gat 2400 hekta long kopi, bai ol i ken mekim samting olsem 84,000 kilogram pasmen kopi long wan wan yia.

Yarengi tok i gat tupela kain kopi we ol fama i ken groim Robusta na Arabica. Tupela wantaim i ken gro long Is Nu Briten.

Em i tok sampela ples insait long provins we ol i mekim olsem em i gupela long groim kopi em Lassul Baining, Sentral Gazelle, Toma-Vunadidir, Siniyt, Sentral Pomio na Wes Pomio.



Ol vanilla fama bilong Namatanai kisim trening

WANPELA wan-wik trening bilong ol vanilla fama long Namatanai long Nu Ailan provins i kamap long dispela wik.

Ol vanilla groa bilong Konoagil na Tanir Lokol Level Gavman insait long Namatanai distrik long Nu Ailan i kisim helpim long Siar Youth Development (SYDEV), wapela lokol non-gavman ogenaiesen husat i wok long karimaut dispela trening long Siar ples insait long wod 7 bilong Konoagil Lokol Level Gavman.

SYDEV i bin askim wan wan long olgeta 17 wod insait long Konoagil LLG long salim tupela manmeri long makim ol long dispela trening.

Mista Cunibert Tibil, wapela Vanilla Trena na Distrik Rurel Developmen Opisa bilong Kavieng i go pas long dispela trening.

Siar Youth Development Kodineta Patrick Topital i tok mani bilong dis-

pela trening kos i kam long AusAID, Nu Ailan Provinsel Gavman na ol ples we SYDEV i save kisim helpim mani long en.

Dispela trening kos em i namba wan kos bilong ol vanilla groa long dispela tupela hap.

Mista Topital i tok dispela kos em i namba wan vanilla trening kos we SYDEV i kamapim long dispela tupela hap, na i gat program i stap long karimaut dispela trening bilong ol liklik bisnis manmeri long kaikai na stap hefti.

New Ireland Vanilla Growers Association husat i save kisim sapot bilong Nu Ailan provinsel gavman, i makim vanilla trening bilong ol fama long taim bilong ol skul i malolo bai ol i ken yusim ol skul ples bilong karimaut dispela trening.

Dispela kain trening i ken helpim ol fama long mekim gut wok bilong ol na kisim gutpela sindaun.

Maunten paia

...Tasol bikpela tes bai kamap yet

Christina Tony na Pahun Maisan i raitim

MASKI maunten i paia long Manam Ailan ol gret 8 sumatin long Bieng na Tabele praimeri skul bai mekim yet nesenel eksem bilong ol.

Taim maunten i paia klostu long tupela wik nau, ol bod ov menesmen bilong tupela skul i bin pasim skul.

Moa long 2000 famili long Manam Ailan i painim hevi taim maunten i pairap na salim das na hotpela ston i kamaut.

Long dispela bagarap i nogat wanpela man o meri i dai. Tasol hevi i kamap long sait bilong gaden kaikai, wara na ol kes krop olsem vanilla na kakao. Das inap long 4 na 6 sentimita i karamapim

ol haus long Bieng Katolik misin stesin na ol haus long Kuluguma, Boda, na Baliu.

Paris Pris bilong Bieng Pater Frank Zuccolo i tok olsem ol manmeri bilong boda, Kuluguma na sampela hap bilong Baliu bai i nogat kaikai.

"I nogat bikpela hevi long sait bilong wara, tasol gavman mas tingim ol manmeri long rais, flaua, oil, tin kaikai na sel haus bilip slip", Pater. Zuccolo i tok

Long las wik Trinde sip MV labu i kisim ol kago i go long Boda na Kuluguma. Ol dispela kago i kam long Madang Edministresen na Provinset Disasta na Imejensi Sevis.

Dairekta bilong Provinset Disasta na Imejensi Sevis Peter Laida i tok olsem "Long dispela saplai ol i karim 20 lita wara tasol i go.

"Bihain long Sarere MV labu i karim 600 bek rais i go long Manam."

Em i tok moa olsem Red Cross Madang i givim 100 wara kontena i go long helpim ol lain i kisim bagarap.

Wenge tok Sepik tasol holim olgeta wok

GAVANA bilong Morobe Luther Wenge i no amamas long Praim Minista Sir Michael Somare i wok long sindaun antap long sia bilong Deputi Praim Minista na askim em long tokaut sapos em bai makim wanpela lida long kisim dispela sia.

Long palamen long aste, Mista Wenge i tok i luk olsem olgeta bikpela wok em bilong ol Sepik tasol.

Em i tok yupela bilong Sepik na yu holim sia bilong Praim Minista na Sepik gen i holim sia bilong Deputi

Praim Minista we yu yet i lukautim.

Mista Wenge i abrus long tok Sepik tu i holim wok bilong lida bilong Gavman Bisnis.

Tasol memba bilong Telefomin Atimeng Buhupe i tok Mista Wenge em longpela taim lida bilong Morobe na siaman bilong olgeta Momase lidas konfrens na em i abrus tru long bungim memba bilong Vanimo Grin Patrick Pruaitch wantaim Sepik. Em i tok em i bilong Sandaun provins na em i no olsem Sepik.

Hap Hap Nius

Ol kaikai i bagarap long Manam

Moa long 200 manmeri long Manam ailan i kisim taim na i mas gat helpim wantaim ol kaikai na ol samting bilong helpim ol nau. Ol ples olsem Kuluguma, Boda, Bieng Katolik Misin stesin, Yassa na Baliu i kisim bikpela bagarap taim maunten paia o volkeno i bin pairap long las wik Sande we i bagarapim na kukim planti kaikai na ol samting long gaden na tu long ol haus na ol samting. Ripot i kam olsem planti manmeri i nogat kaikai na i kisim taim long dispela bagarap bilong maunten paia. Olsem na ol helpim na sapot i kam long gavman o husat grup i mas ol samting olsem rais, flawa, oil na ol tin kaikai na tu ol sel bilong taitim long ol manmeri i slip na stap long en. Dispela hevi i no bin nogut tru olsem dispela we i bin kamap sampela yia i go pinis.

Ol elementri tisa laik straik

OL ELEMENTRI skul tisa long Lae i tokaut long ol bai lusim wok bilong ol sapos Gavman i no stre-tim potnait pe bilong ol.

Ol dispela tisa i bin autim bel hevi bilong ol long wanpela bung ol i holim wantaim PNG Tisas Asosiesen Momase Rijnol seketeri Arnold Kondil long las Fraide.

Planti tisa i tok dispela potnait pe bilong ol we ol i no kisim i bin longpela taim mak olsem 5-pela kris-mas nau.

Mak olsem 300 elementeri skul tisa i tok ol bai lusim wok bilong ol sapos Edukesen Dipatmen i no lukluk insait long dispela hevi bilong ol na stretim

bikos em i longpela taim nau na nogat samting i kamap yet. Ol i raitim wanpela pas o petisen na autim dispela hevi bilong ol.

Tasol Mista Kondil i askim ol long soim olgeta rekot na ol pepa we i soim dispela hevi bilong ol bai i gat gutpela as long strongim dispela wari bilong ol. Em i laikim ol dispela rekot na pepa long soim long opis i go pas long hevi bilong ol tisa insait long kantri.

Tasol em i sapotim toktok na wari bilong ol olsem ol elementeri tisa i no save kisim gutpela luksave. Ol i save lukim ol olsem liklik level na no save harim wari bilong ol hariap inap dispela kain hevi i

bung i kam na kamap bikpela.

Em i tok ol dispela tisa em ol wokman bilong Gavman na ol i bin mekim bikpela i kam long sevim kantri inap nau.

Tasol Gavman i no luksave long ol na harim wari bilong ol hariap long sait bilong peim ol hariap bihainim taim stret.

Mista Kundil i tok wok bilong ol elementeri skul tisa em bikpela samting long dispela kantri long wok bilong skulim na givim save long ol liklik pikini-bilong mipela olsem na dispela kain wari na hevi bilong ol em Gavman i mas hariap long lukim na stretim.

Gaubin Komyuniti Helt Wokas Skul bai i no inap long pas

Michael Novingu i raitim

GAUBIN Helt Wokas Skul insait long Madang i bin singaut i go long Gavman long helpim ol long ronim dispela skul long wanem skul i nogat inap mani long ranim wok bilong ol long dispela yia. Sapos i nogat mani long ranim dispela skul bai mipela i pasim dispela skul.

Tasol dispela singaut bilong ol i pundaun long gutpela yau bilong ol Helt Atoriti long Madang. Edvaise bilong Helt Sevis long Madang provins Mista Marcus Kachau i tokim *Wantok Niuspepa* olsem em i askim pinis ol atoriti bilong Gaubin Komyuniti Helt Wokas skul long givim em baset bilong ronim skul na em bai tra'im long lukluk long helpim dispela skul.

Dispela em i wanpela bikpela na olpela skul insait long kantri i kamapim ol sampela gutpela komyuniti helt wokmanmeri we ol i helpim mipela long givim bikpela sevis i go long ol pipel insait long planti ol asples insait long Madang na tu ol arapela hap bilong dispela kantri. Sapos mipela i no lukautim gut dispela skul mipela bai sot long ol komyuniti helt wokas Mista Kachau i tok.

Long wankain taim Mista Kachau i tok dispela sik nogut HIV AIDS namba bilong em long Madang provins i wok long go antap. Long 2003 Septemba ripot i soim olsem i gat 43 namba bilong ol manmeri i gat sik HIV AIDS insait long Madang provins. Tasol long dispela yia 2004 namba i kalap i go antap 100 pesen we i soim 80 manmeri insait long Madang provins i stap wantaim dispela sik.

Ol Helt Atoriti na Provinset AIDS Komiti insait long Madang provins i wari tru long wanem namba bilong

dispela sik nogut HIV AIDS i wok long i go antap moa.

Mista Kachau i singaut strong i go long ol manmeri long lukautim ol yet. I noken slip wantaim manmeri we yu no save long em. Yu mas slip wantaim manmeri we yutupela i marit tasol long em.

I nogat banis bilong abrusim dispela sik. Wanpela banis tasol em yusim gumi o karamap tasol dispela i no inap helpim o banisim gut tumas maski yu laik yusim gut taim yu laik slip wantaim man o meri.

Mista Kachau i tok i gat 16 volandia kaunseling tes tim i stap insait long haus sik na sapos yu husat manmeri i bilip olsem yu i gat dispela sik HIV AIDS yu welkam long lukim ol na bai ol i sekim yu na givim yu sampela gutpela toktok long stiaim yu long sindaun bilong yu.

Em i tok kempein na aweanes long stopim dispela sik mipela i karima'ut gut stat long taun na i go daun long ol lain long ples stret. Plis yupela i mas kisim na bihainim long wanem i nogat marasin bilong stopim dispela sik long Madang na PNG tu.

Singaut strong i go long ol manmeri long lukautim ol yet. I noken slip wantaim manmeri we yu no save long em. Yu mas slip wantaim manmeri we yutupela i marit tasol long em.



BANK OF PAPUA NEW GUINEA

PRESS RELEASE

KINA FACILITY RATE FOR NOVEMBER 2004

The public is advised that based on the key macroeconomic indicators available to the Bank of Papua New Guinea, the Kina Facility Rate (KFR) will remain unchanged at 7.00 percent for the month of November 2004.

L. Wilson Kamit, CBE
Governor

Hap Hap Nius

Gutpela wok

HAILANS Divisenel Polis Komanda na Asisten Polis Komisina Jeffrey Vaki i tok amamas long Deputi gavana bilong Western Hailans Wai Rapa long pasin em i wokim long givim tupela wan pisin bilong em i go long han bilong polis. Tupela i bin wokim stil pasin. Ol bin stilim wanpela Toyota Lenkrusa i op long baksait na rausim ol hap hao bilong em na salim. Ka em i bilong Buiyebi Koreksenei Sevis long Sauten Hailans provins. Dispela em wanpela ka tasol we Buiyebi Koreksenei Sevis we etministresen i save yusim long karimaut ol wok bilong em. Mista Rapa i bin givim bek tu wanpela pistol we tupela saspek i bin yusim long karimaut holap.

Nupela klasrum

EMBASEDA bilong Japan long Papua Niugini H.E. Katsuo Yamashita i bin opim tripela dabol klasrum long Sapos komyuniti skul long Enga provins long las wik Fonde. Dispela open de i bin kamap long Sapos Komyuniti skul yet. Long Septemba 2003, Gavman bilong Japan i bin givim helpim mani olsem (US\$ 81'747). Klostu olsem K272'000. Helpim mani i bin kam aninit long Grassroots Assistance Programme (GGP). Dispela i bin kamap bihain long Mista Yamashita na Sapos Skul Bod David Yakka i bin sainim kontrak long Pot Mosbi. Dispela projek mani i bin helpim long wokim tripela nupela dabol klasrum. Gavman bilong Japan i save makim Edukesen, olsem wanpela bikpela eria insait long developmen plen bilong em long Papua Niugini. Dispela helpim long Sapos komyuniti skul i soim sapot bilong Japan long helpim human risos insait long PNG. Gavman bilong Japan i bilip ol sapot long em bai helpim ol ples lain na komyuniti grup. Dispela helpim i soim gutpela wok namel long Gavman bilong Japan na Papua Niugini. Gavman bilong Japan i save givim planti helpim long PNG long planti kainkain we na i save helpim sindaun bilong ol manmeri.

Hagen Sekenderi kisim helpim long EU

Desney Koimo i raitim

YUROIPIEN Yunien (EU) i givim moa long K5.1 millien i go long Mt Hagen Sekenderi Skul long helpim ol wokim mentenens na kirapim sampela moa nupela klasrum bilong mekim skul i ron gut.

Dispela mani em European Yunien i givim i go long Pasifik Arkitek Konsotium long disainim na Boinamo Konstraksen husat i karimaut wok bilong bildim ol klasrum.

Long wanpela bung bilong senisim han long givim dispela ol klasrum i go long Dipatmen bilong Edukesen insait long Western Hailans provins, Minista bilong Edukesen, Michael Laimo, i tok

tenkyu i go long Mista Crasner bilong EU long luk-save na helpim ol pipel bilong Western Hailans provins.

Mista Laimo i tok Mt Hagen Sekenderi Skul i laki long kisim helpim long EU tasol ol pipel i mas save olsem ol risos bilong ol dona ejensi na gavman tu i sot na em i taim nau long ol i mas sanap long lek bilong ol yet na wokim wok.

"Dispela rot bilong developim edukesen insait long kantri long las 10-pela yia bilong reform bai i no inap kamap sapos ol dona ejensi i no bin givim sapot na em i taim nau we mipela yet i mas wokim wok olsem bai mipela lukautim ol hanwok bilong mipela", em i tok.

Mista Laimo i tok ol sumatin na komyuniti i mas igat pasin bilong wok bung wantaim we ol i ken stap wanbel na noken stilim ol samting bilong skul.

Em i askim ol papa graun tu long noken kamapim birua insait long skul bikos Mt Hagen Sekenderi i wanpela bilong ol top 50 skul insait long kantri na tu dispela ol klasrum bai i stap long ol bihain taim pikinini long yusim.


Long pinisim toktok bilong em, Mista Laimo i putim salens i go long ol papamama na komyuniti long lukautim gut dispela sevis we ol i laki lain long kisim.

Ol sevis bai helpim ol na ol pikinini bilong ol, em i tok.

Porgera-Paiela gat nupela pater



Poto long lephan i soim Pater Elias, sanap namba 2 long rait, i sanap wantaim sampela lain bilong em na papa bilong em, husat i sanap namba 1 long rait klostu long em. Papa na pikinini wantaim i pilim bikpela amamas long dispela de.



Poto long rait i soim papa na pikinini gen long planti krismas i go bek. Papa i sindaun, na pikinini i sanap long rait han tru. Longpela rot tru tupela i bin wokabaut long kamap long mak we ol i stap long en nau. Tasol i kamap bilong dispela wokabaut i swit tumas.



BIKPELA amamas tru i bin kamap long Porgera-Paiela Katolik Peris insait long Enga provins las wik taim wanpela pikinini man bilong ol likamap pater.

Long Oktoba 27 ol manmeri bilong Porgera-Paiela peris long Wabag diosis i bin amamas long selebretim ordinesen bilong Elias Aiyako SVD. Pater Elias em i namba wan Katolik man bilong Porgera-Paiela i kamap

pris.

Ples Porgera i gat nem long gol na PJV mining, tasol long Oktoba 27 ol lain Katolik na planti manmeri bilong ol arapela sios tu i bin larim gol i stap na ol i bin bung long peris stesin long Mungalep. Bisop Douglas Young SVD i bin go pas long givim sakramen bilong ordo long Elias, na tupela bisop bilong Wabag diosis, Bisop Hermann Raich na Bishop Arnold

Orowae, tupela i bin stap wantaim.

Samting olsem 2,000 manmeri i bin stap - ol manmeri na pikinini bilong Porgera na Paiela, tasol planti manmeri bilong ol arapela hap bilong Enga na bilong Hagen, Simbu na Southern Hailans.

Long ordinesen seremoni i bin gat sampela spesel mak bilong Elias i kamap misinari pris. Em bin rausim su bilong em na sanap lek nating, na

bihain long ordinesen em bin wasim lek bilong sampela manmeri.

Em tupela mak bilong em i no laik stap bikman. Em laik stap pris bilong helpim na sevim ol pipel.

Pater Elias bai lusim PNG na go wok misin long ol Caribbean Ailans namel long Nord na Sud Amerika.

Stori na poto - Fr Phillip Gibbs

Wollom winim bai ileksen

Pahun Maisan na Christina Tony i raitim

VOTING long Mosbi Not Is bai-ileksen i bin go het gut tru las wik. Dispela i bin lukim nupela memba bilong Mosbi Not-Is, Casper Wollom, i go bek insait long palaman.

Planti manmeri insait long Godens, Erima na 6-Mail i go inap long 9 Mail i bin vot long Mande, 26 Oktoba, long painim nupela memba bihain long kot i bin rausim siting memba, Mista Wollom.

Insait long 2002 Nesenel Ilekse Mista Wollom i bin win wantaim 4626 vot. Man husat i bin kam bihain long em em Phillip Taku wantaim 3568 vot. David Unagi i bin kamap namba tri wantaim 3479 vot.

Long 2002 Nesenel Ilekse Mosbi Not Is ilektoret i no bin go gut bihain long bikipela kros i bin kamap. Ol skrutinia o sapota bilong ol wanwan kendidet husat i save sanap long ol hap bilong vot na kauning na was, i bin kros taim tupela boks vot i bin kam long narapela hap na i go insait long tali rum long kaunim. Planti askim i bin kamap long dispela tupela bokis. Na tu long dispela ileksen toktok i bin

kamap olsem i bin gat planti paul pasin tumas.

Mista Unagi i bin kisim Mista Wollom i go long kot na kot i rausim Mista Wollom. Kot i bin painimaut olsem i bin gat sampela paul pasin insait long dispela tupela bokis we i kam leit long tali rum.

Tasol long Mande 10:21pm Ritening opisa o man bilong tok aut long ol vot Rex Sabin i tokaut olsem Mista Wollom i winim bek sit bilong Mosbi Not Is.

"Em i laik bilong ol pipel na mi winim bek dispela sit. Ol jas i givim mi tok orait na mi kambek wantaim laik bilong ol pipol," Mista Wollom i tok.

Pait namel long Mista Wollom, memba bilong Pipels Nesenel Kongres, na Indipenden Kendidet Mista Unagi long winim dispela sit i wanpela stronpela pait tru.

"Dispela em wanpela stronpela pait tru. Mi no bin harim yet olsem i bin gat wanpela dispela kain LPV bai-ileksen," leksera bilong Yunivesiti bilong Papua Niugini (UPNG) long Pablik Polisi na Menegmen Lawrence Sause i tok.

Long dei tu bilong kauntim ol vot, Mista Unagi i bin go pas wantaim 2200 vot na Mista Wollom i kam

bihain wantaim 1997 vot. Long dispela taim ol man i kauntim pinis 12500 vot na mak bilong 30267 manmeri i bin vot.

Biahin long 5-pela de bilong kaunt 7-pela man tasol i stap long dispela resis. Mak bilong 15-pela man i bin raus long dispela taim bilong wanem ol i no bin gat inap vot long go het.

Mista Unagi i bin stap fran yet wantaim 5558 vot. Mista Wollom i kam bihain long em wantaim 5298 vot.

Ol narapela 5-pela man bin John Kelowa wantaim 3951 vot, Mista Taku wantaim 3255 vot, Wari Vete wantaim 2964, Norman Walter Fernandes wantaim 2891 na John Kaupa wantaim 2536 vot. Ritening opisa Mista Sabin i no inap long tokaut yet long dispela taim husat bai winim dispela resis.

Tasol long laspela de bilong kaut, Mande 1 Novemba, bikipela senis i bin kamap taim Mista Fernandes i bin raus long resis na ol i serim 1371 vot bilong em namel long Mista Wollom na Mista Unagi. Dispela i lukim Mista Wollom win wantaim 8271 vot na Mista Unagi i kam bihain wantaim 8090 vot.

PNG kisim taunam bet projek

PAPUA Niugini em nambawan kantri long wol long kism wanpela "bed net" o taunam bet projek.

Dispela em long helpim yumi long pait wantaim sik malaria na filariasis.

Austrelien Doktas Intanesenel (ADI) bai putim dispela taunam bet projek long Nomadaria long Not Flai Distrik.

Dispela program bai lukim olsem tri tons taunam bet na marasin bilong filariasis i golong ol pipel.

PNG Sastanabol Developmen Program Limited (PNG SDP) i sainim wanpela tok orait wantaim ol ADI long putim K247000 i go insait long dispela projek.

Dispela tok orait i kama las Fraide namel long Sief Eksekutiv Opisa bilong PNG SDP Robert Igara na ADI Tresera George McLelland.



Iwaisi...Long tok ples Misima olsem stail. Miss Milen Be 2003, Miss Helen Stephens, i soim kala na kalsa bilong Misima, long fainel nait bilong Miss PNG Resis bilong Red Cross las yia.

Hap Hap Nius

Stat rausim ol marasin

Ol spesolis bilong Envairomen na Konsevesen Dipatmen na Maining Dipatmen i helpim Misima Main long rausim ol marasin bilong main. Placer Dome, PNG regulatas na ol saveman bilong Australia i wok tu long dispela program. "Mipela i yusim wanpela wei we planti man long wol i save yusim long rausim gut ol marasin olsem sianaid," Seketeri bilong Envairomen na Konsevesen Dokta Wari lamo i tok. Ol papagraun bilong Misima i save tu long wanwm samting i woklong kamap long ples bilong ol. "Ol papagraun mas save tu olsem wanem samtin mipela mekim i sef na bai i no inap bagarapim ples na ol gaden kaikai bilong ol," Misima Main Limited sastenebol supiritenden i tok.

Ol kalabusman surik

Ol kalabusman bilong Kerema i move i go long Bomana ples kalabus bihain long wara pinis long tupela wara tenk bilong ol. Provinsel Polis Komanda Albert Korin i otk olsem ol i movim 12-pela kalabusman long las wik taim ol i painimhat long lukautim ol moa. "Narapela as bilong dispela sotlong wara em dispela drai sisen long provins," Komanda Korin i tok. Em i tok tu olsem ol kalabusman bai stap long Bomana sapos ren i no pundaun long provins.

Trust a Genuine Brand



YAMAHA

PORTABLE GENERATOR

ADVANTAGE

- ✓ HIGH POWER OUTPUT
- ✓ LOW NOISE LEVEL
- ✓ RELIABLE & DURABILITY
- ✓ PARTS & SERVICE BACKUP
- ✓ BUILT WITH YAMAHA JAPAN ADVANCE TECHNOLOGY

Ela Motors

WAS K1,665.00

NOW

K999

INCLUDES GST

AVAILABLE NATIONWIDE

OFFER EXPIRES : 30.11.2004.




FOR MORE INFORMATION CONTACT : JAMES MOVEH - PH 3229400 FAX 3217268 • PORT MORESBY • Email : jmoveh@elamotors.com.pg

Helpim bilong Japan

Raun bilong Embesi bilong Japan na Japanis Intanesenel Koperesen Ejensi long lukim ol Smol Holda Rais Promosen Projek long Madang na Rabaul.

Ol stori na poto
- William Natera

Toksave - Embesi bilong Japan i bin baim tiket bilong ron long balus, ples bilong stap, kaikai, na givim mani long ol lain nius ripota husat i bin raun wantaim ol long lukim ol dispela wok projek.



OGENAISESEN bilong Industri, Spiritsuel na Kalsarel Advansmen (OISCA), Embesi bilong Japan, na Japanis Intanesenel Koperesen Ejensi, i bin lukim gredusen bilong manmeri husat i bin stap insait long JICA-NDAL (Nesenei Dipatmen bilong Agrikalsa na Laipstok) Sot Tem Rais Fama Prodaksen Trening Kos.

Ol bikman bilong ol wanwan ogenaiesen husat i bin toktok long dispela bung, olsem Dairekta bilong OISCA, Michikatsu Ehara, JICA mausman, Embesi mausman, Izumikawa Naohito, na NDAL Projek Menesa, Brown Konabe, i bin tok strong long ol dispela manmeri long yusim save bilong ol gut.

Ol manmeri i kam long Momase rijon we rais program i wok long ron long en.

Ol poto long pes 18.

Rais projek i ron gut

INSAIT long 4-pela krismas Madang provins i kamapim 124.8 tans (tonnes) bilong rais aninit long Smol Holda Rais Promosen Projek.

As bilong dispela projek em long bekim laikim bilong ol fama long kamapim rais ol yet long kaikai ol yet, olsem ol narapela kaikai olsem yam, taro na banana, long daunim mani ol i save peim long rais na long helpim ol long taim bilong kaikai i save sot long ol rurel hap.

Aninit long dispela projek ol fama i mas kisim ol skul long save long ol we bilong wok wantaim rais.

Gavman bilong Papua Niugini i wok bung wantaim Gavman bilong Japan long ronim dispela projek.

Ol ejensi we i wok bung wantaim long ronim dispela projek em Dipatmen bilong Agrikalsa na Laipstok (DAL), Fud Sekyuriti Han bilong DAL, ol Provinsel DAL long olgeta 3-pela provins we dispela projek i wok long ron long en, Madang, East Sepik na Morobe, na Japanis Intanesenel Koperesen Ejensi (JICA, tok olsem jaika) - hap han bilong Gavman bilong Japan we i wok aninit long Embesi bilong Japan long kamapim ol wok projek.

Long Madang dispela projek i wok long ron gut tru na namba mak bilong ol tan rais we ol fama i wok long kamapim olgeta krismas i wok long i go antap.

Long 2000 ol i bin milim (putim long masin bilong brukim rais we ol i rausim long graun bihain long em i redi na mekim kamap long mak we ol manmeri i save baim long stua) 5.0 tans bilong rais. 2001, 15.8 tans. 2002, 41 tans na 2003, 63 tans.

Ol lokel fama yet i save groim dispela rais bihain long ol i skul long en.

Sampela i save kisim dispela skul long OISCA Eco-Tek Trening Senta long Rabaul, Is Nu Briten provins.

Planti bilong ol em ol manmeri we

ol Fud Sekyuriti Han, Provinsel DAL, ol institusen, olsem Koreksenenel Sevis (CS) o ol skul i makim, long i go na kisim dispela save na kamap olsem model fama, o fama we bai soim piksa long ol narapela fama long ples long ol we bilong planim rais we em i bin lainim.

Ol narapela fama em ol kontek fama, ol dispela husat i stap long ples na lainim long ol model fama.

Wok bilong model fama tu em long karimaut aweanes bilong rais long ol manmeri long ples we em i stap long en, tilim ol pikinini kiau o sid bilong rais i go long ol bipo na nupela fama, wok bung wantaim Lokel Level Gavman (LLG) na ol Distrik Rais Opisa long mekim plen bilong wok bilong rais, mekim ripot na givim long LLG na ol Distrik Rais Opisa na go pas long stretim ol wok bilong miling.

Peter Kaimu, namba wan model fama bilong provins nau i gat planti ol kontek fama tru husat em i save helpim. (Lukim stori bilong Mista Kaiam long narapela Wantok Niuspepa.)

Mista Kaimu i save groim ol kainkain rais. Ol sid bilong dispela ol rais em i save kisim long ol provinsel opisa bilong DAL.

Em i save yusim fam o gaden bilong em long soim ol narapela fama long ol we bilong groim rais.

Namba wan as bilong groim rais aninit long dispela projek em long ol fama na ol famili yet bilong ol long kaikai, sapos hap i stap orait ol i ken salim na mekim liklik mani long en.

Sampela bilong ol hap rais i stap yet, long Tok Inglis ol i save tok ekstra o seples rais, bilong Mista Kaimu, i bin go insait long ol paket bilong Magic Marasin Rais, tok olsem mejik marasin, rais ol Madang yet i save milim, putim insait long paket na salim.

I gat bikpela laikim bilong Magic



• Bikpela poto i soim Mista Kaimu i lukiuk long yangpela rais yet long gaden bilong em. Poto insait long lephan i soim Kaiam wantaim Tomonobu Ishiduka, wanpela Japanis Ovasis Koperesen Volantia bilong JICA husat i save wok bung wantaim Kaiam, wantaim rais bihain long ol i rausim long em i redi na ol i rausim long gaden. Poto insait long rait i soim rais we ol Madang yet i save milim, Magic Marasin, tok olsem mejik marasin. Sampela o rais bilong Kaimu i save bihainim rot i go long kamap insait long ol dispela paket rais, stua, na ol bel bilong ol manmeri husat i baim.

Marasin Rais namel long ol pipel bilong Madang na taim em i save i go long stua, em i save pinis hariap stret.

Gutpela wok bilong Madang Provinsel DAL i bin helpim long kamapim dispela nupela maket.

Long nau yet, taim i gat planti toktok long ol narapela rais we i stap long maket, laikim bilong Magic Marasin Rais i go antap na i winim namba we ol fama i ken groim na milim.

Tupela volantia i wok long wok klostu wantaim ol provinsel opisa bilong DAL na ol fama, na em Sinia

JICA Volantia, Masayuki Noda, na Junia Volantia Tomonobu Ishiduka.

Ol i gat bikpela save long ol we bilong planim rais na ol i wok long lainim ol fama gut.

Mista Noda i mekim ol kainkain hap masin long diwai we ol fama long ples i ken yusim long mekim liklik wok miling bilong ol yet na Mista Ishiduka i wok bung wantaim Mista Kaimu long traime groim ol kainkain rais.

Ol poto long pes 18.
Lukim moa stori neks wik.

OISCA kamapim gutpela wok

OGENAISESEN bilong Industri, Spiritsuel na Kalsarel Advansmen (OISCA), wanpela bikpela non-gavman ogenaiesen (NGO) bilong Japan i wok long kamapim ol bikpela na gutpela wok long Papua Niugini, moayet long sait bilong Agrikalsa, forestri na skul long envaironmen.

OISCA we i bin kamap long Oktoba 6, 1961, i stap long planti kantri, kain olsem Saina, Is Timor, Fiji, India,



• Ol rais fil bilong OISCA Eko-Tek Senta.

Indonesia, Malaysia, Myanmar, na Filipins.

OISCA i gat opis tu long Rabaul, Is Nu Briten provins, ol i kolim OISCA Eko-Tek Senta, we planti gutpela wok we planti manmeri i no save harim long en i save kamap.

OISCA, husat i save wok bung wantaim Embesi bilong Japan na Japanis Intanesenel Koperesen Ejensi (JICA) long skulim ol sumatin long ol we bilong faming, moayet long wanpela we ol i save kolim long Tok Inglis 'Life-Chain Farming Technology, Utilization of Farm Projects Bi Products'.

Dispela em i wanpela kain we bilong faming we i save yusim ol rabis bilong ol ol narapela man, animol o kaikai long fam long givim kaikai long ol lukautim narapela.

Em i long OISCA ol manmeri ol provinsel DAL o ol institusen o skul i save makim long lainim long rais, i save i go na stadi aninit long Smol Holda Rais Promosen Projek. Dispela i save kisim olsem wanpela mun.

Tasol OISCA i gat wanpela kos tu we i save kisim wanpela yia, we ol sumatin, planti husat i save i kam long ol wanwan ples bilong ol, i save skul long ol wok agrikalsa.

Long pinis bilong yia, sampela bilong ol, husat i mekim gut tru, bai i gat sans long i go long Japan na skul long hap gen.

Sampela i save kam bek na kamap long tisa long OISCA gen, na planti i save i go bek long ples bilong ol na kirapim ol wok bilong ol yet - as tru bilong wok bilong OISCA.

OISCA, Embesi bilong Japan na JICA i wok long i wok bung wantaim gut tru long kamapim ol bikpela wok we i wok



• Dispela i no kunai. Nogat. Em i rais we i gro stap long wanpela ol fil bilong OISCA Eko-Tek Senta. Senta i save groim ol narapela kaikai tu na lukautim ol pis, kakaruk, pik, bataflai na pukpuk. Lukim moa poto long pes 18.

Ol Bogenvil meri amamasim bel isi na sekyuriti de

Veronica Hatutasi
i raitim

OL MERI long Bogenvil i kari-maut ol wok redi long selebretim bikde ol i kolim long Women, Peace and Security wantaim Yunaited Nesens na wol.

Tasol ol bai laikim helpim wantaim manimak inap long K70,000 long kamapim ol wok redi na ol samting insait long dispela selebren.

Dispela em namba 4 anivesari bihain long Yunaited Nesens(UN) i bin givim luksave long wol i makim dispela de.

UN i givim luksave long dispela insait long Sata bilong em na Seksen 1325 we i gat Women, Peace and Security insait long em. Na em bin tok oraitim na luksave long en long 2000.

Bikpela samting we dispela selebren bai kamapim em long gutpela sindaun na sekan na bel isi pasin.

Siameri bilong WPS Bod em Elizabeth Momis i tok ol bai holim ol woksop na ol arapela samting i sut long dispela de we bai bungim ol meri wantaim long strongim wok bilong kamapim gutpela sindaun long gutpela bihain taim bilong Bogenvil.

Long las mun, ol meri i makim 15 ogenaisesen bilong ol emri long Bogenvil i bin bung na toktok long selebretim dispela namba 4 anivesari bilong WPS.

Bai i gat tripela kala long soim ol samting we ol, meri i wok strong long kamapim an em long yuniti na bel isi. Kala blu bai makim fleg



• Ol yangpela meri bilong Bana insait long sautwes Bogenvil i putim gutpela bilas na mekim save long danis i stap. Foto: ALOYSIUS LAUKAI

bilong Bogenvil, wait i makim pis na ret i makim wok bung wantaim long daunim sik HIV/AIDS.

Selebren bai kamap long tripela senta long provins. Ol meri long Not Bogenvil bai holim sele-

bren long Buka, ol Sentral long Arawa na ol Saut meri long Buin.

Dispela selebren bai luksave tu long wok ol meri Bogenvil i mekim long kamapim na strongim wok bilong painim gutpela sindaun na bel isi pasin.

Dispela em long taim Bogenvil hevi i bin stat long 1988, strongim moa yet long 1994 i kam inap nau.

Misis Momis i tok i gat bikpela wok long strongim wok bilong pis long Bogenvil.

Na wok bilong kamapim pis na bel isi pasin i mas stat long famili level i go antap long gavman.

UNIFEM em han bilong Yunaitet Nesens (UN) long PNG i go pas long WPS na em i wok wantaim Misis Momis na ol meri Bogenvil long redim ol samting bilong WPS anivesari selebren.

Nesenel Kodineta bilong UNIFEM long Mosbi, Margaret Loko i tok bikpela samting i tu long dispela de em long bungim wantaim ol meri husat i bin mekim bikpela wok long taim bilong Bogenvil hevi na ol bai serim ol eksperiens na promotim na strongim wok bilong pis.

Mis Loko i tok olgeta meri bai stap long dispela selebren na dispela em i wanpela rot tu we awenes bai kamap long wok UN i mekim long Bogenvil.

Em i tok ol meri Bogenvil i no save kisim pe long karimaut wok bilong pis tasol ol i strong long skruim wok bikos ol i laikim gutpela sindaun long aitan.

Ol bik manmeri husat i kisim askim long stap long dispela selebren em long Bogenvil Interim Provinsel gavman na etministresen, ol distrik manesa, ol Siaman bilong Kaunsel of Eldas, UN, sios lida, ol meri long No-Go-Zone na midia.

Mis Loko i tok selebren i bin sapos long kamap long las Fonde oktoba 28 inap long de namba 31 tasol bikos long hevi bilong mani, ol i surukim gen i go. De na taim em ol i no makim gen yet.

Em i tok bikos long mani hevi, ol bai holim selebren long wanpela de tasol.

Bisnis na Profesenel Wimens Klab bai holim fan resing

Veronica Hatutasi i raitim

BISNIS na Profesenel Wimens Klab (BPW) bai holim bikpela fan resing bilong ol long dispela mun long helpim skul bilong ol meri i save bungim hevi wantaim skul fi.

Presiden bilong BPW em Freda Talao i tok fan resing nait em ol i kolim long Gala Nait bai kamap long Fonde, Novemba 25 long Waigani Ats Tieta. Long dispela taim tu, bai i

gat so na taitel bilong en em "A Midsummer Nights Dream" we bai kamap long Waigani Ats Tieta yet. Bipo long So, bai i gat kaikai. Bai ol i salim ol dring long ba, rafel tiket, ol dua prais na oksen.

Pe bilong go insait long dispela fan resing em K60 tasol.

Mis Talao i tok dispela em wanpela bikpela fan resing we BPW i save wokim insait long wanpela yia na mani ol i bungim i go long skolasip fan we i save helpim ol yangpela

meri i bungim hevi long skul fi mani na ol i skruim skul bilong ol.

Ol meri i laikim sponsa long skul i save pulumapim fom na salim tu ol ripot long ol mak ol i kisim long skul. BPW i save glasim na skelim gut ol aplikesen bipo em i tokaut long husat em i tok oraitim long sponsaim. Husat long pablik i laikim tiket, ringim Freda Talao long telipon namba 325933 ekstensen 350. Feks em 3255535 o email long Freda talao@ausaid.gov.au.



14-20 Ol toktok i kam long Pablik Toksave pepa we Family and Sexual Violence Action Committee i redim.

Reip

Bai yumi mekim wanem long reip?

Reip em i pasia we man i josim o subim i man long wokim sampasin long taim man i no laik. Sapos man i putim sem bilong em long sem bilong meri, (maski sapos em i no subim i go insait olgeta), dispela em i reip. Maski meri i no pait, Planti meri i save pret long man i kilim ol na olsem, ol i no save pait o singaut. Em i reip sapos man i strong na i mekim sem pasin long meri taim meri i no laik maski sapos man i no kisim sampela bagarap long bodi bilong em. Dispela sem pasin man i mekim em i reip.

Mekimsave: Man i ken go kalabus inap em i dai

Planti man, bai sem i kalabus inap 5-pela o 7-pela yia. Tasol sapos em i bagarapim bodi bilong meri wantaim paip o gan o sapos planti man i bagarapim bodi bilong meri o sapos man i gaswet long dispela taim bai man i kalabus longpela taim moa.

Sapos planti man bagarapim meri (pak reip) bai wan wan man i kalabus 8-pela yia i go inap 16-pela yia.

Traim long Reip

Sapos man i traim long reipim meri na meri i strong na i jonawe o sapos nara-pela man i kamap na sevim meri ol i kolim dispela "atemptel reip" o "traim long reip".

Mekimsave: Man i ken kalabus inap 14 yia, anit long Kriminel Kod s 348.

Moa long neks wik.

Sotpela Lukaut Toktok

Skrulm Toktok long ol kaikai bilong ol skul pikinini Skul Kaikai Stoa

SAMPELA skul i gat kaikai stoa, ol pikinini i ken baim kaikai long en long belo. Tasol sampela kaikai stoa i save salim rabis kaikai olsem loliwara, sispop o twistis na ol swit kaikai, Painimaut pastaim wanem kain kaikai stoa i salim long ol skul.

Kaikai olsem senwis, sus, kuk pinat na frut i save stap long sampela kaikai stoa.

Sapos skul kaikai stoa i save salim rabis kaikai, orait askim het tisa long skul bilong yu long salim gutpela kaikai long ol pikinini i ken baim. Sapos i gat gutpela kaikai stoa, em i min olsem bai yu gat gutpela na amamams pikinini tu.

Moa long neks wik



Kuk Kona wantaim MERI WANTOK

NO FAIL SCONES

Yu mas i Gat

4 kap self reising flawa
1 na haf kap pauda milk
2 kaps bata o majarin
2 tebolspun beking pauda
haf tispun sol

We bilong Kukim

1- Siftim o sekim insait long kontena (sapos yu gat, yusim That's a Bowl Junior) na putim beking pauda na sol.
2-Rabim bata o majarin inap em i kamap gut.

3- Kapsaitim milk i go isi isi na tanim wantaim naip.

4-Presim skoim dou long Pestri sit wantaim finga na inapim long tri kwata mak.Noken yusim rola bilong rollim dou.

5-Katim skon wantaim skon kata we yu rabim wari-taim flawa.

6-Putim long beking trei, lainim klostu klostu wantaim

7-Bekim long hotpela oven inap long 10-pela minit.

Meri Wantok i laik save sapos yupela i save laikim ol stori mipela i save printim. Rait i kam long Meri Wantok, Word Publishing Company, PO Box 1982, Boroko, NCD o ring i kam long telipon 325 2500 na toktok long Veronica Hatutasi. Yu ken salim ol stori tu long email: word@global.net.pg

Salesian kongrikese sanapim sios

...helpim ol yut na strongim gutpela pasin

Veronica Hatutasi i raitim

OL SALESIAN Kongrikese long Pot Mosbi i wok long bildim wampela sapel o sios long strongim wok bilong painim gutpela na skul namel long ol yangpela na pipel long Papua Niugini.

Salesien em i wampela Katolik Misinari Oda na long PNG, ol i wok long sait bilong teknikel edukesen na ol yut. Na hap we ol i kamap strong long en em long ol Don Bosko Teknikel na Vokesenel skul long ol provins bilong Sentral, Is Nu Briten na Sandaun.

Ol dispela Don Bosko Teknikel Skul i wok long kisim planti yangpela skul manki na givim ol gutpela skul long sait bilong gutpela pasin na akademik eria.

Apostolik Nunsio bilong PNG na Solomon Ailan, Asbisop Adolfo Titi Yllana, i bin tokim Wantok Niuspepa olsem taim ol Salesian Misinari i wok long strongim teknikel na vokesenel skul long ol yangpela, ol i sanapim tu skul bilong kamapim bikipela laik na lotu long Mama Maria.

Dispela srain, sapel o sios o senta ol i laik sanapim em ol i putim i go long han

bilong Mama Maria na ol i kolim long "Our Lady help of Christians". Na ol Salesian bai yusim tu olsem yut senta bilong ol yut long kam bikos dispela srain em bai kamap tu olsem ples bilong pis, edukesen na solidarity o helpim wampela arapela.

Nunsio taim em i tok amamas long ol Salesien Misinari i bildim sapel long helpim ol yut, em i tok ol i sanapim tu faundesen o as bilong kirapim strongpela laik long Mama Maria namel long ol yut na komyuniti.

"Ol Don Bosko Salesien i gat luksave long wok namel long ol yangpela pipel na ol skul na ol fomesen senta. Nau ol i soim narapela bikipela wok long misin bilong ol," Nunsio i bin tok.

Em i tok dispela srain i luksave long Mama Maria Helpim Bilong ol Kristen bai kamapim trupela rinyuwel long Kraus na dispela em gol we Katolik Sios long PNG i bin luksave long em long Jenerel Asembli. Long planti hap bilong Pasifik, ol Katolik i givim bikipela luksave na prei long Mary Help of Christians.

Em i tok Oksileri bisop bilong Pot Mosbi Asdaiosis Bisop Cherubim Dambui na em

yet i bin blesim hap graun we ol bai sanapim dispela sapel. Em long Don Bosko Teknolijik Kolis long Is Boroko.

Long Zenit Nius em nius ejensi bilong Vatikan, toktok i kamap olsem Papa Santu i gat laik long dispela projek bilong ol Salesien long Pot Mosbi. Na aninit long "Congregation for Evangelization of Peoples", em i ofaim long givim sapot bilong bildim sapel ya.

Ol i klaim pinis hap graun na wok i stat isi isi long karimaut ol wok faundesen bilong sapel.

Sapos ol i kisim inap helpim mani, ol bai pinisim wok long sanapim sapel insait long 12-pela mun.

Wantok i no bin inap long toktok long Pater Valerian Barbero husat i go pas long dispela projek.

Ripot long Zenit Nius i tok long dispela Pasifik Ailan kantri we ol yut i stap insait long planti bikhet pasin na kraitim, ol Salesien Misinari i laik bildim srain bilong Mama Maria (Marian) olsem mak bilong pis o bel isi o bel kol, wanbel na gutpela sindaun edukesen na solidariti o wok bung wantaim.

Pater Bell i wok long kamap orait

TUPELA Katolik Pater bilong Misinari ov the Sacret Hat Odai wok long kamap orait bihain ol bin kisim birua long ka long Pot Mosbi long Sande, Oktoba 18. Em long Pater Leon Bell husat i gat 84 kismas na Pater Albert Boudaud.

Tupela pater i bilong kantri Frans na ol bin wok long planti kismas namel long ol Gollala na Bereina pipel bilong Sentral provins.

Birua i bin kamap long ol taim ol i wok long go bek long haus bilong ol long Siks Mail. Dispela em bihain long lotu na bikipela selebrensen bung i bin kamap long tok gutbai long Pater Bell bikos em bin sapos long go bek long kantri bilong em long malolo long wanem em i lapun pinis.

Stori bilong Pater Bell i bin kamap long Wantok Niuspepa las wik.

Em i bin kam long PNG long Septemba 1947 taim em i yang-

pela pater wantaim 27 kismas.

Bihain long ka birua i kamap long tupela pater, ol bin kisim Pater Bell i go long Mater Katolik Haus Sik long Townsville, Cairns long Australia. Em i wok long kisim tritmen long hap.

Pater Albert i bin stap long Pot Mosbi Jenerel Haus Sik tasol nau em i kamap orait na em i go bek long haus.

Em i bin wok long planti kismas namel long ol Gollala na Bereina pipel bilong Sentral provins.

Pasifik Tiolojikel kolis bungim 40 kismas

PASIFIK Tiolojikel Kolis long Suva Fiji i bin selebretim 40 yias bilong em long las wik.

Na long Suva, ol bin holim wampela konferens long toktok long histri bilong sios insait long ol Pasifik Ailans. Dispela em long (Wesleyen) Yunaited Sios.

Ol ripot i tok konferens bi bin kamap long tripela de na wampela bikipela samting i bin kamap em dibeit namel long ol sumatin bilong Yunivesiti ov Saut Pasifik na ol sumatin bilong Pasifik Tiolojikel Kolis (PTC). Het tok bilong dibeit em long "Should Church

Leaders Engage in Politics?"

Dispela i wampela bikipela askim we i mas kamap insait long Papua Niugini tu.

Nau kantri i lukim planti ol lida bilong sios husat i wok long sanap long politiks o sapotim ol politikel lida.

Sampela taim bai wampela i ken lukim na harim ol i tokaut insait long ol haus lotu yet taim ol i wok long autim tok long ol manmeri husat i save lotu wantaim ol long husat ol i mas tingting long votim.

Dispela kain pasin na tingting em bikipela paitim tok i save kamap long en.

Sohano Katolik Mama pinisim Mun bilong Mama wantaim bikipela lotu



Ol Katolik mama long Sohano i karim Mama Maria i go insait long haus lotu.

OL Katolik pipel bilong Sohano Ailan long Bogenvil long Sande, Oktoba 31, 2004 i bin bringim bek Stetju bilong Mama Maria i go bek long haus lotu pastaim long misa i bin stat. Dispela Stetju bilong Mama Maria ol i bin raun wantaim na prea long ol wanwan haus stat yet long namba 1 de bilong mun Oktoba we i mun bilong Mama Maria long Katolik Sios. Dispela pasin i save kamap long olgeta yia long olgeta hap graun na ol Katolik pipel i luksave long en. Bikipela lotu i bin kamap long Sande em Pater Duffy husat em i Rigonol Supiria bilong ol Maris pater long Bogenvil i bin go pas long en. Stori na ol poto - Aloysius Laukai



"God i save mekim gutpela pasin long ol manmeri bilong en."

Litimapim nem bilong Bikipela. Yumi mas tok tenkyu long em, long wanem, pasin bilong em i gutpela olgeta, na oltaim em i save laikim yumi tumas. Husat inap long stori long ol bikipela samting em i bin mekim? Na husat i ken litimapim nem bilong em inap long gutpela pasin bilong em? Ol man i save bihainim tok bilong em na mekim stretpela pasin, ol i ken amamas. Bikipela, taim yu helpim ol manmeri bilong yu, yu mas tingting long mi. Na taim yu kisim bek ol, yu kisim bek mi tu. Mi laik lukim ol manmeri bilong yu i sindaun gut na i kisim ol gutpela samting, na mi laik amamas wantaim ol. Mipela bai i amamas long wanem mipela i stap lain bilong yu. Mipela i mekim sin pinis olsem bipo ol tumbuna i mekim. Mipela i mekim kainkain pasin nogut.

Buk Song 106: 1 - 6

Nius Bilong HIV AIDS

TUDE long nius bilong sik HIV AIDS mi laik toktok liklik long ol pikinini we ol mamapapa ol i dai long AIDS.

Insait long kantri bilong yumi tude, planti ol pikinini i kisim taim stret bikos ol mamapapa bilong ol i gat binatang bilong AIDS. Ol Helt ripot i soim olsem moa long 12 milien pikinini insait long wol tete i nogat mamapapa bikos long HIV/AIDS tasol.

Long Papua Niugini tude, dispela kain hevi i wok long kamap bikpela stret. Planti bilong yumi i ting olsem wantok pasin bilong yumi i strong tasol HIV/AIDS i no kauntim wantok pasin bilong yumi.

Planti manmeri i no helpim ol famili memba bilong ol bikos long HIV/AIDS. Long wanpela stori wanpela man i bin kisim binatang bilong AIDS long ol kain nogut pasin bilong en. Em i givim long meri bilong en. Bihain bikpela sik i kisim em, na ol famili i bringim em long haus sik. Ol dokta i tok olsem em i gat binatang bilong HIV/AIDS. Ol i bin askim meri bilong en long sekim blut bilong em. Ol dokta i painim olsem meri tu i gat HIV/AIDS. Ol dokta i bin tokim em olsem nogat marasin long helpim em. Ol famili bilong em i kisim em i gobek long haus bilong en na lukautim em. Bihain long sampela mun, meri bilong en tu kisim sik nogut tru na wankain tasol ol dokta i wokim long en.

Nau ol pikinini i bin skul tasol nogat ol famili bilong mamapapa bilong ol long lukautim mamapapa bilong ol long lukautim mamapapa bilong ol olsem na ol tu i lusim skul long lukautim mamapapa bilong ol.

Papa i bin dai na ol planim em na bihain mama tu i dai ol i planim em.

Nau ol pikinini i painim hat tumas bikos nogat man long baim skul fi bilong ol. Dispela kain ol samting i wok long kamap strong long kantri bilong yumi tude. Mi laik toktok liklik tasol long sampela wei i ken helpim long daunim na rausim dispela kain hevi.

Kominikesen - Em i wanpela bikpela samting long ol marit laip. Toktok wantaim meri na man bilong yu na kamap wantaim ol gutpela rot o we bilong rausim hevi bilong

famili.

Harim toktok - Yu mas harim toktok na skelim pasin bilong yu bipo bekim, bikos planti manmeri i save les long harim ol toktok bilong ol man na meri bilong ol. Dispela kain pasin i ken opim rot bilong bagarapim famili.

Pasin bekim - Planti i save laik bekim, ol i save tok, "yu wokim mi tu bai mi wokim" dispela kain pasin i ken bagarapim sindaun bilong yu na famili bilong yu. Bikpela samting yu mas tingting long ol pikinini bilong yu.

Strongpela rilesensip



Strongpela rilesensip

i save strongim yumi long taim bilong hevi. Bikos yu save olsem ol famili i stap.

Plis strongim rilesensip wantaim ol nara-pela lain nau.

Yu mas save olsem nogat man em i stret-pela, yumi olgeta i no stretpela.

Long stretim marit pasin o boi/gel pasin, yu mas save olsem wok bilong yu man em bilong helpim na bildim ap meri o gelpren bilong yu long gutpela pasin; olsem tasol long meri tu wok bilong yu em long bildim ap man o boi pren bilong yu long gutpela pasin.

Na long ol mamapapa wok bilong yupela em long lainim na bildim ap ol pikinini bilong yupela long gutpela na stretpela pasin.

Long pinis mi laik tok olsem, pasin gridi na hangre long biknem i wok long bagarapim ol famili, gavaman na sios bilong yumi tude. Yu sanap we nau; HIV/AIDS stap pinis long kantri, Kirap na Luksave.

Pasin gridi na hangre long biknem i wok long bagarapim ol famili, gavaman na sios bilong yumi tude. Yu sanap we nau; HIV/AIDS stap pinis long kantri, Kirap na Luksave.

Bikpela namba bilong sumatin i go skul

...Singaut long kirapim nupela yunivesiti

Desney Koimo i raitim

LONG yia 2005 i go, Nesenel Gavman i laik lukim olsem olgeta skul insait long kantri i mas kisim besik edukesen sevis.

As toktok bilong besik edukesen em olsem elementri inap long gret 2, na praimer edukesen stat long gret 3 i go long gret 8.

Long wanpela bung bilong edukesen sekta insait long Sauten rijon, ol i tokaut olsem dispela senis i bin kamap long 1993 na i lukim bikpela namba bilong ol sumatin i go long skul.

Deputi Seketeri bilong Edukesen, Luke Taita, i tok dispela i apim tru namba bilong ol sumatin i go long gret 8, 10, na 12 we i kamapim resis namel long ol long go insait long ol yunivesiti na kolis.

Planti ol sumatin husat i gat gutpela mak long go het wantaim edukesen bilong ol i wok long stap nating long strit bikos spes i pas long ol kolis na yunivesiti.

Bikpela singaut nau i go long Nesenel Gavman long em i mas wokim wanpela nupela yunivesiti long kisim moa sumatin husat bai i pinisim gret 12 bilong ol insait long kantri.



Ol liklik skul pikinini bilong Damdi Pri Skul long Boroko, Pot Mosbi, i amamas long skul bilong ol.

Pait i mas go strong long daunim sik HIV AIDS

PLANTI manmeri na pikinini bai i dai long narapela 10-pela yia i kam bihain sapos kantri i no wok hat long daunim hariap dispela sik HIV AIDS.

Ripot i soim olsem moa long 22 milien pipel long wol i dai pinis na 42 milien husat i gat dispela sik i stap yet.

Long ol kantri we HIV AIDS i go bikpela pinis olsem Afrika, em i bringim wantaim em ol arapela sik, hangre na indai.

Duah Owusu Sarfo bilong Yunaited Nesens Populesen Fand UNFPA i tok olsem insait long Papua Niugini dispela sik i stap liklik yet tasol kantri i wok long luksave na pilim hevi HIV AIDS i bringim kam wantaim.

"HIV AIDS i no save kilim man tasol, em i save bringim planti hevi tu long ol famili, komyniti na developmen insait long kantri", em i tok.

Em i tok sapos ol saveman i painim

marasin bilong stopim HIV, 40 milien pipel insait long wol bai i dai yet bikos long AIDS.

Em i tok Papua Niugini i wok long bungim planti senis namel long tum-buna pasin na pasin bilong miks wantaim ol narapela kantri we i kamapim kainkain tingting na pasin nogut namel long ol yungpela man na meri.

Mista Sarfo i tok strong long ol yanyapela pipel long noken bihainim ol dispela kain tingting bikos ol i bihain taim wokman bilong dispela kantri na mas helpim long kamapim gutpela nam bilong PNG.

Em i askim ol arapela ogenaisesen long wok bung wantaim Nesenel Aids Kaunsil (NAC) long skulim ol lain o wokim aweanes long hariap na daunim dispela sik bipo long em i gro bikpela na bagarapim sindaun bilong ol manmeri insait long kantri bilong mipela.

NAC painim nupela rot long karimaut aweanes

Desney Koimo i raitim

NESENEL Aids Kaunsil (NAC) bai putim aut ol nupela samting bilong bringim moa aweanes i go long ol pipel long HIV AIDS olsem hap bilong dispela wok em i mekim long skulim ol pipel long dispela sik.

Dispela em i namba 4 hap bilong wok ol i bin wokim pinis long helpim ol manmeri insait long kantri long kisim save long HIV AIDS.

NAC i bin wokim wanpela wok sevei o wok painimaut long panimaut long tingting bilong ol man na meri long wanem we ol i ken stap bung wantaim ol manmeri i gat HIV AIDS na i kamap wantaim dispela nupela wei bilong skulim ol pipel.

As tingting bilong dispela wok aweanes i bilong wok bung wantaim long sapotim ol manmeri husat i stap wantaim HIV AIDS insait long wanwan komyniti.

Dispela aweanes em bai i kamap long TV, radio na bai ol i pritim antap long ol t-siot na posta long inapim ol pipel wantaim save na ol i ken skulim arapela bilong surikim dispela aweanes i go yet.

As tingting bilong dispela wok aweanes i bilong wok bung wantaim long sapotim ol manmeri husat i stap wantaim HIV AIDS.

YWCA holim namba wan HIV/AIDS greduesen

Desney Koimo i raitim

NON Gavman Ogenaisesen (NGO) grup bilong ol meri insait long kantri Yang Wimens Kristen Asosiesen (YWCA) i holim namba wan greduesen bung bilong ol long wanpela kos bilong HIV AIDS Skills Training Projek.

Dispela asosiesen i bin stap bipo tru tasol i nogat mani long holim dispela kain ol liklik kos long helpim ol yangpela manmeri.

Priscilla Kare husat i Ektim Nesenel Jenerel Seketeri bilong YWCA i tok 2004 em i 43 kismas bilong asosiesen insait long kantri na em i amamas long lukim ol ogenaisesen i wok bung wantaim.

YWCA i bin holim dispela kos wantaim helpim bilong Yunaited Nesens Populesen Fand (UNFPA) tru long Wol Visen husat i putim mani long karimaut dispela projek.

Dispela projek i ron long 16 wik olgeta na i lukim 26 sumatin i kisim setifiket long tripela kain kos em kuk, somap, rit na rait na tu ol i kisim skul long sik HIV/AIDS.

Projek Menesa bilong Wol Visen, Eunice Bruce, i tok dispela projek i kamap gut na bai i helpim tru ol sumatin long wokabaut bilong ol.

Em i tok HIV AIDS i bikpela samting na save sumatin i kisim long hia bai helpim em long was long bodi bilong em yet na tu ken skulim narapela long samting em i lainim pinis long hia.

Duah Owusu Sarfo husat i go pas long UNICEF long PNG i tok ol yangpela bilong Papua Niugini i stap aninit long bikpela presa o namel long ol poro o ol poro i grisim ol long mekim ol kainkain pasin.

Dispela i ken kamapim ol bikhet na paul pasin we ol i ken bungim HIV AIDS na tu kamapim birua long laip bilong ol.

Sumatin husat i makim ol man insait long dispela trening skil projek Francis Gao i amamas long pinisim kos wantaim ol meri olsem em i helpim ol tru bikos planti bilong ol i no bin gat gutpela edukesen.

Em i askim ol nara-pela ogenaisesen long wok bung wantaim YWCA olsem bai ol inap long ronim ken sampela narapela projek neks yia na lukim dispela wok i mas go het.

Ol poro i grisim ol long mekim ol kainkain pasin.

OI PNGDF soldia go long ADF suting tonamen long Australia

Joe Ivaharia i raitim

Tenpela PNGDF soldia bai makim kantri long wanpela intanesenel suting tonamen long Australia.

Dispela i bin kamap aninit long sapot bilong Australian gavman i go long Papua Niugini Difens Fos.

Long makim pinis bilong wanpela trening kem we ol top suta long olgeta yunit insait long PNGDF i stap insait long en, PNGDF komanda Commodore Peter Ilau i bin makim fainel tim na givim ol tropi long top suta long Goldie Ami trening depo long las wik Trinde.

Moa long 22 soldia i bin stap insait long dispela suting na trening kompetisen long Oktoba 4 we ol i bin makim fainel 10-pela tasol long makim PNG long dispela ovasis tonamen we bai i namba tri taim bilong PNGDF long tek pat.

Dispela intanesenel suting tonamen bai i kamap long Singleton ami bareks long Australia we ol i kolim Australian Ami Skill at Arms Miting (AASAAM) na bai i lukim ol suting tim long ol arapela kantri tu bai kamap long en.

Dispela kompetisen bai i mekim ol soldia i bung na tuk-save long ol arapela poroman soldia long ol narapela kantri na promanim ol tu.

Long las yia PNGDF i bin kamap long namba seven ples namel long 13 kantri olgeta husat i bin kam pilai insait long dispela kompetisen.

Long pinis bilong lokal kompetisen long Goldie, Praivet Authur Varuvi bilong enjinierin battalion long Igam bareks long Lae i bin kamap namba wan we em i kisim tropi long komanda Peter Ilau.

Em i bin kisim hai skoa 137.9 poin long kamap top. Seken em

Praivet Vaira Vanua (135.6) bilong 1RPIR Taurama na namba tri em Praivet Farapo Hauka (134.3) bilong 2RPIR Moem bareks, Wewak

Wokabaut bilong PNGDF tim igo long dispela tonamen long Australia bai i kam aninit long sponso bilong Difens fos bilong Australia.

Nem bilong ol fainol tenpela soldia em; Sajen Philp Hau, Sajen James Aka, Koporol Kevin Kokova, Lens Koporol Steven Mati, Praivet Hauka, Praivet Singoro Ekerima, Praivet Tony Hailai, Praivet Vanua, Praivet Stanley Karol na Praivet Vavuri.

Komanding opisa (CO) bilong Goldie Trening Depo Meja Walter Enuma i tok amamas long ol soldia we em i tokim ol long stap fit na kamapim gutpela mak long dispela kompetisen long apim nem bilong PNGDF.



• Praivet Varuvi i kisim top suta awot long PNGDF komanda Peter Ilau.

Lapun Karave laikim helpim long sik lewa

WANPELA lapun man bilong Kerema i bin mekim wanpela tok askim igo long gavana bilong Galp provins Chris Haivetta long mekim wok painimaut igo insait long operesen bilong bipo Kerema Bay koperetiv sosaiti.

Nem bilong man em lopa Karave na em bilong Meii viles long Kerema bei eria bilong Galp provins.

Em i bin tok olsem taim em i stap yangpela yet na wok em i bin putim ol savings o mani bilong em wantaim Kerema Bay Koperetiv Sosaiti long yia 1970.

Long dispela taim ikam nau i nogat wanpela toktok klia long tokaut olsem dispela sosaiti i stap yet o i bin pas pinis.

Em i tok tu olsem em i bin sevim sampela mani mak olsem K1,300 wantaim dispela koperetiv sosaiti tasol em i bin kisim sik long lewa bilong em we em i no save wanem samting i bin kamap long dispela mani bilong em nau.

Long nau em i wok long painim hat istap long stretim dispela sik long lewa bilong em.

Mista Karave i wok long painim liklik helpim i stap long sait bilong mani long stretim dispela sik bilong lewa.

Taim bilong senis long polis

KAMAPIM senis insait long pasin na wok bilong polis - pipel i singaut long Melanesian Polis Sevis.

Wanpela grup bilong ol Non Gavman Ogenaisesen i bin kamapim Pipels Eksen Komiti long helpim ol grup na ol manmeri bilong PNG long autim tingting bilong ol i go long Polis Riviu. Ol grup na ol manmeri i givim tingting bilong ol.

Olsem wok bilong em long karimaut senis insait long ol wok bilong Polis, Pipels Eksen Komiti i bungim olgeta tingting na makim long piksa o katun piksa. Ol dispela piksa i tokaut o soim klia ol pasin na ol samting we i no stret long ol Polis i mekim.

Komiti i kisim tu planti gutpela tingting tu i kam long ol grup na ol pipel long sampela gutpela senis we i ken kamap long polis. Sampela bilong ol dispela senis i bihainim gutpela pasin sampela opisa i save mekim insait long wok bilong ol wantaim komynuniti insait long kantri.



• Ol memba bilong Pipel's Eksen Komiti.


Community Policing - as the public sees it.

Komynuniti Polising - rot we pablik i lukim.

Pablik i lukim olsem ol polis i no save yusim gut ol polis kar long wok bilong ol stret. Ol kar i bagarap nabaut, kar i ron long sait wok bilong polisman yet na planti taim i nogat fiul long helpim pablik. Ol polisman i save raun long grup na planti taim

nogat man i save lukim ol long komynuniti o long strit long helpim pipel taim ol i bungim hevi. Pipel i no save lukim ol polis i wok about na patrol long rot.

Ol pipel i save lukim ol polis opisa em long taim ol i kam long paitim na bagarapim sindaun bilong ol maket lain long rot. I nogat wanpela taim pipel i lukim polis i toktok gut wantaim ol pablik.



Lawman i noken mekim olsem.

Tok kros long peimen bilong so

Paulus Tali i raitim

OL LAIN husat i bin helpim long sampela kain wok insait long dispela Kimbe "Tavur" kalsa so we i kamap long Oktoba 10-12 i no amamas long so oge-naising komiti bilong wanem ol i no baim ol yet.

Kros na bei hevi bilong ol grup husat i singsing long so, ol wokmanmeri, ol sekyuriti na ol kontrakta wantaim so komiti o kaunsel i kirap bihain long sampela toktok i kamap olsem ol mani ol i wokim long get na K250,000 i kam long Provinsel Gavman bilong ranim so na long baim ol lain i wok long so na ol singsing grup i go long wanem hap tru em ol i no save.

Wanpela man husat i kisim maus bilong ol lain i kros long ol so komiti long baim ol dispela lain husat i no kisim mani bilong ol yet.

"Mipela i amamas long so na mipela i no inap kros tasol yupela i no stretim mipela olsem na bel hevi na kros em mipela i putim long yupela," man ya i tok.

Long wankain taim ol pablik i singaut tu long

komiti long Tavur so i mas kamap bihain long tupela yia na dispela bai ken givim taim long ol ogenaia i ken kamapim gutpela pien na ol rot bilong ronim so.

Ol tok tu olsem Tavur i mas gat ol gutpela man i stap long ronim gut so.

Memba bilong Talasia John Vulupindi i tok ol gutpela lida i mas stap long ol kain so olsem na wok gut wantaim ol pipel na dispela bai bringim amamas namel long olgeta, taim ol pipel i lukim olsem ol lida i stap na wok i save kamap gut.

Dispela em i pes taim bilong Tavur kalsa so long kamap gen bihain long em i bin stop sampela yia i go pinis.

Gavana Clement Nakmai i lukim olsem dispela so i save helpim long strongim kalsa na em i kirapim gen long dispela yia. So i pulim planti tausen manmeri i kam long olgeta hap long kantri long stat bilong so i go long pinis bilong em long Oktoba 12. Planti ol singsing grup bilong ol ples olsem ls na Wes Niu Briten, Hailans na Morobe i soim stail na kafa bilong ol.

WANTOK KOMENTRI

Husat tru inap senisim Somare?

HUSAT tru inap kisim ples bilong Sir Michael Somare long kamap Praim Minista bilong Papua Niugini?

Oposisen i wok long toktok long kamapim vot i nogat bilip long Gavman bilong Sir Michael Somare tasol bikpela askim em husat tru inap long kamap Praim Minista taim ol i kamapim vot i nogat bilip ya.

Oposisen lida nau em Peter O'Neil. I gat arapela biknem husat i bin holim na pilim dispela wok bilong Praim Minista pinis olsem Paia Wingti na Bill Skate. Tupela tasol i save long hevi na pen bilong dispela sia bilong Praim Minista. Tasol tupela bai kamap Praim Minista olsem wanem taim Peter O'Neil i sindaun pinis long sia bilong Oposisen lida na i sambai long kisim dispela bikpela wok. Wapela rot em long Mista O'Neil i mas lusim sia bilong em olsem lida bilong Oposisen na givim i go long han bilong tupela bikman ya long soim olsem Oposisen i gat man long kisim ples bilong Somare.

Tasol yumi ken tingim i go bek long taim Bill Skate i bin kamap Praim Minista bilong Papua Niugini long 1997. Nogat man i ting em bai kamap Praim Minista bikos em i nupela na yangpela man long dispela wok. Tasol em i kamap Praim Minista. Sapos Oposisen i tingim dispela piksa orait Peter O'Neil i ken kamap Praim Minista.

Vot i nogat bilip long senisim Gavman i no nupela samting. I bin kamap planti taim pinis long bipo. Ol olupela Praim Minista olsem Sir Mekere Morauta, Sir Rabbie Namaliu na Paia Wingti i bin winim senisim Gavman long dispela rot tasol. Olsem na em i wanpela rot bilong Gavman i sekim em yet sapos em i sanap strong o nogat. Sapos em i strong, em inap winim dispela traim na go het long ranim kantri inap long 5-pela yia we lo i makim long taim bilong Palamen. Bikpela pret tasol em olsem taim dispela pasin i kamap, planti gutpela wok na ol samting bai senis na tu sampela gutpela samting bai i no inap kamap. Tasol ol lida wantaim gutpela tingting bilong kamapim gutpela samting long kantri na sevim pipel bilong em i save mekim samting stret na ol pipel bilong em i save amamas.



2005 baset o vot i nogat bilip

Yumi stap na lukluk, wanem samting bai kamap long Nesenel Palamen long dispela mun. Palamen i bin statim Novemba bung long dispela wik Tunde.

I gat tupela toktok i kam aut long dispela Palamen bung. Ol lain long Gavman i toktok long 2005 nesenel baset na ol Oposisen i toktok long putim vot i nogat bilip long Gavman bilong Praim Minista, Sir Michael Somare.

Las wik, Spika bilong Nesenel Palamen, Jeffery Nape i tok long kisim ol polis mobail skwat long Kerowagi long Simbu provins long kam was long Palamen haus, taim ol memba i sindaun long miting. Spika Nape em wanpela memba bilong Nesenel Alaiens Pati bilong Sir



TOK PISIN
wantaim
PETER MAIME

Michael Somare na makim Sinasina Yongomugl lilektoret long Simbu Provins long Palamen.

Polis Komisina, Sam Iguba i no wanbel long toktok bilong Spika Nape. Komisina Iguba i tok em i gat inap polis i stap long Pot Mosbi long mekim dispela wok.

Nesenel Gavman tu insait long kabinet miting i pasim tok long kisim Seksen 145 bilong Mama Lo bilong Papua Niugini i go long Suprim Kot long glasim na mekim disisen bilong en. Seksen 145 i tok long vot i nogat bilip

egensim husat gavman i stap long pawa.

Pikinini bilong Praim Minista na memba bilong Angoram, Arthur Somare wantaim Pipels Eksen Pati, (PAP) Brian Pulayasi, Minista bilong Maining, Sam Akoitai, na Lida bilong Gavman Bisnis, Patrick Pruaitch, i tok baset em bikpela samting long Papua Niugini. Ol i tok dispela baset bai lukautim ol pipel na i no vot i nogat bilip.

Ol lain long Oposisen i tok, ol i stap pas na ol i gat strongpela tingting long putim vot i nogat bilip long rausim Gavman.

Ol lain long Gavman i ting, nogut ol Oposisen i senisim ol na sampela ol gutpela wok ol i kirapim pinis i go lus nating. Tasol Gavman i no mekim wanpela bikpela toktok long ol wok em i mekim long kirapim na strongim kantri. Ol tok-tok, ol pablik i kisim long wok bilong Gavman, em ol i kam long wan wan Gavman Minista na ol sapota bilong Gavman.

Na wankain long Oposisen. Oposisen i no mekim wanpela bikpela toktok we Gavman i asua long en. Na tu ol i no soim wanem kain polisi ol i gat long kamapim na strongim ol samting Gavman i no mekim.

Ol pipel bilong Papua Niugini nau i was i stap. Pawa nau i stap wantaim wan wan memba

bilong Nesenel Palamen. Ol yet i mas skelim wanem samting i gutpela long ol pipel na long kantri. Taim ol pipel i makim ol i go long Palamen, long namba wan sindaun bilong palamen, ol memba i holim baibel na promis long ai bilong Bikpela olsem ol bai sevim ol pipel na kantri wantaim gutpela tingting na stret-pela pasin.


Politiks bilong Papua Niugini i save swit, i save kirapim bel pen, i save mekim skin gras i kirap, na i save grisim bel. Yumi putim was olsem ol memba bilong yumi i no lus tingting long dispela promis bilong ol long namba wan de bilong ol insait long Nesenel Palamen long sevim ol pipel na kantri bilong ol.

Yumi no ken bikhethet

Yu no ken egensim lo bilong kantri bilong yumi

OL Brata susa, yupela i no ken tok nogut long ol arapela manmeri bilong God Papa bilong yumi. Man i tok nogut long ol arapela ol i sutim tok long ol. Em i tok nogut long lo yet na sutim tok long lo. Na sapos yu sutim tok long lo, orait yu no stap moa olsem man i aninit long lo. Nogat.

I olsem yu kamap jas. God wanpela tasol i kamapim lo, na em tasol i stap jas. Em wanpela tasol inap long kisim bek ol



OL PRINSIPOL BILONG GUTPELA LIDA
wantaim
Pastor na Evangelist OHARE JABERE

manmeri na long bagarapim ol. Olsem na yu husat na yu sutim tok long ol arapela manmeri bilong God.

John 13:15 i tok "mi soim pasin long yupela. Na yupela tu i mas mekim wankain pasin olsem nau mi mekim long

yupela". Dispela em soim yumi em yumi mas bihainim pasin bilong em na bai yumi tu i ken soim wankain pasin long ol arapela manmeri long bihainim yumi.

Mi ting em i wanpela bikpela tok tru long yumi ol lidaman na meri long wanem Lida em i man o meri i go pas na ol arapela bai bihainim em (yumi) Yumi no ken agensim o bagarapim lo bilong kantri bilong yumi.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yla
52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K140.00

US\$100.00

US\$80.00

US\$150.00

General Manager
Justin Hansu Kili

Editor
Yakam Kelo

Published by Jeremy Burgess and printed by Pacific Star P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea: Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



Naigeria straik

Naigeria:


Ol dispela taksi draiva i wetim ol pasindia long Abuja. Sinia leba lida bilong Naigeria i singautim olgeta man long straik bilong wanem prais bilong bensin i go antap. Em i tok tu olsem ol wokman bai bagarapim tu salim bilong oil i go long ol narapela kantri.



Nogat inap mani long pait agensim sik AIDS

Malawi:

Ol pikinini husat papamama bilong ol i dai long sik HIV AIDS i skol long Blantyre. Ol helt wokman bilong Malawi i tokim Spen Lewis, husat i wokman bilong Yunaited Nesens (UN) long sait bilong sik HIVAIDS, olsem ol i kisim tiklik mani tumas long Global Fand long pait agensim sik HIV AIDS. Inap long 1.54 milien manmeri bilong Malawi i kisim pinis dispela sik.



Noken yusim ol animol long wok stadi

Singapo:

Wanpela risetsa o man bilong painimaut ol nupela samting long Saina i yusim monki long mekim wok panimaut bilong em. Singapo bai putim aut ol stronpela lo long kotim ol man husat i yusim ol animol long dispela kain pasin.

Moa Woa long Irak

Irak:

Wanpela famili i lusim haus bilong ol long Fallujah bihain long toktok i kamap olsem woa o pait bai kamap long ples bilong ol. Long Sande, Oktoba 31, Praim Minista bilong Irak, Iyad Allawi, husat bai stap olsem PM sotpela taim tasol, i tok olsem i gat bikpela sans olsem woa bai kamap long Westen siti bilong Fallujah.


Em i mekimdispela tok bilong wanem ol ami bilong Yunaited Stets ov Amerika i redi long dispela ples long pait wantaim ol paitman bilong Islam.



Soklet dres

Frans:

Long opim wanpela soklet so long Peris, Miss Frans 2004 Leatitia Bieger i werim ol klos ol i mekim wantaim soklet tasol.



Ol developing kantri bai gat marasin bilong ol sik AIDS, malaria na TB

Yurop:


Ol Yurupien Komisn i kamap wantaim wanpela sistem we bai mekim isi long ol Yurup kampani, husat i save mekim ol marasin bilong ol kain sik olsem AIDS, malaria na TB, long givim ol dispela marasin long ol manmeri bilong ol developing kantri. Dispela toktok i kam long Yurupian Yunien (EU) Treid Komisn Pascal Lamy.



Spen tok orait long yusim nupela bebi long wok stadi

Spen:

Deputi Praim Minista bilong Spen, Maria Teresa Fernandez de la Vega, i tok olsem nupela Sosolist gavman bai larim ol saientis long yusim ol embri-onik stem sel o ol nupela bebi i no bon yet long ol wok painimaut bilong ol.



Saut Pol i stap long tudak

Saut Pol:

Dispela poto i kam long NASA i soim tudak i karamapim Saut Pol. Wanpela envaironmental stadi i painim olsem ol grinhaus ges o ol ges nogut we i save mekim graun i kamap hat moa i wok long bagarapim Artik rigon. Ol i wok long kamapim tu bikpela senis long weda na ol ais i wok long tanim i kamap wara o melt..

Lukautim Lae

Dia Edita,
Belhevi bilong mi i olsem taim mi raun long Lae, mi save lukim planti manmeri i save kaikai buai na spet long kolta long rot bilong ka, na long bas stop.
Taim mi lukim dispela pasin mi no save wanbel na tu ol manmeri i no save yusim het bilong ol gut na tromoi nabaut ol pipia long siti bilong yumi long Lae.
Lae em wanpela

indastriel siti tasol long kantri bilong yumi. Olsem na plis yumi mas yusim het na tingting bilong yumi na rispektim siti bilong yumi.
Em tasol mi manki Morobe, distrik bilong mi Kabwum na mi i stap long Lae.

**PITA MK
POT MOSBI
NCD**

Hagen taun i klin nau

Dia Edita,
Mi amamas long siti kaunsel long Hagen husat i wok hat tru na siti kamap klin. Tasol wanpela bikpela sik em i stap yet. Em dispela yupela ol kaunsel na polis i mas wok bung wantaim. Ol stilman pulim bilum bilong ol mama, hensapim ol wok manmeri, pik poket, salim buai long strit. Em i no gutpela pasin. Plis stopim dispela kain pasin long siti bilong yumi.

**SAMSON TEP
MT HAGEN
WESTERN HAILANS PROVINCS**

Hevi i wok long kamap long Lae

Dia Edita,
Mi wanpela grasrut man mi save i stap long Uni Blok insait long Lae siti long Morobe provins.
Nau ol dispela hevi wok long kamap bikpela insait long Lae siti bikos olgeta provins insait long Papua Niugini i kam bung wantaim long Morobe provins.
Dispela kainkain hevi i wok long kamap bikpela nau. Reip o holim pasim na bagarapim meri, kilim man, stil, salim smok na buai long pablik ples, salim stua kago long strit na dring bia long pablik ples.
Dispela kainkain hevi o trabel i wok long kamap bikpela na daunim pawa na lo na oda bilong Provinsel Gavman bilong Morobe.
Dispela kain hevi i wok long bringim bikpela sem i kam long gavana bilong Morobe na lod meya bilong Lae siti.
Olgeta manmeri i stap insait long Lae siti ol i wokim samting long laik bilong ol i nogat lo na oda i banisim ol.
Mi ting olsem sapos gavman bilong Morobe i kamapim strongpela sekyuriti na ol i ken wok fultaim wantaim Lae siti

polis, ol mas lukautim na sanap inapim olgeta kona bilong Lae siti.
Olgeta taim sapos ol i sanap long kona bilong ol olsem Eriku, taun maket, Voco Point em dispela bai orait.
Narapela samting i olsem; Provinsel Gavman bilong Morobe i mas wokim kat bilong olgeta manmeri bilong en na ol kampani tu ol mas wokim kat bilong ol wok manmeri bilong ol.
Long dispela Morobe sekyuriti na polis ol i ken sekim olgeta manmeri husat i gat wok i nogat wok kisim ol lokim ol long rumgat na salim ol i go bek long ples bilong ol.
Sapos bikhet salim ol stret i go long kalabus.
Sapos olgeta provins insait long PNG wokim dispela kain sistem mi ting bai yumi i stap gut.


Sekyuriti na polis ol i ken sekim olgeta manmeri husat i gat wok i nogat wok kisim ol lokim ol long rumgat na salim ol i go bek long ples bilong ol.

**GRASRUT MAN
UNI BLOK, LAE
MOROBÉ PROVINCS**

OL PAS

Salin pas i kam long
WANTOK
Niupapa
P.O. Box 1982
Boroko, PNG

Noken pulim taim long tok kros long ol meri



Dia Edita,
Mi no amamas long wanpela ol komplek pas i save kam long olgeta Fonde olsem na mi laik rait na agensim.
Mi no inap makim pas bilong wanpela nogat, tasol dispela ol pas i save komplek olsem ol meri i mas noken bilas o putim ol 6 poket trausis, jins na spots trausis.
Ol brata, yupela husat i save raitim dispela kain komplek pas yupela harim gut, mi no inap agensim yupela tasol wanpela samting mi lukim i no gutpela long ai bilong mi. Olsem na mi laik rait na agensim yupela.
I no gutpela long raitim nem bilong Papa God na Baibel ves na ol Baibel stori bilong strongim ol kainkain tingting na

pasin bilong yupela.
Yumi save olsem tok bilong God i gat olgeta strong na save na em i save ron olsem wara. Na i no save wankain olsem tingting na save bilong yumi man long graun.
Olsem na yumi noken putim tingting bilong yumi wantaim tingting na save bilong God na strongim tok bilong yumi na kros i go i kam.
Yupela i ken save tok i stap long Buk Baibel em bilong ol bilip manmeri tasol i no ol haiden olsem na ol bilip manmeri ol lukim long Buk Baibel na ol lukim tok stap long Duteronomi long sapta 22:5 na ol arapela buk.
Em toksave long ol olsem na ol i no

save go insait long dispela kain bilas.
Tasol ol meri i save i go insait long dispela kain bilas em ol i no save long tok i stap long Buk Baibel olsem na nogut yupela pulim taim bilong yupela.
Olsem na maski long raitim dispela kain pas tumas.
Yupela i ken raitim kainkain Baibel ves na Baibel stori tasol dispela i no inap senisim tingting bilong ol na bai yupela lukim ol senis.

**AVEX BEGA
LUFU
ISTEN HAILANS PROVINCS**



Kalsa
Ol memba bilong grup bilong Papua Niugini husat i bin go long Namba 9 Festival bilong Pasifik Ats long Palau long dispela yia i sanap long liklik haus we ol i soim ol basket, bilas, kaving, na ol narapela ol samting we i soim kala na kalsa bilong PNG. Dispela festival em i wanpela bung we i save givim sans long ol Pasifik kantri long bung wantaim, amamas na soim ol kalsa na kastam bilong ol long ol narapela.

Poto: NCC


Sir Michael i no tingim Simbai

Dia Edita,
Mi wanpela pikinini Simbai Midel Ramu distrik long Madang provins. Nau mi laik putim aut komplek bilong mipela i go long Praim Minista Sir Michael Somare.
Sir Michael mipela inap long harim yu toktok tumas long ol lain i stap long taun na siti. I gat sampela kain luksave long pik dok bilong Kobon, Kaironk, Simbai, Asai, Ganj, Maring na Aiome o nogat?
Sapos yu save olsem yu bai lus tingting long dispela kain ples inap 30 yia, bilong wanem na yu tokaut long indipendens long dispela kain ples?
Mi laik save bilong wanem yu go antap long dispela kain ples. Nogat wanpela gutpela kain samting stap long pulim yu long go ar.ap na mipela kisim taim inap 30 yia nau. Simbai em Australia na yu bin kam long bipo a? Mipela kisim taim inap 30 yia.
Nau mipela givap na tokim PNG olsem Simbai em stat bilong indipendens long Septemba 16, 1975. Mipela i no laik hait

narapela 30 yia moa.
Husat yu memba bilong narapela provins o bikman bilong gavman plis sapotim mipela na toktok long dispela samting insait long palamen bung bilong yupela. Sapos mipela rait stret long Sir Michael em bai lus tingting olgeta olsem na mipela askim yupela. Mipela i nogat papa long toktok olsem long palamen.
Mi yet mi no wanpela skul man, inap ol kain man olsem ol kaunsel, provinsel memba na kaunsel presiden ol votim ol inap long mekim dispela komplek tasol ating ol save kaikai hap kaikai bilong Sir Michael olsem na ol i save les nabaut.
Mekim stap pastaim 2007 wanpela toktok kam las namba, dispela namba 7 bai wokabaut long het bilong em. Taim mipela bai votim ol bai lus tingting na go olgeta olsem na mipela i les pinis.
Dispela em namba 2 pas. Nambawan mipela rait long las yia 9 mun yet na nogat bekim bilong en. Dispela namba tu pas na namba tri mipela bai rait dispela nogat

wanpela toktok kam long maus bilong Sir Michael.
Mi wantaim ol 20 lapun ol i bin lukim dispela de long hot san long Simbai, mipela bai kam stret long haus dua bilong yu na bai yu tokim mipela bilong wanem na yu no kambek lukim mipela. Yu kisim balus abrusim maunten Gongi na lusim mipela. Nau yu stap we? Yu dai pinis o? Sapos yu stap yet mipela laik harim sampela kain toktok i kam long yu.
Mipela i no tok pilai. Sir Michael long Septemba 16, 1975, san kam antap long Ramu na go daun na go olgeta na tudak i stap yet. Bilong wanem na bai mipela stap olsem narapela 30 yia moa? Presiden, o kaunsel na ol memba bilong Simbai longlong na mekim wanem i stap.

**KONSEN MANKI
SIMBAI
MADANG PROVINCS**



Raun bilong Embesi bilong Japan na Japanis Intanesenel Koperesen Ejensi long lukim ol Smol Holda Rais Promosen Projek long Madang na Rabaul.

-Ol poto: William Natera

Stori bilong wanpela bikpela main na wok em i mekim long helpim kantri.

Porgera Main bai pinis bihain long 8-pela yia

Fr Philip Gibbs i raitim

Porgera Main i stap long Enga Provins. Em K25 PMV fe long Mt Hagen i go kamap long Porgera. Porgera Main em i wanpela bikpela main na long 1990 inap 2003 we ol i bin kisim 12.2 milien oz long gol (US\$242/oz). I gat 2100

wan i save wok long karim 200 tonnes bilong ston. Taim man i sanap klostu long bikpela trak olsem, man i kamap liklik tru olsem anis o binatang!

Wanpela wari long dispela taim em ol manmeri i save brukim tambu na kam insait long ples bilong main long painim ol liklik hap got. Sampela taim ol ston i save pundaun long het bilong ol na ol dispela lain i brukim tambu i kisim bagarap. Planti ol i go kot na ol i mas peim K1,000 o sapos nogat ol i go long kalabus.

Long ol ples bilong maining we i gat planti man i save go i kam, HIV/AIDS i kamap bikpela na helt depatmen na kampani i wok long painim we bilong daunim dispela sik. Nau kampani i gat plen we husat man em yet i kam long helt senta long kisim tes bilong HIV/AIDS na test i soim em i gat dispela sik, kampani bai lukautim em long laiptaim bilong



Wok i go het insait long bikpela hap graun we kampani i brukim.



Traipela trak i karim ol ston i gat gol.

Ol foto: FR PHILLIP GIBBS.

wokmanmeri we 1,800 em ol wokmanmeri bilong Papua Niugini na 227 bilong ovasis. Kampani i kisim gol tasol bikpela mani i kam bek tu olsem long wanwan yia samting olsem K170 milien kina long peim ol wokman, na K100 milien long ol takis.

Porgera main i wok long wanpela traipela hul long graun na tu aninit long graun. Ol i save yusim ol bikpela trak long rausim ston nating na long karim ston i gat gol long ol masin bilong brukim na kisim gol. I gat 36 bikpela Catapillar trak, wan-



Sampela ol wokman bilong main i sanap na Paiam taun i stap baksait long ol.



Wok bilong maining i no wok bilong ol liklik trak o masin.

lukim olsem ol i mas kisim dispela namba bilong de long malolo inap long ol orait na i ken go bek long wok.

Tasol dispela em bai namba wan polisi insait long Papua Niugini na ating tu long Australia. Dispela polisi bai helpim ol wokmanmeri husat i go long haus sik na sekim blut bilong ol. Na sapos haus sik i painimaut olsem ol i gat HIV/AIDS.

Dispela nupela polisi o pasin we i bin kamap long mun Oktoba bai givim bikpela helpim na sapot tru long ol wokmanmeri.

HIV/AIDS i wok long kamapim bikpela hevi long Papua Niugini na i kisim planti manmeri long PNG. I gat edukesen kempen i wok long kamap yet long Porgera.

Ol wokmanmeri husat i go long sekim blut bilong ol na painim olsem ol i gat HIV bai kisim ol helpim na sapot i kam long kampani.

Taim ol i wok yet bai ol i kisim dispela sapot na helpim na taim sik igo bikpela na ol i go long ples, ol bai kisim yet 50% o hap bilong dispela sapot na helpim kampani i bin givim ol taim ol i bin sik na wok i stap.

Bai ol i kisim medikol sapot na arapela medikol helpim kampani i save givim long ol wokmanmeri na tu bai ol i kisim yet sapot mani i kam yet long kampani long helpim famili bilong ol na tu stretim nem bilong ol insait long komyuniti na asples bilong ol.

Jenerel Menesa bilong maining, Brad Gordon i tok PJV em i wanpela lida insait long maining indastri na i redi long putim mani i go stret long sapotim ol pipel long soim ol wokmanmeri bilong em olsem em i stap wantaim.

Em i tok tu olsem kampani i mekim dispela long soim olsem kampani tu i stap insait long dispela wok bilong pait egensim HIV/AIDS.

Ol wokmanmeri long olgeta seksen bilong wok i wanbel long dispela nupela polisi na namba bilong ol lain i laik go sekim blut bilong ol i wok long go antap nau.

Ol wokmanmeri bilong PJV i save nau olsem sapos ol i gat dispela sik bai ol i kisim helpim na sapot i kam yet long PJV taim ol i lusim wok na stap nating.

em
Main i bin stat long wokim gol long 1990 na gol bai pinis bihain long 9-pela yia olsem long yia 2014. Nau i gat sampela grup i wok long tingim bihain taim bilong Porgera na ol i tingim ol helt sevis na ol rot na lo na oda na pawa saplai na edukesen na wanem kain liklik bisnis i ken sapotim ol pipel bilong Porgera taim kampani i go pinis.

PJV bai sapotim HIV woklain taim ol stap long ples

NUPELA polisi i kamap long helpim ol wokman bilong Porgera Joint Vensa. Aninit long dispela nupela polisi, ol wokman husat i kisim sik o bagarap we i no wankain long ol bagarap ol inap kisim long taim bilong wok we inap stopim ol long go long wok bai ol i ken kisim moa helpim i kam long PJV.

Ol i ken kisim moa taim long sik liv abrusim taim ol i save kism long sik liv stret bilong ol wantaim kampani. Dispela polisi bai i sut long ol wokmanmeri we ripot bilong haus sik bai i

CATHOLIC RADIO schedule

Fonda		Manda	
6:00	ANGELUS	6:00	ANGELUS
6:05	MEDITATION/INSPIRATIONAL MUSIC	6:05	MEDITATION/INSPIRATIONAL MUSIC
7:00	VATICAN RADIO WORLD NEWS	7:00	VATICAN WORLD NEWS
7:15	VATICAN ENGLISH PROGRAM	7:15	VATICAN ENGLISH PROGRAM
7:35	NON-STOP GOSPEL MUSIC	7:35	NON-STOP MUSIC
8:00	JOURNEY HOME (EWTN)	8:00	BEST OF JOURNEY HOME
9:00	VATICAN RADIO WORLD NEWS	9:00	VATICAN WORLD NEWS
9:15	VATICAN ENGLISH PROGRAM	9:15	VATICAN ENGLISH PROGRAM
9:40	KIDS SING-ALONG	9:35	KIDS SING ALONG
10:00	CATHOLIC JUKEBOX	10:00	CATHOLIC JUKEBOX (EWTN)
10:30	GOSPEL MUSIC	10:30	NON-STOP GOSPEL MUSIC
11:00	NON-STOP GOSPEL MUSIC	10:30	ANGELUS
12:00	ANGELUS	12:00	VATICAN WORLD NEWS
12:05	VATICAN WORLD NEWS	12:05	VATICAN ENGLISH PROGRAM
12:20	VATICAN ENGLISH PROGRAM	12:20	AFTERNOON REFLECTION MUSIC
12:40	REFLECTION MUSIC	12:40	THE WAY TO FOLLOW JESUS
1:00	LAMB'S SUPPER WITH DR. SCHOTT HAHN	1:00	GOSPEL MUSIC
2:00	MUSIC	1:30	CHAPLET OF DIVINE MERCY
3:00	CHAPLET OF DIVINE MERCY	3:00	NON-STOP GOSPEL MUSIC
3:20	NON-STOP GOSPEL MUSIC	3:20	CATHOLIC JUKEBOX (EWTN)
4:00	CATHOLIC JUKEBOX (ENCORE)	4:00	NON-STOP GOSPEL MUSIC
4:30	NON-STOP GOSPEL MUSIC	4:30	MESSAGE IN MUSIC
5:00	JOURNEY HOME	5:00	ANGELUS
6:00	ANGELUS	6:05	VATICAN ENGLISH PROGRAM
6:05	MADANG LOCAL NEWS	6:30	MANY FACES OF MARY
6:10	VATICAN ENGLISH PROGRAM	7:00	HOLY ROSARY
6:30	LAMB'S SUPPER WITH DR. SCHOTT HAHN	7:30	BENEDICTION
7:00	HOLY ROSARY	8:00	VATICAN WORLD NEWS
7:30	CATHOLIC INSIGHT	8:15	CRN LOCAL NEWS
8:00	VATICAN WORLD NEWS	8:30	VATICAN ENGLISH PROGRAM
8:15	MADANG LOCAL NEWS	9:00	BEST OF JOURNEY HOME
8:30	VATICAN ENGLISH PROGRAM	10:00	CATHOLIC JUKEBOX (EWTN)
9:00	TOK STREET LONG HVAIDS	10:30	VATICAN ENGLISH PROGRAM
10:30	VATICAN ENGLISH PROGRAM	11:00	NON-STOP GOSPEL MUSIC
Sarore		Tupela	
6:00	ANGELUS	6:00	ANGELUS
6:05	MEDITATION/INSPIRATIONAL MUSIC	6:05	MEDITATION/INSPIRATIONAL MUSIC
7:00	VATICAN WORLD NEWS	7:00	VATICAN WORLD NEWS
7:15	VATICAN ENGLISH PROGRAM	7:15	VATICAN ENGLISH PROGRAM
7:35	NON-STOP GOSPEL MUSIC	7:35	NON-STOP MUSIC
8:00	RADIO ST. JOSEPH PRESENTS	8:00	RADIO ST. JOSEPH PRESENTS
9:00	VATICAN WORLD NEWS	9:00	VATICAN RADIO WORLD NEWS
9:15	ENGLISH PROGRAM	9:15	VATICAN ENGLISH PROGRAM
9:35	KIDS SING-ALONG	9:40	KIDS SING-ALONG
10:00	CATHOLIC JUKEBOX	10:00	CATHOLIC JUKEBOX
10:30	NON-STOP GOSPEL MUSIC	10:30	GOSPEL MUSIC
12:00	ANGELUS	12:00	ANGELUS
12:05	VATICAN WORLD NEWS	12:05	VATICAN WORLD NEWS
12:20	VATICAN ENGLISH PROGRAM	12:20	VATICAN ENGLISH PROGRAM
12:40	REFLECTION MUSIC	12:40	REFLECTION MUSIC
1:00	OUR FATHER'S PLAN	1:00	SUPER SAINTS
1:30	AFTERNOON GOSPEL MUSIC	1:30	GOSPEL MUSIC
3:00	CHAPLET OF DIVINE MERCY	3:00	CHAPLET OF DIVINE MERCY
3:20	NON-STOP GOSPEL MUSIC	3:20	NON-STOP GOSPEL MUSIC
4:00	CATHOLIC JUKEBOX (EWTN)	4:00	CATHOLIC JUKEBOX
4:30	NON-STOP GOSPEL MUSIC	4:30	NON-STOP GOSPEL MUSIC
5:00	WAVE FACTOR (EWTN)	5:00	RADIO ST. JOSEPH PRESENTS
6:00	ANGELUS	6:00	ANGELUS
6:05	VATICAN ENGLISH PROGRAM	6:05	ATAPE LOCAL NEWS
6:30	FATIMA	6:10	VATICAN ENGLISH PROGRAM
7:00	HOLY ROSARY	6:30	MOTHER OF REDEEMER
7:30	STATIONS OF THE CROSS	7:00	HOLY ROSARY
8:00	VATICAN WORLD NEWS	7:30	SUPER SAINTS
8:15	CRN LOCAL NEWS	8:00	VATICAN WORLD NEWS
8:30	VATICAN ENGLISH PROGRAM	8:15	ATAPE LOCAL NEWS
9:00	TOK STREET LONG HVAIDS	8:20	VATICAN ENGLISH PROGRAM
10:00	VATICAN ENGLISH PROGRAM	9:00	TOK STREET ABOUT HVAIDS WITH FR. JUDE (ENGLISH)
11:00	NON-STOP GOSPEL MUSIC	10:00	CATHOLIC JUKEBOX
12:00	ANGELUS	10:30	VATICAN ENGLISH PROGRAM
12:05	VATICAN WORLD NEWS	10:50	NON-STOP GOSPEL MUSIC
12:20	VATICAN ENGLISH PROGRAM		
12:40	GOSPEL MUSIC	6:00	ANGELUS
3:00	CHAPLET OF DIVINE MERCY	6:05	MEDITATION/INSPIRATIONAL MUSIC
3:20	GOSPEL MUSIC	7:00	VATICAN WORLD NEWS
4:00	BACKSTAGE	7:15	VATICAN ENGLISH PROGRAM
4:30	NON-STOP GOSPEL MUSIC	7:35	NON-STOP GOSPEL MUSIC
5:00	WORLD OVER NEWS	8:00	SCRIPTURE MATTERS WITH DR. SCHOTT HAHN (EWTN)
6:00	ANGELUS	9:00	VATICAN WORLD NEWS
6:05	VATICAN ENGLISH PROGRAM	9:15	VATICAN ENGLISH PROGRAM
6:30	MIRACLES OF THE CROSS	9:35	KIDS SING-ALONG
7:00	HOLY ROSARY	10:00	CATHOLIC JUKEBOX
7:30	CROSSROADS	10:30	NON-STOP GOSPEL MUSIC
8:00	VATICAN WORLD NEWS	12:00	ANGELUS
8:15	VATICAN ENGLISH PROGRAM	12:05	VATICAN WORLD NEWS
9:00	WORLD OVER NEWS (EWTN)	12:20	VATICAN ENGLISH PROGRAM
10:00	BACKSTAGE	12:40	REFLECTION MUSIC
10:30	VATICAN ENGLISH PROGRAM	1:00	FIRST COMES LOVE DR. SCHOTT HAHN (EWTN)
10:50	NON-STOP GOSPEL MUSIC	1:30	AFTERNOON GOSPEL MUSIC
Sanda		3:00	CHAPLET OF DIVINE MERCY
6:00	ANGELUS	3:20	NON-STOP GOSPEL MUSIC
6:05	MEDITATION/INSPIRATIONAL MUSIC	4:00	CATHOLIC JUKEBOX
8:00	VATICAN WORLD NEWS	4:30	NON-STOP GOSPEL MUSIC
8:15	VATICAN ENGLISH PROGRAM	5:00	SCRIPTURE MATTERS
8:35	NON-STOP GOSPEL MUSIC	6:00	ANGELUS
9:00	SUNDAY EUCHARIST LIVE	6:05	VANIMO LOCAL NEWS
10:30	NON-STOP MUSIC	6:10	VATICAN ENGLISH PROGRAM
11:00	IN THE LORD'S VINEYARD	6:30	FATIMA/HEAVEN'S PEACE PLAN
12:00	ANGELUS	7:00	HOLY ROSARY
12:05	VATICAN WORLD NEWS	7:30	DOCTORS OF THE CHURCH
12:20	VATICAN ENGLISH PROGRAM	8:00	VATICAN WORLD NEWS
12:40	GOSPEL MUSIC	8:15	VANIMO LOCAL NEWS
3:00	CHAPLET OF DIVINE MERCY	8:20	VATICAN ENGLISH PROGRAM
3:20	GOSPEL MUSIC	9:00	TOK STREET ABOUT HVAIDS WITH FR. JUDE
5:00	SIGNS OF THE TIMES (RTA)	10:00	CATHOLIC JUKEBOX
6:00	ANGELUS	10:30	VATICAN ENGLISH PROGRAM
		10:50	NON-STOP GOSPEL MUSIC

ICCC i wok long mekim gut wok o nogat?



Linda Itegei (sindaun fran na holim pinat) na Jeffery Kombani (rait han tru wantaim hat) wantaim hauslain long Gaden Hill maket we ol i tok sas bilong ol samting long stua i no save kamap stret.

Long dispela taim ol manmeri i wok long kisim taim nogut long prais bilong ol samting long stua na long ol bisnis. Sampela bisnis i salim samting we taim bilong salim i pinis na sampela i sasim prais we prais bilong ol i antap tumas. Sampela bisnis i nogat laisen long mekim wok bisnis. Dispela ol samting long luksave bilong pablik i no inap kamap sapos Indipenden Konsuma na Kompetisen Komisn (ICCC) i mekim wok bilong em. Wantok Niuspepa nipota Paul Zuvani i raun na kisim tingting bilong ol manmeri.

Linda Itegei bilong Lufa, Isten Hailans provins na em i stap long Gaden Hill setelmen long Waigani. Em i tok hevi i save kamap taim ol opisa i no mekim wok bilong ol.

"Rong i stat long opis bilong Indipenden Konsuma Kompetisen Komisn. Ol opisa i no mekim wok bilong ol long sekim ol bisnis, samting ol i salim na prais ol i sasim. "Sapos ol i mekim wok dispela ol hevi i no inap kamap. Wantaim ol hevi tu i stap long ol bisnis. Maski ol i save olsem ol i no ken salim samting em ol i no ken salim orait ol i mas stop long salim.

"Planti ol Saina stua i wok long salim yet ol samting we de bilong dispela ol samting i pinis. Na rong i stap tu long ol kastoma. Sapos ol kastoma i lukim ol kain samting ol i mas ripot hariap long opis bilong ICCC."

Jeffery Kombani i bilong Mt Hagen long Westen Hailans provins. Em i stap tasol long Gaden Hill wantaim famili bilong em. Em i no amamas long ICCC long wei ol i mekim wok.

"Gavman i mas sekim gut ektig komisina bilong Indipenden Konsuma na Kompetisen Komisn Thomas Abe na lain bilong em. I luk olsem dispela ol lain i no save mekim wok bilong ol. Em i wok

bilong komisn long sekim sapos prais bilong ol samting long stua i stret. Na sapos prais bilong ol samting i stap long mak we ol pipel i inap long baim.

Andrew Talis i bilong Ningel, Nuku distrik, Sandaun provins tasol i kam raun long Pot Mosbi taim Wantok Niuspepa i bungim em. Em i tok planti ol bisnis em bilong ol Saina.

"Ol i save salim ol giman samting long bikpela prais nating. Planti ol samting em ol piksa samting. Na maski ol kaikai we taim bilong ol long salim i pinis ol i save salim yet."

Andrew Kumugene i bilong Kerowagi, Simbu provins. Em i save stap long Kundiawa, bik-taun bilong Simbu. Em i no amamas long wok bilong ICCC.

"Indipenden Konsuma na Kompetisen Komisn i no mekim wok bilong ol. Planti bilong dispela ol kampani na bisnis olsem kaiba i no registet kampani. Ol manmeri i ronim ol nating.

"Wantaim dispela prais bilong ol samting o sevis ol i givim i antap tru. Dispela bisnis i kamap bilong stilim mani tasol. Ol i no stap bilong helpim mipela ol kastoma."

Peter Martin i bilong Laiagam, Enga provins. Em i tok, "Ol pipel long ples i kisim taim nogut long pe bilong ol kaikai samting long stua. Bipo kain hevi i kamap mipela i save harim opis bilong Indipenden Konsuma na Kompetisen Komisn i kamaut na mekim wok bilong ol.

"Nau yet mipela i no harim liklik toktok bilong dispela komisn. Komisn i stap yet o i dai pinis? Mipela i mas save. Sapos dispela opis i stap yet dispela i min olsem opis i no mekim wok bilong em. Sapos em i mekim wok planti long dispela ol hevi bai i no inap long kamap."

Joe Tsiro i bilong Buka Not Solomon provins. Em i wok wantaim Sotel Welfe Dipatmen. Em i no amamas long wok bilong ICCC na i ting kain les wok bilong ol i mekim planti manmeri long kantri i bungim hevi nating.

"Mipela i no mas bungim hevi bilong ol prais o baim ol samting em i no gutpela long baim. Dispela long wanem ol opisa bilong ICCC na Invesmen Promosen Atoriti (IPA) no mekim wok bilong ol. Ol i save olsem planti ol Sainaman na PNG man tu i giman man. Ol i laikim mani tasol long helpim man tru dispela i nogat. Ol i no inap wari sapos prais ol i salim em i

stret o nogat. O sapos samting ol i salim em i orait yet long salim. Tingting bilong ol em long kisim mani.

"ICCC na IPA i stap long lukim gutpela wok bisnis i kamap tasol sapos tupela i no mekim wok bilong tupela em nau bai ol krangki pasin bai kamap. Nau yet nogat. Em i mas mekim wok."

Wangui Ahafia i bilong Amanab, Sandaun provins. Em i wok stap long Vanimo. Em i tok tupela sait wantaim i rong.

"Long sait bilong ICCC na IPA tupela i no mekim wok bilong ol. Long sait bilong ol bisnis o stua em i rong long salim ol samting we taim bilong ol long salim i pinis.

"Em i rong tu sapos ol i putim 50 pesen o 100 pesen long samting ol i salim. Dispela i min olsem ol i mekim krangki long kastoma. Long taim ol i kisim mani long wankain taim tu ol stua i mas laik lukim olsem ol kastoma i kisim gutpela sindaun o mani bilong ol i no lus nating.

"Ol i mas lukim velu bilong mani bilong ol. Na long sait bilong ol kastoma ol i mas sekim gut ol stua bipo long ol i go baim samting. Taim ol i mekim olsem ol stua i no mekim mani bai daunim ol prais kam daun bai ol kastoma i ken baim samting long ol."



Laikim Penpren

Nem: Tommy Rikau

Krismas: 25 (man)

Adres: PO Box 733, Wewak, East Sepik Province.

Save laikim: Go long lotu, stori wantaim ol pren, pilai gita, wokim gaden, raitim pas na wokim pren.

Nem: Mixman Areke

Krismas: 18 (man)

Adres: ECPNG Church, PO Box 181, Mt Hagen, Western Highlands Province.

Save laikim: Harim musik, pilai ragbi na mekim penpren na go lotu.

Nem: George Max Pakuni

Krismas: 17 (man)

Adres: ATB Resource Centre, PO Box 684, Mt Hagen, Western Highlands Province.

Save laikim: Ritim buk, harim musik, pilai volibol na ragbi tas, go long lotu, laik long raitim pas na planti moa.

Nem: Salome Kasi

Krismas: 18 (meri)

Adres: C/- Hawain Good Shepherd Parish, PO Box 107, Wewak, East Sepik Province.

Save laikim: Pilai netbol, lukim Sande nait muvi na wokim pren.

Nem: Nima Tapence Tatung

Krismas: 27 (man)

Adres: Ruango Primary School, PO Box 659, Kimbe, West New Britain Province.

Save laikim: Helpim ol narapela, go raun long narapela provins na raitim pas.

Nem: Lithecla Missy

Krismas: 21 (meri)

Adres: C/- Raheeb Oguo, # 176, Agona Swedru, Ghana, W/Africa.

Save laikim: Pilai spot, ridim buk, raun lukim ples na kukim kaikai.

Nem: Cathy Benny

Krismas: 20 (meri)

Adres: C/- Rosa Araboka, SIL, Employment Dept, PO Box 417, Ukarumpa, Eastern Highlands Province.

Save laikim: Pilai volibol, basketbol, soka na go long lotu wantaim ol pren.

Nem: Eric Dennis

Krismas: 25 (man)

Adres: DMP Disposol, PO Box 4355, Lae, Morobe Province.

Save laikim: Pilai volibol, lukim TV, stori wantaim pren, tisim ol pikinini na raun wantaim ol pren.

Nem: Benlee Walo

Krismas: 22 (man)

Adres: Don Bosco Tech, PO Box 848, Kundiawa, Simbu Province.

Save laikim: Harim musik, go lotu, pilai spot, mekim pren na salim poto i go kam wantaim pren.

Nem: Tom Merio

Krismas: 17 (man)

Adres: PO Box 3508, Boroko, NCD.

Save laikim: Pilai volibol, soka, go lotu, raitim pas long ol pren bilong narapela kantri na Papua Niugini tu na bungim ol nupela pren na stori nabaut.

Nem: Zillar Gigipari

Krismas: 19 (meri)

Adres: Seaview Hotel, PO Box 103, Wewak, East Sepik Province.

Save laikim: Go lotu, givim stia tok, serim tingting na serim tok bilong God.



STORI TUMBUNA

BIPO tru long taim bilong ol tumbuna i gat wanpela man na meri long Sentral provins na ol i gat tupela pikinini man. Wanpela moning ol tupela papamama i salim tupela pikinini man bilong i go painim abus long solwara.

Ol i go longwe tru na na ol i huk i stap. Tupela i hukim planti pis na pulapim kanu bilong tupela. Nau tupela i stat pul i kambek long ples long apinun. Na taim tupela i wok long pul i kambek ol sak i raunim kanu na pasim we bilong tupela. Nau tupela i stat long tromoi wan wan pis i go long ol sak.

Tupela i wok long tromoi olgeta pis long ol sak inap ol lukim ples na haus bilong ol i stap longwe tru. Taim tupela lukluk long

kanu bilong tupela olgeta pis i pinis na ol sak wok long bamim kanu. Bikipela brata i tokim liklik olsem katim mi i go liklik tru na tromoi i go long sak na pul hariap go long ples.

Nau tupela brata i krai na holimpas i go pinis na liklik brata stat katim bikipela brata. Em i wok long krai wantaim na pul hariap tru long go kamap long ples. Taim liklik brata laik katim narapela han bikipela brata i tok noken givim het bilong mi i go long sak. Karim het bilong mi go long ples na planim baksait long haus bilong yumi.

Nau liklik brata i harim tok bilong bikipela bilong em na taim katim bodi bilong bikipela brata em pul hariap. Em katim liklik bodi bilong bikipela brata em pul go inap em kamap long ples na planim het bilong bikipela brata bilong em long baksait long haus bilong ol.

Taim nait liklik brata slip bikipela brata i givim driman na tokim em long go sekim

baksait haus long moning. Long moning em bihainim driman bilong em na em lukim wanpela kokonas diwai i gro long dispela hap em planim het bilong bikipela brata.

Liklik brata i go antap long dispela kokonas na kisim wanpela na kaikai na painim olsem em i gat gutpela wara na kaikai. Taim em kaikai pinis em tokim olgeta lain long ples. Nau ol kaikai na kisim sampela long planim na ol kolim dispela kaikai kokonas.

Na taim liklik brata i lukim kokonas em save tingim pes bilong bikipela brata. Na nau kokonas i pulap long planti hap.

JB MUA

POT MOSBI

NCD



Mi laikim helpim long wari bilong mi

Dia Laiplain,

Mi kam long wanpela Kristen famili na mi gat boipren.

Prensip bilong mipela i bin stat taim mipela i skul yet long praimeri skul. Nau mi wok na boipren bilong mi em i no pinisim yet skul bilong em.

Mipela i bin bungim sampela hevi long prenpasin bilong mipela.

Olsem na long sampela mun, i no toktok long wanpela narapela. Tasol nau, mipela i toktok na stretim war na mitupela i poroman gut gen.

Wari bilong mi em, maski hevi i kamap, mi gat bikipela laik yet long boi ya.

Tasol mi no klia sapos bai mi maritime em. Nau yet, mipela i no gat strongpela plen long dispela.

Bai mi toksave long papamam bilong mi long dispela samting? Sapos, yes, bai mi toktok long ol olsem wanem?

Bai mi amamas sapos



Laiplain i givim sampela gutpela stiatok long mi.

GRATEFUL

Dia Pren,

Long lukim pas bilong yu, i luk olsem prensip bilong yutupela i wok long stap long sampela yia tasol bikos long sampela hevi, em i no stedi. Skelim wantaim dispela, yu ken glasim ol gutpela na nogut sait na wokim disisen bilong yu long en.

Inap yu ken tok long tingting bilong yu olsem ol hevi yutupela i bungim em ol i no bikipela na ol i no inap long bagarapim prensip bilong yutupela.

Yu no tokaut long ol hevi we i save kamap namel long yutupela na yutupela i no save toktok o lukim wanpela narapela long sampela taim. Yu tok yu gat strongpela laik long em, maski yu no klia gut yet sapos bai yu maritime em. Ating i moabeta sapos yu weit na monitaim prensip bilong yutupela, na bipo yu mekim disisen long maritime em.

Inap yu tokim papamama long prensip bilong yutupela? Dispela bai stap long save bilong yu, save bilong yu long papamama bilong yu na wanem samtign yu laik tokim ol long en. Long PNG, planti yangpela pipel i no save tokim papamama taim ol i gat boipren inap ol i laik marit na ol bai toksave long papamama bilong ol long nius ya. Sapos sosaiti bilong yu i laikim bai yu toksave long papamama olsem yu laik maritime boipren bilong yu, em i laik bilong yu long toksave long papamama.

Long wankain taim tu, sapos papamama i laik sea wantaim

yu long prensip na yu pilkim olseme dispela bai helpim yu long wokim disisen long maritime em o nogat, em i luk olsem dispela i gutpela aidia long toktok wantaim ol.

I moabeta yu tokim ol stret long pilings bilong yu long prenpasin namel long yu na boi ya na askim ol long tingting bilong ol long dispela. Bikos ol i papamama bilong yu, ol bai luksave long pilings bilong yu na helpim yu long wokim disisen.

Tingting bilong yu olsem yu no klia sapos yu bai maritime em o nogat, mipela i ting olsem yu mas gat moa taim long tingting, glasim na skelim ol samting inap yu gat strongpela tingting o yu klia long wanem samtign bai yu mekim long em.

Dispela bai helpim yu long pilim olsem yu strong na yu ken wokim ol disisen we bai i sut long prensip na laip bilong yu.

LAIPLAIN

Musik kontrak em i bikpela samting

SAPOS yu wampela man o meri husat i laik mekim nem long musik indastri, yu bai i mas save long ol dispela samting. Taim yu sainim wampela rekoding kontrak wantaim wampela bikpela lebol olsem Chin H Meen, i gat sampela samting yu mas sekim.

Namba wan yu mas save rekoding kontrak em i wanem samting. Rekoding kontrak em i wampela pepa i stap aninit long lo we i pasim yu olsem musik man wantaim rekoding studio olsem CHM. Dispela pepa nau em i wampela agrimen we tupela wantaim i mas bihainim inap dispela kontrak i pinis.

Long Papua Niugini yet, i gat moa long 20 indipenden studio i gat agrimen wantaim CHM. Ol dispela kain agrimen tasol i save sapotim ol musik atis long wok bilong ol.

Wanem as tru bilong rekoding kontrak? Rekoding kontrak em i wampela agrimen namel long ol musik atis o ben na rekoding studio. Dispela rekoding kontrak i tok klia long olgeta wok musik we tupela sait wantaim i

Cynthia Buckley-Igua i raitim

mas wanbel na givim tok orait bilong ol long en.

Long kamapim wampela gutpela rekoding kontrak, musik atis i mas wampela musik atis tru tru, na i no wampela giaman atis.

Narapela samting we i mas stap em 'demo' kaset o kaset we yu rekodim ol singsing na musik bilong yu long en i mas kisim tok orait bilong rekoding studio. Tude, em i isi tru long katim demo kaset bilong bilong wanem i gat planti rekoding studio i stap pinis insait long kantri. Na bai i isi tru long painim wampela gutpela studio husat bai i laik sapotim stail bilong musik bilong yu. Bihain long en, bai wampela rekoding kontrak bai i mas stap bilong yu long sainim bai yu ken rekodim albam wantaim dispela rekoding studio.

Yu, olsem musik atis i mas glasim gut olgeta samting i stap insait long Rekoding Kontrak Agrimen. Sapos yu no bihainim olgeta dispela toktok insait long agri-

men, bai yu no inap kisim olgeta winmani na ol arapela samting rekoding studio i tok orait long givim yu.

Taim yu sainim wampela rekoding kontrak wantaim CHM o wampela long ol indipenden rekoding studio husat i save wok bung wantaim CHM, yu bai i gat sans bilong promotim musik bilong wantaim tripela program bilong ol: Praise, South Pacific Music Program na CHM Super Sound Video Hits we i save kamap olgeta wik long EMTV o long ol radio stesen.

Bai yu stap long han bilong ol saun enjinia i gat bikpela eksperiens na save long miksim musik.

Ol dispela lain em ol i stap insait long musik indastri longpela taim pinis na ol i save gut tru long stretim musik bilong yu.

Taim yu kisim kontrak wantaim CHM, yu bai stap insait long wampela wok bung wantaim bikpela studio insait long PNG na studio we i save go pas long promotim olgeta lokal PNG musik hia insait long Pasifik Rijen na long ovasis tu.



• Taim wampela musik atis i sainim kontrak wantaim wampela studio, em i mas bihainim olgeta toktok insait long dispela agrimen. Biknem musik sta bilong Vanuatu, Vanessa Quai i sainim pinis wampela kontrak wantaim CHM Studios.



• Sapos ol musik atis i sainim kontrak wantaim CHM, ol bai kisim helpim long ol saun enjinia bilong studio. Ol dispela lain i gat bikpela save long stretim musik na rekodim

SEKIM TV LONG
DISPELA WIK

7.00PM - FONDE NAIT - CHM Supersound Video Hits

YU SAVE laik harim musik bilong yumi yet hia long PNG? Olgeta Fonde, yu mas sindaun isi na wetim CHM Supersound Video Hits. Dispela so i save kamap long 7 kilok long olgeta Fonde nait. Ol i save soim ol singsing we ol manmeri insait long kantri i save laikim, na ol i save soim ol nupela musik klip bilong ol singsing tu.



4.00AM - SANDE MONING - TRI-NATIONS RAGBI LIG New Zealand V Great Britain

LONG 4 kilok long Sande Moning em i sans bilong yu husat i save laik lukim ragbi lig. Dispela em i taim we yu ken lukim gem namel long New Zealand Kiwis na Great Britain Lions we bai i kamap long Ingran. Dispela gem i kamap long bik moning tru bilong wanem em bai kamap laiv long TV.



Vs

GREAT
BRITAIN

8.30PM - SANDE NAIT MUWI-COLLATERAL DAMAGE

Arnold Schwarzenegger em wampela faiaman. Taim ol teroris o man nogut i kilim famili bilong em, em bai go painim ol.

Sapos yu save laikim ol piksa bilong Arnold, bai yu laikim dispela piksa.



Kuri Rup tingim Baiyer Wara Haus Pisin

BIPO i gat planti singsing o albam i save singsing long ol spesol samting, maski em politiks, komyuniti o long sait bilong lotu, tasol nogat wampela inapim wampela albam nau tasol i kamaut. Nem bilong dispela albam em 'Paradise Arrow' na i kam long Kuri Rup ben bilong Westen Hailans.

Stori bilong dispela albam em long bus na ol animal insait long bus na olgeta samting God i mekim. Dispela albam i singaut long mipela ol man-meri long lukautim ol samting bikman i mekim.

Dispela albam em i kamap long wampela yangpela man husat i lusim wok moni bilong em bihain long gavman i no luksave na givim helpim long Baiyer River Bird Sanctuary o haus pisin bilong Baiyer Wara.

Haus Pisin long Baiyer Wara em i wampela haus pisin tasol insait long kantri tasol long 29 yia i go pinis, gavman i lus tingting long en, na nau i pulap wantaim ol kain kain bus rop, opis bilong menesmen i bagarap, na nogat mentenens i kamap long haus bilong ol pisin i no inap long flai.

I nogat moa kaikai bilong ol pisin na animal i stap yet long dispela hap. Bipo long indipendens, dispela haus pisin i bin namba wan insait long Saut Pasifik.

Nau namba bilong ol pisin na animal i go daun bilong wanem planti long ol banis bilong ol i bruk pinis.

Bagarap long dispela ples i bin sutim bel bilong wampela yangpela man Westen Hailans, nem bilong em David Kuri Small. Em i railim ol singsing long dispela albam long tokaut long hevi ol pisin na ol arapela animal long Baiyer Wara i karim taim provinse na nesenel gavman i lus tingting long ol.

Ol albam bilong em, David na ben bilong em i singsing na stori long laip na kaikai long Baiyer Wara Haus Pisin bipo long indipendens, long nau haus pisin i stap olsem wanem, na hevi bilong ol pisin taim gavman i lus tingting long ol.

Namba 5 singsing long albam em i wampela spesol dedikesen i go long haus pisin long singaut long gavman na ol arapela opis bilong gavman long strongim bek dispela haus pisin.

"Baiyer River Bird Sanctuary i go daun olgeta, ol pisin na sampela animal olsem ol sikau na ol kapul nau i nogat inap kaikai," David Kuri i wari na tok. "Bipo mipela ol pikinini bilong ples i save salim ol kaikai na kain kain kumu bilong ol pisin na animal, tasol nau i nogat gavman man i lukautim gut dispela ples, olsem na ol pisin na animal i wok long dai tasol."

David em bilong Kumbau Ples insait long Baiyer Distrik we i sindaun long boda bilong Madang na Is Sepik na Enga. Ples bilong em i sindaun ausait tasol long Baiyer Wara Haus Pisin.

Taim em i liklik yet, em wantaim ol kasen brata bilong em na ol arapela manki bilong ples i save salim popo, kaukau na ol kain kain kumu long Haus Pisin. Ol dispela kaikai i save go long ol pisin, ol sikau, kapul, muruk na ol arapela animal i stap long hap.

"Mipela ol pikinini i kam long ol famili i nogat planti mani, na mipela i save sindaun long moni mipela i save mekim long baim skul fi bilong mipela na ol arapela samting olsem tin kaikai, rais, suga na klos," David i tok.

"Na nau Baiyer Wara Haus Pisin i bagarap olgeta, mipela i painim hat tru long mekim moni."

David i autim bikipela wari bilong em tru long hevi bilong ol pisin long Haus Pisin. Planti long ol pisin na animal i ronawe na painim hat long lukautim ol yet.

"Em i bagarap stret na ol animal long hap i karim bikipela hevi tru."

Em i tok ol pipel bilong



Kimbau i wetim ol gavman opisa long mekim wampela samting bilong kirapim bek haus pisin bilong wanem ol manmeri i wok long givim kaikai nating long ol animal na i wok long givim bikipela hevi long ol pipel gen.

"Mipela i no laikim ol animal na pisin long dai bikos ol i nogat kaikai taim gavman i no mekim wampela samting olsem na mipela i save givim wanem liklik hap kaikai mipela i gat long ol."

Kuri Rup, nem bilong ben, i bin bungim olgeta samting bilong albam long Kumul Studios long Goroka long 2000. Bihain ol i bin wet long taim liklik bilong wanem studio i bin bungim liklik hevi wantaim ol masin bilong ol.


David, husat i bin go pas long ben na i save pilai bes, i kisim bek ol rekoding long Kumul Studios na em i askim George Siwi bilong Reko Sonics Studios long Goroka long stretim bek musik na mekim redi bilong katim kaset wantaim CHM Supersound Studios.

David i bin bungim inap mani long baim wampela balus tiket long kam long Pot Mosbi long 2001. Em i kam long askim CHM long produsim albam.

Albam bilong ol i bin kamaut long mun Oktoba, na i gat ol kain kain Hailans stori we em i tanim i go long singsing long tok ples Melpa, Tok Pisin, Enga, Madang na Erave.

Wampela long ol singsing, 'Sugar Meri' i wok long pairap strong long redio na Yumi FM i makim pinis olsem wampela 'Hit Prediksen'. Long dispela singsing, Kuri Rup i save singsing "yu no save sem liklik, raun raun tasol long olgeta hap bilong PNG, em yu Kwin bilong ol meri."

Ol i mekim pinis wampela



musik vidio klip bilong em na em i kamap long namba wan taim long CHM Supersound Video Hits TV program las wik tasol.

"Mi yet bai tokim yu olsem olgeta 10-pela singsing long dispela albam i stail tru, tasol strong bilong albam bai stap long 'Sugar Meri', 'Saina', namba tu singsing long sait 'A' na wampela arapela singsing ol i kolim 'Kuri Rup Kange', namba 4 singsing long wampela yangpela man husat i sanapim wampela liklik haus insait long diwai long taim holim pasim ol 'kumul' pisin long kisim naispela gras bilong ol," David i tok.

Longpela bilakpela gras bilong kumul em i bikipela samting long ol Paraka. Dispela i save makim laik taim em i sindaun antap long kangal bilong ol Westen Hailans man long taim bilong Moka o long ol arapela bikipela de bilong amamas.

David i bin lusim skul long 1995 long gred 4 na i go stret long musik. Tasol em i no bin i gat bek musik ben inap long 1997 taim em i statim Kuri Rup.

Long tripela yia bihain, Kuri Rup i pilai long olgeta 6 tu 6 danis long ples na long ol bikipela danis long Kokobango Klab long Maunten Hagen na long Las Paraka So long 2000.

Taim David i kamap long Pot Mosbi long tripela yia i go pinis, em i luksave olsem bai i long taim liklik long CHM Supersound Studios long givim luksave long ol rekoding bilong Kuri Rup bilong wanem

i gat planti bikipela wok.

Em nau em i traim long painim wok, na em i no tingting long go bek long Westen Hailans.

Em i stat long singsing bekap long ol arapela musik ben na em i save pilai raun wantaim ol insait long Mosbi siti na long Sentrel Provins tu.

Wampela long ol dispela musik man em Julius Maob taim em i katim namba wan solo singsing bilong em 'Zero Balance'. David i bin pilai bekap long dispela singsing nau i kamap namba wan bikipela singsing bilong Julius.

Julius i luksave long strong bilong David long musik na em i askim em long pilai musik bilong em long ol nait klab insait long siti. Em i pilai wantaim ol long Brown Riva na Sogeri insait long Sentrel provins.

"Mi bin kirap nogut long gutpela pasin bilong ol pipel bilong Koiari bilong Sogeri plato. Ol i lukim mipela olsem ol bikipela supasta stret na ol i mekim bikipela kaikai bilong mipela na ol i baim mipela gut tru," David i lap na tok. "Mi bai amamas long go pilai long Sogeri gen sapos mi gaf sans."

David i tok God i bin givim strong long em long pilai musik na em i laik yusim long helpim ol arapela, tasol em i laikim bai em i helpim ol pisin na ol animal long Baiyer River Bird Sanctuary long Westen Hailans.

***Yu ken ridim stori blong ol musik man/meri long What's On With Raitman insait long POST COURIER tasol, Trinde, olgeta wik.**

NATIONAL WEEKLY HIT PARADE

YUMI FM NATIONAL WEEKLY HITPARADE

Sarere Novemba 11, 2004

Twisties i sponsa

Singsing	Musik Atis	Dispela Wik
Sigi Mangi	Grumo Masalai	1 (4)
Awarmari	Uralom Kania	2
Iti Bayama	Armstrong Gomara	3
Sikul Sepik	Julius Moab	4
Sharon	Uralom Kania	5
Jombie Kunex	New Painim Wok	6
Hard Life	X-Anats	7
Luv Bait	K-Mala	8
Last In Line	Edwin Baffe	9
Naike	Hausboi	10
Ravaku	Jnr Iroakele	11
Modern Wali	Luke Banag	12
Zero Balance	Julius Moab	13
Liromauke	Phi Jay	14
Daon Anda	West Kadah	15
20 Toea	West Kadah	16
Sekol Das	Julius Moab	17
Kiri	Hausboi	18
Sad Feelings	Gideon Kepas	19
Neltien	Uralom Kania ft Moses	20

EMTV GAID

Fonde	Mande	Trinde	Sande
4/11/04	8/11/04	10/11/04	7/11/04
5.30 JOYCE MEYER MINISTRY	11.00 PRAISE	6.29 STATION OPEN	4.00am Tri Nation Rugby: Aussie v Great Britain
6.00 2002 WIMBLEDON	1.00 STATION CLOSE	5.30 JOYCE MEYER MINISTRY	6.30 IN TOUCH
9.00 CREFFLO DOLLAR	5.30 JOYCE MEYER MINISTRY	6.00 TODAY SHOW	7.00 IT IS WRITTEN
9.30 DR PHIL	6.00 TODAY SHOW	9.00 CREFFLO DOLLAR	7.30 BUSINESS SUCCESS
10.20 GRADE 7 SCIENCE	9.00 CREFFLO DOLLAR	9.30 DR PHIL	8.00 BUSINESS SUNDAY
11.10 GRADE 7 SOCIAL SCIENCE	9.30 DR PHIL	10.20 GRADE 7 SCIENCE	9.00 SUNDAY
12.00 GRADE 11 MATHS	10.30 GRADE 7 SCIENCE	11.10 GRADE 7 SOCIAL SCIENCE	11.00 SA v Old ING Cricket
12.50 GRADE 11 PHYSICS	11.10 GRADE 7 SOCIAL SCIENCE	12.00 GRADE 11 MATHS	1.00 Tri-Nation replay
1.30 GRADE 11 GEOGRAPHY	12.00 GRADE 11 MATHS	12.50 GRADE 11 PHYSICS	3.30 Wanderers Sevens Rugby
2.30 THE WIGGLES	12.50 GRADE 11 PHYSICS	1.30 GRADE 11 GEOGRAPHY	5.30 X-Team
3.00 BANANAS IN PYJAMAS	1.30 GRADE 11 GEOGRAPHY	2.30 THE WIGGLES	6.00 NATIONAL EMTV NEWS
3.30 JUSTICE LEAGUE	2.30 THE WIGGLES	3.00 BANANAS IN PYJAMAS	6.30 DISCOVERED 4th Semi final
4.00 HOT SOURCE	3.00 BANANAS IN PYJAMAS	3.30 COURAGE THE COWARDLY DOG	7.30 60 MINUTES
4.30 Y	3.30 COURAGE THE COWARDLY DOG	4.00 HOT SOURCE	8.27 EMTV TOKSAVE
4.57 EMTV TOKSAVE	4.00 HOT SOURCE	4.30 Y	8.30 MOVIE: Collateral Damage
5.00 THE PRICE IS RIGHT	4.30 Y	5.00 THE PRICE IS RIGHT	Action Thriller Movie: Arnold
\$100,000 SUPER SHOWCASE	5.00 THE PRICE IS RIGHT	\$500,000 SUPER SHOWCASE	
6.00 NATIONAL EMTV NEWS	6.00 NATIONAL EMTV NEWS	6.30 A CURRENT AFFAIR	
6.30 A CURRENT AFFAIR	6.30 A CURRENT AFFAIR	6.58 TOK PISIN NEWS UPDATE	
6.57 TOK PISIN NEWS UPDATE	6.58 TOK PISIN NEWS UPDATE	7.59 LOTTO DRAW	
6.59 LOTTO DRAW	7.59 LOTTO DRAW	8.00 ANIMAL HOSPITAL	
7.00 CHM SUPERSOUND	8.00 ANIMAL HOSPITAL	8.27 EMTV TOKSAVE	
7.57 EMTV TOKSAVE	8.27 EMTV TOKSAVE	8.30 WEDNESDAY NIGHT MOVIE: MY FORGOTTEN MAN: 1996	
8.00 SPORT SCENE	8.30 SOUL CITY	Drama: A biological movie on the film star's in early life before holly wood. Star: guy pearce	
9.30 BEST OF THE FOOTY SHOW	9.30 CSI - CRIME SCENE	10.30 SOUTH PACIFIC MUSIC	
11.00 EMTV NEWS REPLAY	11.30 NEWS REPLAY	11.30 EMTV NEWS REPLAY	
1.00 KING OF QUEEN	12.00 NIGHTLINE	12.00 NIGHTLINE	
1.30 NIGHTLINE	12.30 CLOSE	12.30 STATION CLOSE	
2.00 STATION CLOSE			



Bisnis bilong Groim Diwai insait long PNG - Yusim gut ol Renfores ples

Yusim ol graun we i gat fores o diwai long en

Olgeta hap graun we inap long groim diwai ol i ken yusim long tupela rot.

- Olsem ples we ol i ken kisim ol kain kain samting ol i kisim long ol diwai yet
- Ol i ken rausim diwai long yusim graun long mekim arapela wok.

Long ol man bilong bipo tru namba wan rot i bin bikpela samting long ol. Fores i bin givim ol:

- Ples bilong hait long ol birua bilong ol
- Kain kain kaikai olsem sayor bilong bus na abus
- Timba bilong mekim ol bot na haus
- Paiawut bilong hatim skin na kukim kaikai

Taim man i senisim pasin bilong em long raun painim kaikai tasol i go long planim kaikai wantaim save bilong wok agrikalsa, em i lukim ol fores olsem narapela kain samting: ol i go sindaun long ples we ol inap long groim ol samting bilong kaikai na bihain long kisim mani, na ol i daunim na rausim ol fores diwai.

Long wankain taim, wok agrikalsa i halivim man long sindaun gut, olsem na ol i painim ol nupela rot long yusim timba olsem wanpela samting bilong mekim haus na ol arapela samting na yusim olsem paiawut. Long dispela as tasol na man i luksave olsem agrikalsa i ken kamapim kaikai bilong lukautim bodi, tasol ol fores diwai i stap bilong halivim man long kamapim gutpela sindaun bilong en. Dispela luksave i bin bikpela taim namba bilong ol manmeri i go bikpela na moa fores diwai i lus. Long planti hap we i gat tropikel renfores, dispela hevi bilong namba bilong ol manmeri em i no long taim tasol na em i kamap bilong wanem planti manmeri i bin indai long ol dispela ples long ol kain kain sik bilong tropiks. Tasol nau mipela i luksave long ol dispela sik na painim rot long daunim ol, na mipela i kamapim ol strongpela gavman, namba bilong ol manmeri i wok long go antap hariap tru na nau mipela i stat long luksave olsem mipela i mas yusim gut graun na i mas i gat hap graun i stap we ol fores i mas stap bilong wanem em i bikpela samting.

Groa bilong namba bilong ol manmeri i soim ples klia olsem mipela i mas lukautim sampela ples we i gat diwai long en yet. I no bilong kisim tasol ol gutpela samting long ol sayor na diwai tasol. Bilong kisim ol bikpela samting we ol fores diwai i save givim olsem: banis na makim ron bilong ol wara; banis i lukautim ol plaua na animal olsem bikpela samting bilong kantri; na bilong lukautim ol ples olsem ol naispela samting bilong bus.

I gat tripela bikpela rot bilong yusim graun i gat fores diwai long en, tasol i gat ol arapela kain rot long yusim i stap tu.

1. Menesmen bilong dispela eria aninit long fores diwai bilong kisim ol gutpela samting em i save givim long ol bikpela na liklik plaua prodak
2. Lukautim eria aninit long ol diwai we i save givim sampela gutpela samting.
3. Senisim eria long fores i go long sampela arapela kain wok long graun we ol i save mekim wok olsem groim ol plaua bilong kaikai na bilong kisim mani.

Neks wik bai mipela i lukluk long wan wan long ol dispela arapela rot bilong yusim graun i gat diwai antap long en.

MCCARTHY & ASSOCIATES (FORESTRY) PTY. LTD.

National & International Forest Consultants

mccaf@datec.net.pg

"Long kisim tok stia long olgeta wok diwai?"

Lukaut long ol giaman bisnis ...Ol i gat rekod nogut

Christina Tony i raitim

WANPELA we ol manmeri ken lukautim ol yet long ol giaman bisnis em long lukluk long rekod bilong ol.

"Ol kain giaman lain save gat ol nogut regod tasol. Noken tru sapotim ol dispela kain ol man," pesman bilong Fabian Chow i tok.

Mista Chow i mekim dispela toktok bihain long stori i kamaut long *Wantok Niuspepa* llas wik olsem wanpela bisnis i wok long giamanim ol man long inves

long ol.

Dispela bisnis Papalain Asosiesen bilong Bulolo i wok long hait na giamanim ol manmeri long putim mani bilong ol wantaim dispela bisnis.

Papalain Asosiesen i save tokim ol manmeri olsem bai ol winim K50,000 sapos ol i putim K50 wantaim bisnis bilong ol.

Mista Chow ii tok olsem em i bikpela samting olsem ol man mas luksave long wanem ol bisnis i giaman na wanempela i tru. "PNG Semba ov Komes i save givim sevis long ol memba

bilong em. Mipela save skulum gut ol memba bilong mipela long ol kain giaman bisnis. Olsem na ol i no save putim mani bilong ol wantaim ol kain giaman lain."

Em i tok tu olsem ikonomi bilong kantri em i stap gut. "Em bai gutpela long ol bisnis sapos gavman i stap gut tu.

"Dispela bai givim sans long bisnis long kamap strong gen. Bilong wanem ol i kisim bin bagarap long ol yia i go pinis taim ikonomi i no bin gutpela tumas."




Painim Gol... Ol manmeri i painim ol ston we i gat gol long en long graun bilong Porgera Main long Enga provins. Ol i no sapos long mekim olsem.

Poto: FR PHILLIP GIBBS

Cat® D3G, D4G, D5G, Track-Type Tractors

Rugged construction, outstanding reliability - everything you expect from Caterpillar and more!



Outmanoeuvre every job you tackle.

A single lever joystick controls speed, direction and steering on Cat® "G" Series III Hystat Track-Type Tractors. Full powerturn capability is made possible by maintaining power to both tracks at any ground speed or turning radius.

- **Power Train** - Offering powerful six-cylinder Cat® 3046 engine that provides the power you expect from Cat tractors, and the productivity you need to increase your profitability.
- **Undercarriages** - Undercarriages are rugged with strong, durable components for long wear life and lower costs.
- **Operator Stations** - Excellent visibility down to the cutting edge, ergonomically designed controls and fully adjustable armrests for optimum comfort and productivity.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAUL
Phone: 982 1244
Fax: 982 1129



Kanage em raitman bilong Wari Vele. Olgeta hap em bai go kempen long nem bilong Wari Vele.

Kempen toktok bilong em i olsem Mi Wari Vele, Mi wari long yu, so yu mas votim mi, mi em raitman tasol!

Em wok long singaut singaut na kalap kalap na abrus na бага em pundaun long pletform na het win i go daun long graun.

Olgeta manmeri i rash i go long helpim em tasol Kanage em kirap na stopim ol olsem em i mas strong na sanap em yet.

Nokem helpim mi, mi raitman.. mi mas soim yupela olsem Wari Vele em strongpela man taim em sanap long palamen, gavaman bilong em bai strong olsem nau mi pundaun tasol mi kirap gen na sanap strong!.. Em mekim dispela toktok pinis na em laik sanap tasol ai bilong em i raun gen na em pundaun na hap indai.

Nau ol manmeri i no bisi long helpim em, ol sanap lukluk tasol na tok, em wari bilong em.

Kanage Boss- Mosbi

Tok pilai wantaim Kanage olgeta wik!!

Ol tru tru poro o wantok bilong gutpela raitman Kanage i laikim tru sapos yupela i ken salim sampela tokpilai bilong yupela i kam na mipela putim long tok pilai kona bilong Kanage. Salim i kam long TOK PILAI KANAGE P.O. Box 1982, Boroko NCD o kam long opis klostu long BSP Waigani na neksdua long Mondo Sekanhan klos stua. Mipela stap long las opis. Sapotim raitman bilong yumi Kanage!!

Kanage em spak long Simbu lods. Em i wanpela man i save tok-tok tumas na sampela taim em save hatim bel bilong ol man.

Long dispela de em spak i stap na lukim sampela ol oposisen lain i dring i stap na go tok pilai wantaim ol.

Tok pilai bilong em i no gutpela tumas na ol oposisen lain i kros na laik rausim Kanage tasol em i no bisi. Em hatim bel bilong ol i stap.

Nau olgeta i kirap na tmoi han long Kanage. Kanage em painim ples stret.

Em kirap na holim strong pos bilong Simbu lods na ol oposisen lain i wok long hanlek long na laik rausim em long pos na paitim em gut, tasol Kanage holim strong gut tru long pos.

Nau lain oposisen i givap na lusim Kanage na ol i go.

Kanage kirap na tok, "Em nau, sapos yu laik gavman bilong yumi i sanap strong, yu mas holim pos na sanap strong olsem mi!" Em tok olsem na em airaun na pundaun.

Kanage Boss - Mosbi

Kanage em ben lida long Buka. Em wanpela so-off man stret. Taim ben i save pilai, бага save go kisim maikrofon na singaut singaut i go long manmeri husat i kam long danis, "Yu wana rock?!! Yu wana

rock?!! Na taim olgeta i i tok yes, em bai kirap na tok, "Pik it ap long graun! Ol man save dai long hap toktok bilong Kanage.

Nau wanpela taim musik i hot tru na ol manmeri meri i mekimsave long danis, Kanage em spak nogut tru na long hap ples ben i pilai i stap em rausim khaki siot bilong em na tromoi i go long manmeri i danis (olsem ol hot rock ben long Amerika) na em kisim maikrofon na bikmaus, "Rok it!! Rok it!!

Pati i pinis nau na Kanage i painim khaki siot bilong em, em kirap na kisim maikrofon gen singaut long ol manmeri husat i holim siot bilong em na plis ritenim siot bilong em.

Samting tru em khaki siot i kamap olsem rag bilong karanas long ples bilong danis.

Kawas klab

Kanage em bos bilong Fire Brigade long Boroko. Em singautim olgeta wokman long kam long asembli na em laik mekim samplea strongpela toktok long we bilong hendolim paia.

Noken pret long paia! Sapos paia i kirap, fes tingting em long seivim laip bilong ol manmeri, beibi o ol domestik animals.

Wok bilong yumi em i impotent tru long PNG.

Em wok long toktok i stap na i no save olsem long baksait bilong em opis bilong em i paia i stap.

Ol arapela wokman i laik tokim em tasol Kanage i tokim em long pasim maus taim em toktok long asembli.

Taim Kanage i smelim paia, em askim wanem samting i paia na smel istap. Ol wokman i kirap na tok, "Bos, opis bilong yu i paia i stap.

Kanage i tanim na lukim tru olsem opis bilong em i paia na em singaut, Maski long ol arapela samting seivim pusi bilong mi!!

Kanage i lus ting olsem seketeri bilong em tu i stap insait na em i no bisi long em. Em wari long pusi bilong em.

Em nau, paiahaus long Boroko i kamdaun.

Mangi 4 mail.

Kanage em man bilong tanim tok. Wanpela taim wanpela evenjels i kam long Amerika na i autim tok long Hagen siti. Planti tausien manmeri i kam bung long harim evenjels i autim tok.

Taim evenjels i autim tok na wokabaut long gren sten i go i kam em mekim eksen wantaim.

Em mekim eksen i go na tromoi han wantaim na han bilong em abrus na givim hatwan long wan-

pela baket ol i planim flawa long en na bilasim gren sten.

Em nau taim bilong Kanage long tanim long tok pisin na em tu i mekim wankain eksen olsem evenjels i mekim. Em bikmaus na ron i go i kam long gren sten na sut han long wanpela botol wantaim flawa i go pundaun long graun.

Ol manmeri i lukim na skelim dispela eksen na kisim kainkain tingting long hau na gutnius i go wantaim ol baket na botol flawa i pundaun nabaut long fran.

Masta Wai Mosbi

Junia Kanage i karim ol drai kokonas mama bilong em i givim long go givim long ol lain long neks haus.

Junia Kanage karim ol drai kokonas igo na nok long dua. Taim ol lain long neks haus i opim dua ol i lukim Junia Kanage wantaim ol kokonas long han na ol i askim, boi, em kokonas bilong husat. Junia Kanage bekim na tok, anti kuyau blong yu. Olgeta lain i lap dai stret bikos i no kulau. Em drai ya.


Kit Mero Renbo

TOK PILAI wantaim KANAGE



SALIM OL TOK PILAI BILONG YU I KAM NA BAI MI PUTIM INSAT LONG DISPELA PESI

KANAGE GO LONG HOS RES LONG GODENS LONG TRAIM LAK BILONG EM LONG KONIM OL MAN LONG KISIM MONI...



HAI! CATCH ME IF YOU CAN EM RAIT HOS YAH! HAI MAKET!

NAU EM I GO NA KONIM OL MAN OLSEM DISPELA HOS BAI KAM IN...



MI GIVIM YU TIP, BETIM LAS HOS, SAPOS EM I KAM IN, YUMI 50-50 LONG WIN BILONG EM!

TRU AH?!

MAKET BILONG EM 50 tu 1.. YU BETIM KSO BAI YUMI WINIM 2 GREN YA! BAI YUMI RICH YA!!



MI 40 BETIM NAU!

NAU RESIS I STAT NA HOS BILONG KANAGE EM PAINIM PLES... I NO KAM IN...



OH-HO!! ATING MI MAS GO NAU!

HOS NAMBA FAIV I KAM IN... OLGETA MAN HUSAT I BIN BIHAINIM TOKTOK BILONG KANAGE I KROS NA GO PAINIM KANAGE...



EM WE!?! KANMAN!

KANAGE EM LUS PINIS...

PORT MORESBY CRICKET ASSOCIATION INC.

SEASON 2004/2005 - WEEK 6 DRAWS

Saturday 6 November, 2004

Venue	R4	A GRADE(2 Day) contd	Time	Mat/Stumps
Amini		Chubb United vs OS Hoods	10.00	OSHoods (Assn)
Colts		Raukele vs BNG Poreporena	10:00	BNG PCC (Assn)
R4		B GRADE (40 overs)		
STC		OS Hoods vs Curries	12:30	Curries
Nomads Mobil		Steamships vs Dogura	12:30	M/STC
MB		Coasters vs Kempa	12:30	Coasters
HMS2		BNG Poreporena vs Mariners	12:30	Mariners
R4		UNDER 19 (30 overs)		
Nomads Mobil		Steamships vs Dogura	8:10	M/STC
MB		Kempa vs BNG Poreporena	8:10	Kempa
R3		UNDER 17 (25 overs)		(Stumps only - Mat Optional)
STC		Raukele vs Mobil Steamships	8:10	Raukele
KCC		KCC vs Kempa	12:30	KCC
R3		UNDER 15 (20 overs)		(Stumps only - Mat Optional)
Rules		Raukele vs BNG Poreporena	9:00	Raukela
KCC		KCC vs Mariners	9:00	KCC

R3	WOMEN'S (25 overs)		(Stumps Only - Mat Optional)
Rules	Coasters vs Dogura	12:30	Dogura
HMS2	Mariners vs Chubb United	8:10	Mariners
Sunday 7 November 2004			
R4	A GRADE (2 day) contd		
Amini	Coasters vs Dogura	10:00	Dogura (Assn)
Colts	Mobil Steamships vs Mariners	10:00	M/STC (Assn)
R4	B GRADE (40 overs)		
STC	Chubb United vs AHC	12:30	AHC
Nomads	Raukele vs PB Cheung	12:30	Raukele
MB	KCC vs Pari	12:30	KCC
R 4	UNDER 19 (30 overs)		
Nomads	Raukele vs Mariners	8:10	Raukele
MB	KCC vs Pari	12:30	KCC
R3	UNDER 17 (25 overs)		(Stumps Only - Mat Optional)
Rules	Chubb United vs Mariners	2:10	Chubb United
HMS2	BNG Poreporena vs Pari	8:10	BNG PCC
R3	UNDER 15 (20 overs)		(Stumps Only - Mat Optional)
Rules	Coasters vs Mariners	8:00	Coasters

Rules	Chubb United vs OS Hoods	11:00	OS Hoods
-------	-----------------------------	-------	----------


R3	WOMEN'S (25 overs)	(Stumps Only - Mat Optional)
----	--------------------	------------------------------

HMS2 BNG Poreporena vs KCC 12:30 BNG PCC

BYE: UNDER 15 - Pari

Notes:

- 1) Umpires: Club captains to make alternative arrangements if the appointed Umpire is not in attendance.
- 2) Umpires to declare the winner, must print their names in the scorebook as well as sign the book.
- 3) Both Scorebooks to be completed with names of bats men, bowlers, catches, wicket-keepers, DNBs and the winner declared. Penalty: one point.
- 4) A further penalty for two (2) competition points for failure to hand in yours scorebook to Tony Elly's residence at Hohola by 7pm after the match.
- 5) Balls: 'A' Grade "Googly" (K50), Lower grades "Gem" (K40)
- 6) Coasters U19, OS Hoods U17 & Raukele Women have been excluded.



oop.. meri yah ating i tok taim em i abrusim bal llong Pot Mosbi kriket meri.



Ol boi ros bilong Iros soka klab bilong Iros ples, Manus, husat i kam pilai long PNGFA soka resis long Lae long las mun. Ol i kamapim gutpela pilai.



Pot Mosbi sofbol 2004-2005 sisen i stat gen wantaim ol prisen pilai bilong ol meri. Pilai ya i stap name! long ol AB Bears (beta) na Wantoks.



• Mama mi hal Baga man ya i krai taim em i kisim takol long birua pilaia bilong em long Pot Mosbi skul Ragbi lig resis long las Sande.

Mcrae i redi long bungim Kangaroo

MCRAE i tok em i bilip tim bilong em bai kam bek strong long taim ol i bungim gen Australia husat i winim ol 12-8 long las minit bilong gem.

Mcrae husat i lukim moa long 300 gem wantaim ol klab olsem St Helens, Gateshead na Hull na em i tok level o we bilong pilai long England I go antap long ol yia i kam na ol i gat sans yet.

Em i wokim dispeal tokto kbi-hain long rm i kamap long ples bilong em na lukim dispela ragbi lig trai nesen gem bilong Austrealia na great Britain TV bilong em.

Mcrae husat i wanpeal kosa insait long Supa Lig long England i makim wanpela fowet bilong Great Britain, Stuart Fielden olsem wanpela gutpela fowet pilaiia usait bai i nap kamap olsem Wantok bilong em Adrian Morley husat i save pilai wantaim Sydney Roosters sapos em tu i pilai insait long NRL.

Em i tok ol narapela pialaia long tim bilong Great Britain tu inap kamap gut sapos ol i pilai long Australia na em i tokaut tu olsem South Sydney Rabbitohs i lukluk long kisim sampela ol pilaia bilong England.

"Mi ting olsem dispeal gem i soim olsem planti samting long sait bilong gem long hap i kamap orait," Mcrae i tok.

"Mi ting dispela ol gem bilong NRL we i save kamap olgeta wik i moa strong long Supa lig, pilai bilong NRL i moa hariap na bai pilai inap long 80 minits long hia na long England yu ken go insait na kamaut ken long malolo.

"Long sait bilong skil na level bilong gem em mi lukim olsem planti samting i wankain tasol," Mcrae i tok.

"I gat sampela ol gutpela pilaia i stap long hap na mipela i luksave long planti bilong ol long dispela gem bilong ol wantaim Australia.

"I gat sampela pilai i stap tu husait ol i no pilai long dispela gem na mipela (Souths) bai lukluk long ol," em i tok.

Mcrae i bin stap olsem asisten bilong bipo kosa bilong Canberra Raiders Tim Sheens long tai mo! Raiders i wanpela strongpela tim long Australia na emd i bin stap tu long kosing staf bilong Australia taim Bob Fulton i stap kosa tasol em i marit long England olsem na me i toke m i no hariap long go bek long Australia.

Em i tok dispela em i gutpela sans bilong em long kosim Souths husait ol i gat gutpela pasin o tredisen long klab na long wok aninit long sief eksekutiv Shane Richardson husait em i bin bos bilong em taim em i kosim Gateshead na

Hull.

"Long long wanem kain klab bkpela ting em long stap wantaim, bilip long wanpela na narapela na wokbung wantaim, dispela kain samting em mipela i laik ol pilaia bilong mipela i mas gat," Mcrae i tok.

"I gat tupela pilai tasol em mi wok wantaim ol bipo pinis, em Scott Logan na Willie Peters olsem na dispela i gutpela bilong wanem mi bai i gat sans long save gut long ol na ol tu bai inap long save gut long mi, mipela bai traim long helpim ol pilaia long traim na kamapim wanem samting mipela i laik kisim."

"Mipela i mas lusim ples daunblo long pons lada na traim go antap na mipela i bai inap long wokim dispela sapos ol pilaia i tren na pilai strong, ol kosing opisa na ol lain lukautim edministresen i wok bung strong wantaim bai mipela i nap long kamapim dispela," Mcrae i tok.

Em i tok tu olsem em i amamas long Bryan Fletcher i ken stap kepten yet tasol em i laik toktok long dispela wantaim em pastaim bpo long em i makim ken olsem kepten bilong klab long 2005.

Ol narapela ki pilaia Souths i kisim ol bilong 2005 sisen em Shannon Hegarty na Peter Cusack, Adam na Luke Macdougall, Ashley Harrison.

Klostu olsem \$40 milion bai i go long wokim nupela siti swimming pul senta long Ultimo eria insait long Sidni Australia.

Ol bai i neimim dispela pul bihain long dispela biknem Australia swimmer, Ian Thorpe.


Lod Meya Clover Moore itok work bilong dispeal swimming pul igo het nau we bai itukim igat wanpela pul, fitness senta, sauna na stim rum.

Dispela senta bai igat wanpela 50 mita pul, leisa pul na hydroterapi pul wantaim remp. Wanpela sauna, stim rum, na wanpela fitness senta we igat spots marasin hausik na kar pak inap long 99 kar olgeta.

I bin gat bkpela kross namel long ol lida manmeri long wokim dispela bkpela spots senta. Fes proposal long wokim dispela pul i bin kamapim bkpela komplek na olpela lod Meiya blo Ultimo Frank Sartor imas seninsim ting ting bilong em.

Bihain ol manmeri bilong Ultimo i bin mekim bkpela kempein we i bin fosim nua Lod Meiya long usim olpela proposal na wokim dispela projek. "Dispela pul projek i wanple win bilong ol siti manmeri". Mr. Moore i tok bihain long gavaman i tok olrait long wok i ken go het.

Nau yet Thorpe i namba wan man long 100m bataflai long wol.



Atis disain bilong Ian Thorpe pul long Sydney

Makybe Diva mekim histori

LONG 144-yia histori bilong Melbourne Kap hos resis hap aste hos Makybe Diva i namba wan hos long winim Kap tupela taim.

Em long wanpela yia bihain long narapela yia tasol. Em i win namba wan taim long las yia. Long taim resis i kamap moa long 98,000 manmeri i stap long ples bilong resis long lukim. Long las mun tasol dispela hos i winim bkpela Sydney resis.

Man husat i ronim dispela hos em Glen Boss

husat i ronim tu long Sydney resis. Trena bilong em Freeman i gat histori long trenim foapela hos we ol i winim Melbourne Kap.

"Em i olsem yu gat Krismas presen we yu hat long opim," Freeman i tok bihain long Makybe i win.

"I luk olsem em i wanpela namba wan hos tru long ron long dispela resis," em i tok.

Namba tu long Makybe Diva em Vinnie Roe bilong Ireland na namba tri em Zazzman.

Liklik taim bipo long resis ren i bin pundaun na planti manmeri i ting Roe bai win long wanem em i hos bilong ron gut long ples i malulum. Na olsem ren i pundaun olgeta tingting i pas long Vinnie Roe. Tasol ren i no bkpela tumas na dispela i helpim Makybe Diva long kam hom. Diva i gutpela long drai ples.

Planti manmeri long Papua Niugini tu na ol narapela kantri long wol i save putim was long dispela resis.



Makybe Diva wantaim raida bilong em Glen Boss long biknem Melbourne Kap hos resis long Tunde. Bihain em Vinnie Roe na Zazzman.

Australia meri winim namba tu wol tenis pilai long Yurop

Alicia Molik i pinisim dispela sison gut tru taim em i winim 18 yia old meri Rasia Dinara Safina 6-3, 6-4 long Luxembourg Open.

Long dispela gem long Luxembourg Molik i bin winim Maria Sanchez Lorenzo long seken raun. Bihain em i winim Tatiana Golovin long kota fainols. Long semi fainols

em i winim meri Italy Silvia Farina Elia 6-2, 6-2 long go insait long gren fainol wnatim Dinara

Dispela em i numba tu Wol Tennis Asociasen (WTA) win bilong Molik insait long wanpela wik tasol, we Molik i winim win-moni olsem \$302'200.

Nau yet i tuk olsem Molik bai kamap olsem fes meri


long Australia long stap insait long wol top 10 wumen tennis.

Dispela meri Adelaide nau i go antap long 13th ples bihain long em i pilai long Luxembourg. Sapos em i winim Advanta Sempionsip long dispela week bai em i go long numba 12 plaisin.

Long histori bilong Australia wumen tennis, las meri long wokim top 10 em Wendy Turnbull long 1985. Evonne Goolagong Cawley i narapela meri husait i bin winim ol bkpela gem lon Wimbledon long 1980. Molik ino binwinim wanpela bkpela gem tennis yet. Las taim long em go klostu em long 2004 Australian Open we em lus long numba fo raun.

Las week Molik i bin winim Wimbledon sempion Maria Sharapova insait long Swisscom salens long Zurich.

Na long ol man tennis, Andre Agassi ino gat sans nau long pilai insait long Stockholm Open tennis fainols bihain long em i lus 3-6, 6-3, 7-6 (7-4) long Thomas Johansson. Agassi bai igo long Paris nau long Paris Masters. Long indoor tennis Mikhail Youzhny i winim Karol Beck 6-2, 6-2 long St Petersburg Open. Amelie Mauresmo i winim Elena Bovina 6-2, 6-0 long Linz open.



Alicia Molik husat i winim Itali meri Silvia Farina long Luxembourg Open 6-2, 6-2 long wiken.

Stori bilong ol tingting bilong Elizabeth Wells, Presiden na Kosa bilong Papua Niugini Swimming Inc long ol kaikai em spotmanmeri i mas kisim long taim bilong tren.

Ol kaikai bilong stap tren long pilai spot

Andrew Molen i raitim

PILAIM ol kainkain spot em i gutpela long wanem dispela i save mekim yumi i stap strong we yumi i no pilim skin i dai na les.

Long wanem kain spot yumi save pilai, yumi i save tren gut long em pastaim yumi go na pilai. Na taim yumi pilai yumi bai pilai gut.

Tasol bodi i no inap kisim nating strong long mekim ol eksesa o go pilai. Em i nidim kaikai na wara.

Olgeta kaikai bilong stap long trening i no wan kain long olgeta spot. Wanwan spot i laikim kaikai em i gutpela long en. Tasol bikpela samting em sampela kaikai i gutpela olgeta spot.

Hia Elizabeth Wells, presiden bilong PNG Swimming Inc husat i kosa na trena tu bilong swimming i tokaut long sampela kaikai we ol spotman na meri i mas kisim long taim ol i stap long trening:

Sampela mun i kam nau ol lain i askim mi long rait long wanem kain ol kaikai i gutpela long bodi na bai helpim ol spotlain long pilai na stap strong long tren, Wells i tok.

Namba wan lo em i olsem yu mas kaikai ol kaikai i gat planti kabohaidret o marasin i save givim strong na enejil long ol masol.

Kabohaidret em i wanpela bikpela samting insait long ol kaikai long strongim ol masol bilong ol lain husat i save tren planti. Tasol dispela marasin i no save stap insait long bodi longpela taim long



Sapos yu go long stua go lukim ol wokmanmeri long helpim yu baim gutpela kaikai.

pela long kaikai dispela ol samting wanwan taim na i no olgeta de.

Lo namba tri i tok yumi mas kaikai tu ol kaikai i gat planti kalsium o marasin bilong strongim bun. Ol lain krismas bilong ol i stap namel long 13 na 19 i mas kisim planti long dispela bilong wanem strong bilong bun bilong ol long dispela taim i save go daun.

Yumi olgeta i mas kisim liklik kalsium long bodi olgeta de. Ol kaikai i gat kalsium long ol em milk, banana na hatpela soklet, sis na yes, fevret bilong yumi olgeta, tinpis tu inap givim yumi planti kalsium tasol yumi mas kaikai bun bilong em wantaim.

Lo namba foa em kaikai ol kaikai i gat planti ain long ol. Ain em i gutpela long helpim blut bilong yu long karim win o oksijen raun long bodi bilong yu na i go long ol masol.

Sapos i nogat inap ain long blut bilong ol lain husat i save tren hat strongpela spot bai i ken mekim ol i tait hariap, sot win na skin i les long tren o pilai gut.

Ol meri na ol yangpela spotmanmeri i mas kisim planti moa ain long kaikai bilong ol. Ol kainkain kaikai olsem ret mit na liva bilong ol abus i gat planti ain long ol. kakaruk na selpis.

Ain i stap tu long kiau, kumu na ol gaden kaikai tasol i save stap hait long ol na bodi i save kisim liklik tasol.

Long helpim bodi long painim na kisim ain long kainkain ol kaikai olsem, yumi mas kaikai ol kaikai i gat vitamin C olsem tomato, kepsikam na jus bilong ol prut long wankain taim.

Lo namba faiv em dring planti wara.

Bipo long yu tren, taim yu tren i stap na bihain long yumi tren yumi i mas dring wara.

Yumi mas dring wara inap tupela lita olgeta de long kisim ples bilong wara we i save lus long bodi.

Yumi save dring wara long helpim bodi long kolim skin na tu long stopim bodi long noken drai.

Yu mas stat nau long dring planti wara taim yu tren i stap o taim yu pilai. Yu bai amamas long trening na pilai strong sapos yu dring inap wara.



Sapos yu manmeri bilong mekim gaden yu ken groim gutpela kaikai yu yet. Hia meri Goroka husat i stap long Gaden Hill i salim kumu long Gaden Hill maket, Pot Mosbi.

wanem em i pinis hariap taim bodi i wok o tren hat. Dispela i min olsem sapos yu mekim moa trening orait yumi mas kisim moa kabohaidrets i go insait long bodi bilong yumi.

Sampela ol kaikai i gat planti kabohaidret long ol. Ol kain kaikai olsem rais, nudols, bret, skon, ol liklik kek, ol prut, jus, drai prut, prut i stap insait long tin, kon, patete na kaukau na bin.

Dispela ol kaikai i gat planti long ol narapela marasin i stap long ol tu olsem protin, ol vitamin na ol narapela mineral long strongim blut, bun na ol masol. Long kisim moa strong kaikai ol samting i gat planti faiba olsem braun rais, witmil o braun flawa na em i gutpela tu long kaikaim ol samting i stap long skin bilong ol yet olsem prut long gaden o maket. Ol kaikai i gat planti suga long ol tu i ken helpim long apim level bilong kabohaidret long bodi. Em i gutpela long kisim taim yu tren na bihain long yu tren.

Lo namba tu i tok noken kaikai planti ol kaikai i gat gris na oil long en. As bilong dispela em olsem dispela ol gris i save rausim enesi i kam long ol kaikai i gat kabohaidret na putim i go stap long narapela hap insait long bodi.

Em i gutpela long olgeta spotsmanmeri i no ken kaikaim ol kaikai i gat planti gris na oil long ol.

Sampela ol kaikai yumi save laikim olsem soklet, kek, ais krim, sips, sispop i gat bikpela oil long ol na sapos yu i laik lukautim bodi bilong yu orait em i gut-



Hia liklik meri wantaim tumbuna mama bilong em i salim gutpela banana long maket.

Straika Posman helpim Rapatona long win

Pahun Maisan i raitim

STRAIKA Chique Possman i mekim wampela stail kik long helpim Rapatona winim PS Rutz 1-0 long Pot Mosbi Soka gren fainol.

Bipo kepten bilong Papua Niugini soka tim Geoffrey Emang na Possman i bin wokim wampela liklik trik namel long namba wan hap we i lukim Possman i trik PS Rutz gol kipa Tua Haro long sutim bal i go insait long umben.

Taim pilai i stat tupela tim i bin pilai strong tru. Eric Komeng, Frank Tulem, Paskalis Atolau na PS Rutz kepten Nathan Vincent i bin pilai strong stret long fowet eria.

Ol beks bilong Rapatona i strong tru. Planti taim ol PS Rutz i kam daun long gol maut bilong ol Rapatona tasol

strongpela beks olsem Kialou Pouru, John Baulo, Ricky Mesak na Duri Yarawi i blokim na salim bai i go bek antap.

Bihain long 30 minit i stap long pilai i go hap taim Chique Possman i kisim wampela lus bal klostu long PS Rutz gol maut. Em i salim dispela bal igo long Emang husat i trikim ol beks bilong PS Rutz na putim long sait stret we Possman i no mis long salim i go insait.

Bihain long hap taim ol PS Rutz i kam bek strong tru. Planti taim ol i salim ol strongpela kik i go insait long Rapatona gol maut.

Planti bal i abrusim gol maut na plai i go autsait, sampela bal i luk olsem bai i go insait long gol tasol biknem goli bilong Papua Niugini Tapas Possman i blokim gut tru.

Dispela kain pilai i mekim na

ol sapota lus tingting long sindaun, ol i sanap na taitim bun taim bal i no go insait long gol. Mekim i go na ol polisman i mas i go na rausim ol manmeri husat i pulapim beksit long gol pos.

Frank Tulem husat i mekim ol strongpela ron i luk olsem em bai skoa liklik taim i lukim em i mekim wampela kik i bin mekim bai klostu kamapim dro tasol longpela bun bilong Rapatona Ricky Mesak i blokim em gut.

Laspela faiv minit i stap na kepten bilong PS Rutz i go klostu long Rapatona gol maut, nogat wampela beklain pilaia i was i stap tasol kipa Possman i blokim dispela las sans bilong PS Rutz long skoa.

Dispela i namba tu win bilong Rapatona bihain long ol i bin win las taim long 1989.

Na tu dispela em i las gem bilong Emang husat i pinis long pilai long primia divison. Em i kam insait bihain long Pot Mosbi soka i suspendim Ravu Habuka taim em i pilai nogut wantaim ol Cosmos long las wik. Na long gren fainol bilong ol meri bikpela senis i kamap long Mosbi soka bihain long ol meri Lamana i winim sempion klab Telikom. Telikom i holim taitol klostu 10-pela yia. Lamana i winim Telikom long sut aut bihain long tupela tim i dro 0-0 long ful taim.

Bihain long gem i droa long full taim. Tupela tim i go long penalti sut-aut. Tasol yet skoa i stap 3-3. Bihain long dispela i gat i sadden det kik. Telikom Patricia Logha i traim na i brus we bihain long em gol Lamana kipa Dorris Lus i kisim dispela las kik we i no abrusim net na givim ol Lamana win.

Manus Iros mekim nem long PNGFA soka klab sempionsip



Ol manki Iros.

Pahun Maisan i raitim

IROS soka klab husat i makim Not Wes Manus Soka Asosiesen long Nenesel Sempionsip long Lae long mun i go pinis bin soim sampela gutpela pilai tru.

Dispela em ol manki bilong ples stret na ol i kam traim lak tasol.

Iros na tupela tim gen bilong Manus Soka Asosiesen i bin kalap long sip i kam sua long Madang na bihain kisim bas na go long Lae.

Aninit long het kosa Simon Lelei, ol manki i bin pilaim tripela gem long namba wan de bilong tonamen i stat.

Ol i pilai wantaim Royals bilong Madang we ol boiros i winim dispela pilai wantaim 1-0 skoa. Straika Danny Laming i bin skorim dispela gol.

I no long taim ol i go insait long fil gen na pilai wantaim Pot Mosbi Univesiti. Long dispela gem, ol Iros i givim bikpela poret tru long dispela tim bilong Pot Mosbi inap klostu ful taim na Bobby Lamond bilong Univesiti i skorim gol na win 1-0. Na long laspela gem bilong dispela de em ol i pilai wantaim Wes bilong Kimbe Soka Asosiesen. Ol Iros i autim ol 1-0.

Long namba tu de ol Boiros i pilaim wampela gem tasol agensim Blue Kumuls bilong Hagen. Ol i no laki tumas long skorim gol olsem na ol i dro 0-0.

Long namba tri de, Iros i dro gen 0-0 wantaim wampela tim bilong Enga tasol long laspela pilai bilong ol wantaim ol Vudal bilong Popondetta, ol Boiros ya i autim tiket bilong Vudal 3-0.

"Mipela i kisim planti telefon kol tru i kam long ol Not Wes Manus komyniti long Manus, Madang na Mosbi long taim mipela i pilai na tu taim mipela i pinis na stap malolo long haus. Dispela em i givim mipela gutpela sapot na i givim strong long ol manki long pilai," tim menesa Jerry Sapalojang i tok.

"Mipela tu i amamas bikos em nambawan taim bilong mipela i kam aut tasol mipela i no larim ol tim i skorim planti gol long mipela.

"Mipela i bin skorim 4 gol na ol narapela tim i skorim mipela 3 gol tasol long tonamen. Long 6-pela gem ol manki i pilai, ol i winim 2-pela, dro 2-pela na lus 2-pela. Dispela i soim olsem mipela i wokim gut liklik long ol narapela tim," tim menesa i tok.

Sapalojang i givim tok tenk yu olgeta lain, Iros & Iewa Madang, Iros & Iewa Lae, John/David Faunt & Famili Lae, Not Wes Manus komyniti Pot Mosbi, Manus komyniti Telikom Koles Lae, Cathy Thatchenko & famili Pot Mosbi, Ago Kavagana & Famili Madang, Manus Gavana, Hon. Jacob G. Jumogot, MP long sapot bilong ol.

Nandex i redi long narapela wol taitol pait

Andrew Molen i raitim

PAPUA Niugini sempion kikkoksa Stanley Nandex i tok em i redi tasol long pait gen na traim long kisim dispela wol taitol.

Bipo long em i bungim gen Chris "White Sniper" Johnson bilong Niu Silan em bai go pait long Melbourne, Australia.

"Tupela mun bihain long pait bilong mi long Melbourne bai mi pait gen wantaim Johnson long kisim wok taitol," em i tok.

Nandex bai i lusim kantri long Novemba 2.

"Mi wok long tren strong long wan na hap mun nau long dispela pait na mi redi na mi gat strongpela tingting long pilai gut," Nandex i tok.

Dispela pait bai i lukim em i bungim pes wantaim Mike Jambidis long 76kg divison insait long A-1 kikkoksing wol kap salens na bai i kamap long Vodafone Arena long Novemba 28.

Olgeta paitman bai i kam bung long resis long \$60 000 (dollar) prais mani.

Nandex i tok bihain long dispela wol taitol pait bilong em, em bai malolo liklik na bihain i stat tren gen. Nau yet em i fit na strong na i redi tasol long dispela pait.

"Mi bin lusim dispela (wol taitol) pait tasol mi yet mi no lusim wampela samting, mi fit yet, strong bilong mi i stap yet na mi gat strong-

pela tingting tu long pait," em i tok.

Em i tok em i kisim sampela moa save na strong long dispela wol taitol pait bilong em na bai yusim dispela long ol trening bilong em long redim em long Melbourne.

Long trening bilong em, Nandex i wokim sampela ron an apim sampela wet o ol samting i gat bikpela hevi na em i wokim sampela wok long ol peten na we bilong pait.

"Mi wokim dispela ol trening long strongim hantek bilong mi bilong wanem mi bai bungim sampela ol biknem paitman long wol insait long ring," em i tok.

Em i tok sampela bilong ol lain husat bai i kam pait em ol ekta o ol lain husat i save kamap long ol muvi.

Nandex i tokaut tu olsem dispela pait bai i kamap insait long A-1 kikkoksing salens we em i wampela nupela profesenol kompetisen na i wankain olsem K-1 kikkoksing.

Promota bilong Nandex, Tarik Solak i go pas long A-1 kikkoksing.


"Mi laik tokim ol manmeri long kantri olsem maski mi lusim dispela wol taitol, mi i no lusim wampela samting na bai mi pait strong yet," Nandex i tok.

Em i laik lukim olsem PNG i ken kamapim nem long wol kikkoksing.

Nandex i pilim olsem em bai winim dispela pait.

PNG Netbol Federesen kamapim junia skwat

Andrew Molen i raitim



Kam kisim... Dispela meri i tok long pilaia bilong em long Praivet Kampani Netbol Resis long Pot Mosbi.

PAPUA Niugini Netbol Federesen (PNGNF) i makim pinis nesenel netbol skwat long faivpela divisen bihain long dispela nesenel sempionsip long Septemba.

I nap olsem 37 pilaia i stap long dispela skwat.

Siaman bilong ol selekta long PNGNF na vaispresiden Boe Lahui-Ako i tok ol pilaia i kam long open, anda-21, anda-17, anda-15 na anda-13 divisen.

Sevenpela anda-21 pilaia tasol husat i stap long open divisen skwat em Nettie Sau (Lahi), Tiata Baldwin na Julianne Diro (POM), Bernadette Sosoro, Zulaika Kumbuwah, Christine Ehari (Kerema) na Stephanie Hasu (Malasub).

Planti bilong ol pilaia long sinia o open divisen em bilong Pot Mosbi tasol long ol junia o liklik divisen i gat planti ol pilaia bilong ol narapela hap tu i stap planti.

PNGNF i no save wanem ol bikpela pilai bai ol i salim ol skwat i go tasol ol i makim nau bai ol i go pilai.

Sinia o Open divisen skwat em; ol shuta: Gewa Raula, Lua Mavara, Gamini Koroka, Kula Iamo, Vanuga Ravu, Uninato Duaba (POM), Ayab Doago (Moro be country) na Sau, Sosori, Diro na Baldwin.


Mid-kot: Moan-Lisa Leka, Winnie Mavara, Dianne Kala, Vavine Iamo, Caroline Lahari, Patricia Karukuru (POM), Donnamarie Poka (Lahi), Elly Wong, Kanae Rigana (Poreporena-Pore), Marcia Pinia (Kimbe), Andlopa Sabadi (Central) na Kivovia Loko (Malasub).

Ol difenda: Mimi Ori, Raka Nope, Jackie Niblett, Albertine Ehari, Susan Makara, Rakara Raula (POM), Vagi Udu Kohu (Poreporena), Monica Jonathnan (Lahi), Agnes Glengme (Kimbe) na Loroe Turia (Malasub).


Ol anda-21 shuta: Sau, Anituo Kali, Baldwin (POM), Vari Mamana, Beri Giru (Central), Joanne Ainui (Kimbe), Salome Arua (Alotau), Sosori, Cynthia Lahui (Poreporena) na Rebecca Ipoe (Malasub).

Mid-kot: Kulu Vanua, Petre Trappe (Lahi), Mary Rao, Marianama Maha (POM), Anna Joe (Central), Ramona Poha (Malasub), Ouni Poliso (Kerema), Alu Opina, Mary Ali (POM), Vavine Kila, Karo Kila (Central) na Helen Eri (Malasub).

Ol difenda: Zulaika Kumbuwah, Margaret Nablu (Lahi), Nancy Ila (POM), Waikato Roy, Garo Tau (Central), Claire Homoka (Pore), Kanu Kovae (Hiri), Delhie Penil (Kimbe), Esther Iamo (Alotau), Marina Sevese, Christine Ehari (Kerema), Stephanie Hasu na Janeta Ipoe (Malasub).



WANTOK Spots



Wanderers 7's bai laitim ples dispela wiken

Andrew Molen i raitim.

WANDERERS ragbi 7's tonamen bilong dispela yia we bai i kamap long Novemba 5-7 long Lloyd Robson oval (PRL) long Pot Mosbi bai i bikpela moa long ol yia i go pinis. Dispela i kamap long K30, 000 prais mani we ol tim bai i pait long em bihain long tupela de na wanpela nait bilong pilai.

Tumora (Fraide) avinun na nait bai i ol fes gem i kamap na long Sarere bai ol i pilai ken wantaim ol fainol i kamap long Sande.

"Tonamen bilong dispela yia i pulim 24pela tim olgeta hap long kantri na long Pacific tu," tonamen dairekta Sailosi Druma i tok.

Minerol Risos Developmen Kampani (MRDC) i go pas ken long sponsaim dispela tonamen.

Menejing dairekta bilong Kutubu Sekyuriti Sevis (KSS) na siaman bilong Pot Mosbi Wanderers klab John Kapi Natto i tok long lonsing bilong tonamen las wik olsem em i amamas tru olsem dispela tonamen i wok long gro bihain long tripela yia long helpim bilong ol sponsa.

Em i tok amamas long ol sponsa na i tok sampela moa bai putim han long neks yia.

"MRDC i putim mak pinis long developim na strongim spirit bilong 7's ragbi we i wok long go long planti hap tru long kantri nau olsem paia i lait," Natto i tok.

Ol sponsa em MRDC, Petroleum Risoses Kutubu (PRK), Air Niugini, Pacific Property Trust, KSS na Coca-Cola Amatil wantaim ol bikpela sapota POSF, Allele Fresh Farm Produce, Zenag Chicken, Gobal Technology, Pacific Adventist Yunivesiti (PAU), Ela Beach hotel na Stevens Lawyers.

Tasol biknem nem tim bilong Fiji long ragbi 7's, Red Rocks i tokaut dispela wik olsem ol bai i no i nap kam em Avaiki Wanderers bilong Solomon Islands husait ol i bin kam long dispela tonamen long 2002 tasol bai i kam.

I bin gat bikpela wari i stap long lukim dispela ol lain nogut bilong Fiji i kam pilai bilong wanem ol i save pilai dispela gem tasol olgeta yia na ol i save gut tru long pilai bilong ol.

Ol i bin winim tu Fiji nesenel tim long wanpela traiei gem.

Druma i tok olgeta samting long sait bilong ol gem long kamap i orait tasol na olgeta tim i lukfowet nau long pilai dispela wiken.

"Bihain long Steamships 7's las wik mi raun na lukim fil na olgeta samting i orait tasol.

"Bai mipela i penim fil ken na wetim ol tim tasol long kamap," Druma i tok.

Sampela i kamap pinis na sampela bai i nap stap pinis bipo long Sarere.

Dispela tonamen i stat long 2002 we prais mani i bin K5000, las yia em i bin K10 000 na nau em i kalap i go K20, 000 olgeta.

K20 000 bilong wina na ol narapela prais i

wokim kamap K30 000 bilong ol klab long resis long em.

Kap wina K20 000, rana-ap K5 000, Plet wina K2 000, rana- ap K1 000, Bowl wina K1 000 na rana- ap K500.

Ol bai pilai long faivpela pul we bai i gat siksela tim long wanwan.

Sapos yu laik lukim sampela stail ragbi eksen long wiken go tasol long PRL na sapotim tim bilong yu.



Ol Kumul pilaia bilong bihain taim...Ol Pot Mosbi skul bois lig i mekim save long wiken. Lukim ol bois tu i gat strong long pilai. Foto: POU TOIVITA

PLET BILONG KAIKAI
3kg, 5kg na 10kg

PLET BILONG WARA
6Litre
10Litre na
15Litre

Mipela igat kaikai bilong kakaruk: Starter, Grower na Finisher istap long 40kg, 20kg, 10kg na 4kg paket.

Sapotim wok didiman long PRC

Brian Bell
Shop with a friend

BOROKO 325 5411 LAE 472 3377 HCC LAE 472 3200 ERIKU 472 1433 GOROKA 732 1622 MT HAGEN 542 1999 KOKOPO 882 9027 MADANG 852 1889 HCC GORDONS 325 8460